

SSH Stacks
DU
740
A2
W3
v. 1220

WANTOK

NIUSPEPA BILONG YUMI OL PAPUA NIUGINI STRET! - 27 YIA NAU

28 pes Namba 1,220 Wik i stat long Fonde Novemba 13, 1997 50 toea

MUTRUS KANAGE
BILONG DISPELA WIK
KATIM NA SALIM IKAMI

KANAGE

"Em nau, narapela wik bilong mi ken"

■ Kanage wok olsem bar man long wanpela hotel long Mosbi. Wanpela apinun, wanpela waitman kastoma kam na dringim tupela bia. Kanage askim em long baim long tok inglis: "Sir you owe me K5". Na waitman i tok: "But I paid, don't you remember". Na Kanage bekim: "Ok, if you say you paid, you did". Waitman ya go na tokim narapela waitman olsem: "That bar man can't keep track of whether his customers have paid". Waitman ya harim na Yangoru drop long bia bilong em, na go giamanim Kanage olsem namba wan waitman i mekim. Na Kanage tokim waitman ya: "If you say you paid, I'll take your word for it".

Bihain waitman ya go tokim narapela waitman pren bilong em long we bilong giamanim Kanage na kisim fri dring. Namba 3 waitman kwiktaim i kam na dringim dabol wiski i stap. Kanage tokim dispela waitman olsem: "You know, a funny thing happened over here tonight. Two men were drinking beer, neither paid and both claimed they did. The next guy who try that is going to get punched in the nose".

Namba 3 waitman harim na tokim Kanage: "Don't bother with your troubles, just give me my change and I'll be on my way."

Kanage tok pinis. Dispela namba 3 waitman ya em ambulens kisim em i go long 3 Mail haus sik.

Sia bilong GG i hot

• Sir Bisop Getake Gam. • Arnold Marsipal • Leo Hannell • Sir Wiwa Korowi

Lukim stori long pes 2

Gavman laik daunim takis long ol timba

YAKAM KELO i raitim

PAPUA Niugini Fores Industri Asosiesen (PNGFIA) i tok maski gavman i daunim takis bilong fores industri long 7 pesen (%), dispela tu inap i no inap helpim timba industri long wok bilong em insait long kantri.

Bos bilong PNGFIA Jim Belford i tok ol timba kampani long kantri i pasim wok bilong ol pinis na sampela i daunim wok bilong ol i go liklik. Bikos strong bilong mani (kina) long PNG i bin daun pinis na wol maket prais tu i go daun, ol timba kampani i no inap long salim ol timba bilong ol long wokim mani.

Mista Belford i tok i gat pinis 350,000 sais diwai i slip nating i stap bikos nogat maket bilong salim ol dispela diwai. Na ol timba kampani i no inap katim moa diwai nau bikos dispela bai hipim moa diwai i go antap na nogat ples bilong salim.

Mista Belford i tok ol i bin askim gavman tupela krismas i go pinis long daunim ol takis long ol timba industri long

...tasol Fores Industri Asosiesen (FIA), grup bilong ol timba kampani, tok gavman i leit

20% bikos dispela hevi i wok long kamap. Tasol gavman i no mekim wanpela samting inap nau na piksa bilong en em ol timba kampani i wok long pasim wok. Na nau, dispela 7% sapos gavman i laik daunim bai i no inap helpim timba bisnis long kantri.

Mista Belford i tok tu olsem Wol Beng i no laikim long gavman i daunim takis. Wol Beng i laikim bikpela takis long ol proses timba (Ol timba we masin i katim pinis na redim).

Tasol mausman bilong Grin Pis long Pasifik rijn Brian Brunton i tok ol timba kampani long PNG i mas pasim wok bilong ol na go nabaut long kantri bilong ol. Ol i laik askim gavman long gavman i mas givim ol mani long dispela taim

nogut we kantri i stap long en olsem bikpela drai na ais we i bagarapim pipel.

Mista Brunton i tok bikpela hevi nau em gavman i wok long kisim planti toktok tu i kam long Wol Beng na Intanesenel Monitori Fan (IMF). Na mipela i no save husat i wokim disisen na ronim kantri bilong mipela nau

Tasol Mista Brunton i tok olpela Minista bilong Fores Tim Neville i bin tok long ol timba kampani i mas kamapim daunstrim prosesing long 1993. Tasol olgeta timba kampani i no mekim. Ol i laik wokim profit tasol. Olsem na ol i ken pasim wok bilong ol na go bek long kantri bilong ol.

Tasol bos bilong PNGFIA Jim Belford i tok ol i ken kamapim daunstrim prosesing na kamapim planti liklik somil na ol liklik timba bisnis ol papagraun i ken mekim. Tasol olgeta diwai na timba bai bung gen na i mas go long ovasis maket. Tasol mipela i gat hevi long ovasis maket. Olsem na olgeta timba na diwai bai mipela i salim na kisim mani olsem wanem?, Mista Beford i tok.

i go moa long pes 2

WINA BILONG DISPELA WIK EM ZORRO TEA MOSBI

Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long WANTOK NIUSPEPA, P.O. BOX 1982 BOROKO PNG.

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kemaui long wanwan wik so noken lus tingting long baim Wantok nuspepa na painimaut!

SEKIM NEM BILONG TUPELA ARAPELA WINA LONG PES 12

INSAIT

- Sik AIDS go bikpela. p2
- Ol Palamen ripot. p3
- Ol Bogenvil ripot. p4
- Gavman bai pasim saplai baset. p5

MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOOT

Mosbi, Nesenel Kapitel Distrik:

OL I PAINIM wanpela homed bom long Nain Mail mein wara paip las Sarere.

Tasol ol man save long bom wantaim PNG Difens fos i rausim bom pinis.

Bos bilong ol plis long Sentrel provins na Nesenel Kapitel Sam Inguba i tok kamapani we i lukautim wara saplai long Mosbi, Eda Ranu, i bin tok save long plis long dispela samting long Sarere nait.

Em i tok ol i bin kisim tok lukaut i kam long sampela lain olsem ol i laik bagarapim wara saplai long Mosbi.

Em i tok ol dispela lain i no amamas wantaim Eda Ranu na ol i kamapim dispela bagarap, Mista Inguba i tok. Tok lukaut i bin go long sampela woklain bilong Eda Ranu na tu long bagarapim ol paip wara.

• Mista Inguba i putim strongpela tok lukaut i go long ol pipel bilong noken givim hevi long pablik bihain sampela pleslain bilong Hanuabada i blokim hap rot long Shell kampani depo klostu long Badihagwa hai skul las Fraide.

Mista Inguba i tok sampela pipel i bin kisim bagarap na ol i karim ol i go long haus sik bihain long wanpela pait i kamap long rotblok long Baruni long Sande.

Em i tok wanpela PMV bas i bin ron i go na em stap bihain long em i bungim wanpela rotblok we sampela manki i putim long stapim ol ka na askim ol long mani.

Bihain long dispela samting i kamap, boskru bilong PMV i go singautim ol arapela wantok na ol i go na bungim ol ples lain bilong Baruni.

Mista Inguba i tok plis i kisim ripoot long sampela rotblok long dispela eria na em i putim strongpela foksawe olsem plis bai i holim pasim husat lain i putim ol rotblok.

• Paia i bin kukim wanpela fast fud sevis long Waigani Draiv las Fraide.

Ol i bilip olsem paia i bin stat taim ges i pairap na i kukim Tareq Fast Fut stoa long samting olsem 9.30 moning.

Ol paiaman i bin go long stapim paia tasol ol i no bin nap bikos paia i go bikpela hariap na kukim ples kwiktaim.

Bos bilong ol plis long Sentrel provins na NCD Sam Inguba i tok plis i mekim moa painimaut long dispela samting long wanem maski paia i stat long haus kuk, ol i bilip sampela lain i statim.

• Kriminel pasin i wok long go bikpela long Mosbi bihain long 27 hatko kalabus lain i bin ronawe long Bomana haus kalabus las wiken.

Plis i ripotim olsem planti sutaut namel long ol na ol raskol i wok long kamap wantaim tu pasin bilong bagarapim meri na kilim dai narapela man.

21 long ol ronawe kalabus lain em plis i no painim ol yet.

Ol bin holim faivpela bilong ol wanpela de bihain ol i ronawe na narapela i mekim siks long ol em ol i holim em bek las Sarere long Hohola. Plis i autim nem bilong em olsem Steven Kohu Amuna.

Sia bilong Gavana Jenerel i hot

YAKAM KELO i raitim

BIKPELA resis long kisim sia bilong Gavana Jenerel i kamap pinis. Na ol politikel pati i wok strong nau long kisim namba bilong pusim ol kendidet bilong ol long kisim dispela sia long Fonde apinun (tude).

Ol biknem kendidet husat bai resis long dispela sia em:

• Sir Bisop Getake Gam, het bisop bilong Lutheran sios long Papua Niugini,

• Arnold Masipal, olupela memba bilong Manus provins long palamen,

• Sir Wiwa Korowi, nau bai resis long winim bek sia bilong em,


• Sir Timothy Pohai biknem lida long ol gavman opis,

• Leo Hanneth olupela prima na lida bilong Bogenvil,


• Sir Zimbang Zurenuoc olupela politisen,

• Pato Kakarya olupela politisen bilong palamen.

Ol lain i bin endosim ol dispela kendidet em: Luther Wenge Morobe Gavana i endosim Sir Bisop Getake



• Timothy Pohai.



• Pato Kakarya.

Gam, Pangu Pati i endosim Arnold Masipal na Sir Timothy Pohai, Praim Minista Bill Skate i endosim Sir Wiwa Korowi, Sir Michael Somare i endosim Leo Hanneth na Pipels Progres Pati (PPP) i endosim Sir Zimbang Zurenuoc. Tasol i gat luksave olsem sapot bilong Sir Zimbang Zurenuoc i bruk namel long ol PPP memba yet bikos i gat tupela Morobe kendidet long dispela resis.

Arapela pati memba husat i no endosim wanpela kendidet i no laikim bai narapela pati i win. Olsem na ol i wok long

pret long tromoi signesa bilong ol nabaut.

Tasol Sir Bisop Getake Gam bilong PNG Lutheran sios i kisim pinis 17 signesa bilong ol palamen memba. Dispela i mekim em i kamap klia nau long go insait long ileksen long Fonde apinun (tude). Wanwan kendidet i mas kisim 15 signesa bilong ol sapota long mekim em i orait long resis long ileksen bilong Gavana Jenerel.

Gavana Luther Wenge i tok em i gat bilip long bisop Getake Gam bikos long bikpela wok em i mekim long

sait bilong sios na kantri long 16 krismas olgeta i kam.

Mista Wenge i askim ol arapela memba long votim kendidet husat i no poroman wantaim ol politikel pati na i no memba bilong wanpela politik pati na tu lida husat i gat gutpela nem na wok long sait bilong sios na komyuniti.

Tasol Gavana bilong Sandaun provins, John Tekwie i tok em i sapotim Leo Hanneth bilong not Solomons provins bikos em i tingting long stretim na pinisim hevi bilong Bogenvil.

Mista Tekwie i tok sapos ol Bogenvil lain i kisim top sia, dispela inap helpim tu long stapim ol hevi i stap long Bogenvil. Em i askim ol memba long makim lida husat i no pren bilong ol long politiks na pati. Tasol ol i mas makim man aninit long nesenel interes.

Opis bilong Gavana Jenerel i save kisim olsem 5-pela krismas long stap. Bihain, palamen i save votim nupela Gavana Jenerel. Gavana Jenerel em man i makim Kwin Elizabeth bilong Inglan long Papua Niugini.

251 manmeri i gat rekot long sik AIDS

MAK OLSEM 251 manmeri long Papua Niugini i kisim sik Aids pinis. Na biktaun Mosbi siti i go pas wantaim bikpela rekot we 178 manmeri i gat dispela sik Aids.

Long tripela mun i go pinis, rekot i soim olsem 100 manmeri i kisim sik nogut pinis long kantri. Na dispela i soim olsem namba bilong ol manmeri wantaim dispela sik nogut i wok long go antap nau.

Long las ripot bilong haus sik long Julai 30, 151 manmeri i bin kisim sik Aids. Na long Septemba 30, namba i kamap pinis olsem 251 manmeri olgeta wantaim dispela sik nogut Aids na stap long Papua Niugini.

Long Mosbi siti 108 manmeri i bin gat rekot long dispela sik nogut long mun

Julai. Tasol 70 nupela manmeri i surukim rekot i go antap na mekim Mosbi siti i go pas nau wantaim 178 Aids manmeri.

Long Westen Hailans provins biktaun Hagen i gat rekot long 24 manmeri olgeta i gat dispela sik nogut. Long Julai rekot, Hagen i bin gat 15 manmeri wantaim sik Aids.

Tasol long mun Septemba, 9-pela manmeri i kamapim nupela rekot na surukim namba bilong ol sik Aids manmeri long Westen Hailans provins i go olgeta long 24 nau.

Madang provins i gat rekot long 7-pela sik Aids manmeri na Isten Hailans provins i gat rekot long 6-pela Aids manmeri.

Long ol arapela provins em Simbu 5, Sauten Hailans provins 2, Morobe, Is Nu Briten, Wes Nu Briten na Nu Ailan provins em ol i gat rekot long wanpela sik Aids man tasol.

Insait long ol dispela nupela rekot bilong sik Aids i gat 57 sik Aids meri na 47 em ol man.

Dispela sik nogut Aids i wok long kamap bikpela nau long PNG na em i wanpela kain sik nogut we i nogat marasin bilong stapim.

Planti ripot i kamap pinis long skulim ol manmeri long abrusim dispela sik nogut. Sik ya i save kamap taim man o meri i slip wantaim narapela man o meri husat i gat dispela sik pinis.

Bikpela ren long Manus, tasol sindaun no stret yet

FELIX RAMRAM i raitim

BIKPELA hevi ren i stat pundaun long sampela eria bilong Manus provins. Tasol dispela i no helpim yet ol gaden kaikai wantaim sindaun na laip bilong ol pipel.

Long namba 6 miting bilong Manus provinsal disasta komiti, Siaman na administreta, Simeon Malai, i tokaut olsem ol bin yusim pinis moa long K112,000 long helpim ol pipel long hevi bilong ren i no pundaun long longpela taim.

Na K28,000 em komiti i holimpas yet long go hetim dispela wok bilong helpim pipel.

Em i tok namba wan hap bilong ol wok long givim helpim i go long wanwan disasta eria i pinis. Dispela em long salim na givim kaikai na wara.

Na sekta 1 na 4 i stat pinis long namba tu hap bilong rihabilitesen wok. Em long saplaim sit na kru bilong ol kainkain gaden kaikai we pipel i ken stat planim.

Lorengau taun i pinisim ol wok bilong saplaim wara.

Tasol hevi i stap yet long ol masin na marasin bilong klinim

wara, bai ol pipel i ken dring na kukim kaikai long gutpela klini wara we ol i no inap sik. Tasol gutpela na ol saveman bilong wota bod i kamap na helpim.

Helpim i go tu long ol refuji long Wes Irian kem na setelmen nabaut.

Ol lain i stap long Lombrum, hevi bilong nogat wara i stap yet. Tasol bihain long miting, komiti i mekim C.O.

Mesa Varani na Woks Ensinia long go pas na luksave na stretim ol masin samting. Na rdim na sambai long taim nogut olsem nau.

Siaman i tok moa olsem ol eria i stap long nambis em wok bilong saplaim kaikai na ol arapela helpim long pipel i go het gut.

Tasol sampela eria i no kisim helpim yet. Olsem na Mista Malai i askim tasol ol pipel long luksave na stap isi.

Bikos nau yet komiti i wetim nesenel disasta komiti long givim moa mani, bai helpim i go long ol dispela pipel tu.

Em i tok moa olsem ol eria olsem Rapatona, Balopa, Not na Saut Westen, ol tu bai kisim helpim long kaikai na wara taim i gat mani.

Gavman laik daunim takis long ol timba

i kam long pes 1

Bikpela samting em mipela i save bihainim maket. Mipela i no holim maket, Mista Belford i tok.

Long palamen dispela wik, Minista bilong Fores Dokta Fabian Pok i tok gavman i lukluk long daunim takis bilong ol timba indastri.

Minista Pok i tok i gat sampela timba kampani husat i stat wok nau tasol hevi bilong wol maket prais i pundaun na ol i pasim wok bilong ol. Tasol arapela timba kampani i stap pinis tasol taim bilong wok bilong ol i klostu long pinis (pemit) olsem na ol i mas pasim wok bilong ol.

Tasol bos bilong PNGFIA Mista Belford i tok insait long 6-pela mun i kam nau, em i no klia long amas timba kampani bai pinisim wok bilong ol bikos pemit bilong ol i pinis. Tasol sapos i gat planti risoses (diwai) i stap yet, ol kampani i save sensisim gen pemit bilong ol na wok i go yet.

Mista Belford i tok dispela hevi bilong timba prais long wok maket em planti bikpela ovasis kantri tu i bungim nau. Bikpela kantri olsem Kanada i stapim pinis 18 somil kampani bilong ol na dispela i lusim olsem 10,000 wokman bilong somil kampani.

Japan na Korea em tupela bikpela kantri husat i save baim ol timba bilong mipela. Tasol bikos long maket prais i pundaun, arapela bikpela kantri olsem Sauten Amerika i karamapim mipela long wantaim ol timba bilong ol, Mista Belford i tok.

Em i tok sapos wanpela nupela bisnis i laik kamap, gavman i mas traim long helpim em pas-taim we gavman i ken stapim ol sampela takis long em inap sampela krismas bihain. Na bihain gavman i ken kam bek na sekim na makim takis long ol samting. Dispela rot em bilong mekim dispela bisnis i groa na strong pastaim, Mista Belford i tok.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.	Papers distributed by air throughout PNG.
Advertising Manager: Mike Kanin.	Available by air mail subscription within Papua New Guinea and overseas
Editor of Wantok: Leo Wafiwa.	

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Ol Palamen kibung ripot wantaim WENCESLAUS MAGUN

Prais bilong balus tiket bai i go antap



Noken yusim politiks long makim Gavana Jenerel

RESIS bilong kisim sia bilong Gavana Jenerel i stat pinis na ol manmeri bilong Papua Niugini bai harim nem bilong husat bai kamap Gavana Jenerel bilong Papua Niugini long apinun tude.

Olpele Gavana Jenerel Sir Wiwa Korowi i strong long stap yet na sapos em i laki na winim ileksen tude, em bai i stap gen inap narapela 5-pela krismas.

Wanpela bikpela samting mipela olgeta manmeri i laik lukim em, dispela opis bilong Gavana Jenerel i no bilong politiks. Em i no opis bilong winim nem bilong politikel pati o wokim disisen bihainim laik na interes bilong politikel pati long kisim ol samting.

Dispela opis i mas sanap bilong em yet na mekim wok bilong em aninit long lo na oda bilong Komonwol we i aninit long Kwin Elizabeth bilong Inlgan.

Planti bikpela lo na ol bikpela pepa bilong oraitim na yesa long ol bikpela senis na ol samting i kamap long kantri bilong mipela long PNG em Gavana Jenerel i save sainim na putim stem long en. Na ol dispela pepa i save kamap olsem lo. Olsem na i no gutpela long dispela opis bilong Gavana Jenerel bai kamap olsem wanpela opis bilong mekim wok bilong politiks na pati long winim pawa na biknem.

Long dispela as, taim ol lida na memba bilong palamen i bung tude, ol i mas skelim gut kendidet bilong kamap Gavana Jenerel.

Long 1987 palamen i bin makim leit Sir Ignatius Kilage olsem Gavana Jenerel bilong Papua Niugini. Em i no wanpela politiks man. Em i wanpela praiwet man husat i wokim nem bilong em long ol wok bilong em na arapela komyuniti wok bilong em.

Olsem na sapos ol memba i ken luksave long dispela na makim ol man olsem we i nogat politiks poroman o wok wantaim pati, bai i orait. Bikos bai tingting na sanap bilong em bai i olsem independen o sanap em yet na nogat man bai pusim em long mekim disisen o mekim samting i kamap.

Tasol sapos palamen i makim wanpela politiks man, orait ol politikel pati na ol politisen pren i no ken bagarapim wok na opis bilong Gavana Jenerel. Larim em i stap em yet long sevim wok bilong em stret olsem het bilong stet i makim Kwin long Papua Niugini.

PRAIS bilong Air Niugini na ol ted level balus long Papua Niugini bai i go antap long 30 pe sen, Mista bilong Trenspot na Sivil Eviesen, Philemon Embel i tok. Prais bilong balus i go antap bikos prais bilong baim ol samting bilong ronim balus olsem fiul na ol spea pat i go antap tru.

Mista Embel i tok tu olsem gavman i gat tingting long askim sampela kampani husat i gat save bilong ronim balus long lukautim Air Niugini. Moa yet, veliu bilong kina i go daun long 70 toea long wan US dola.

Narapela bikpela hevi long PNG tude we i mekim gavman i wari tru long dispela taim em hevi bilong biksan na ais. Mista Embel i tok gavman i glasim olgeta dispela hevi wantaim na bai kamapim wan-

pela tingting bipo long ol i tokaut long sampela taim bihain.

Mista Embel i bekim askim namba tu bilong Gavana bilong Niu Ailan, Paul Toian olsem sapos ol i bungim pe bilong foapela bos bilong Air Niugini inap long wanpela yia em bai sanap long mak bilong K1 milion na K250 000 alauens na i tok olsem em i no save. Tasol em i tok em bai mekim wanpela wok painim sapos toktok bilong Mista Toian em i tru. Na sapos i tru gavman bilong em bai traime.

Long bekim namba tri askim, Mista Embel i tok ol bos bilong Air Niugini i save pinis olsem bai i gat planti manmeri na pikinini i yusim balus long krismas na niu yia. Olsem na Air Niugini i painim rot bilong helpim ol pasindia bilong en.

Tasol Mista Embel i tok, nau long dispela taim, Air Niugini i gat bikpela hevi wantaim ol balus bilong en.

"I luk olsem insait long wanpela de, Air Niugini i gat tupela balus i bagarap na ol mekenik i no inap fiksim bikos i nogat spea pat." Mista Embel i tok. "Dispela em i wanpela bikpela hevi tru."

Long narapela askim Gavana bilong Is Sepik, Sir Michael Somare i askim Mista Embel sapos gavman inap kisim dinau mani long wanpela benk na baim ol nupela balus bilong Air Niugini. Em i tok, nau yet wanpela kampani bilong Netherland ol i kolim long Foka i putim Air Niugini long han bilong PNG gavman bilong lukautim.

Sir Michael i tok, i luk olsem sampela kampani bilong

Korea o Amerika bai tek ova long Foka olsem na gavman i mas baim aut Air Niugini kwik.

Long bekim dispela askim, Mista Embel i tok gavman i nogat mani. Em i tok bisnis bilong ronim balus em i wanpela bisnis yu mas i gat planti mani long mekim.

Wanpela tingting Mista Embel i ting gavman i mas mekim em long larim ol praiwet kampani o bisnis lain i baim aut Air Niugini na lukautim. Tasol em i tok dispela em i no samting ministri bilong em i lukautim. Mista Embel i tok, dispela hevi em samting bilong Fainens Minista long glasim na painim rot bilong stretim.

Tasol em i tok nau yet gavman i nogat tingting long tokaut olsem ol i laik salim Air Niugini i go long ol praiwet kampani.

Mak olsem 650, 000 pipel i kisim bikpela bagarap

MINISTA bilong Provinsel Afes na Lokol Level Gavman, Simon Kaumi i tokim las kibung bilong neseneal palimen long Novemba 12, olsem samting olsem 650, 000 pipel i kisim bikpela hevi stret long biksan na ais. Ol dispela lain i stap long Sentrel, Galf, Westen, Milen Be, Enga, Westen Hailens, Simbu, Isten Hailens, Morobe, Wes Sepik na ol nambis bilong Madang provins.

"I tru ol pipel bilong ol provins mi kolim i kisim bikpela bagarap, mipela i amamas long toksave olsem ol provins long Niugini Ailan, Momase, na sampela hap bilong Hailans rijen i kisim ren long foapela wik i go pinis," Mista Kaumi i tok.

Em i tok maski ren i pundaun long ol dispela provins, ol bai kisim helpim yet insait long narapela faiv i go inap long eit mun inap long ol i kisim kaikai long gaden bilong ol yet.

Mista Kaumi i tok bihainim ripot i kam long Rapid Asesmen Tim, gavman wantaim helpim bilong ol kantri i go pas long helpim Papua Niugini i stat pinis long helpim ol pipel insait long ol eria i kisim bikpela bagarap.

"I kam inap nau gavman i givim pinis K4 milion i go long ol provinsel gavman long baim kaikai. Gavman bai putim ken K20 milion antap long dispela long helpim ol lain i kisim dispela hevi," Mista Kaumi i tok.

Tasol em i tok wanpela bikpela hevi ol i bungim insait long dispela taim em hevi bilong salim toksave long ol ples i go long distrik, long distrik i go long provins na long provins i kam long Neseneal Disasta na Imejensi Sevis (NDES).

"Long stretim dispela hevi, dipatmen bilong mi i kamapim pinis wanpela rot bilong bihainim long kisim toksave na painim rot bilong helpim ol lain i bungim dispela hevi," Mista Kaumi i tok.

Em i tok tu olsem gavman i go het na painim rot bilong sapatim Neseneal Disasta na Imejensi Sevis na ol lain i go het long helpim PNG wantaim mani.

"Long lukim dispela tingting i karim kaikai, gavman i wok klostu wantaim Neseneal Draut Rilif Komiti, Neseneal Disasta Komiti na ol grup i wok wantaim dispela komiti, na NDES long kamapim wanpela sot na namel tem eksen plen," Mista Kaumi i tok.

Insait long dispela eksen plen ol i painim ol gutpela rot bilong salim kaikai na ol arapela samting bilong helpim ol lain i kisim taim long biksan na ais long neseneal na provinsel level.

Pait insait long famili long PNG i bikpela moa

HEVI bilong pait insait long famili long Papua Niugini i winim tru ol arapela kantri long wol. Na namba bilong ol lain i kisim bagarap insait long ol kain pait long mak bilong A i go long E insait long Mosbi Jenerel haus sik i go antap na i no go daun.

Memba bilong Mosbi Saut, Carol Kidu i tok insait long Novemba 11 palimen kibung. Ledi Kidu i askim Minista bilong Jastis Jacob Wama sapos em i save long dispela.

"Sapos yu save, mi laik save wanem samting Ministri bilong yu bai mekim long karim stretim dispela hevi," Ledi Kidu i tok.

Em i tok insait long wanpela las ripot bilong Lo Rifom Komisen i gat rot bilong bihainim long stapim ol pait na hevi insait long famili long PNG. Insait long dispela ripot ol i askim inap gavman i rausim sampela lo insait long Distrik Kot Ekt, Ares Ekt, Evidens Ekt na Kriminel Kod.

Ledi Kidu i askim tu Mista Wama long tokaut sapos Vagrensi Ekt i stap yet o nogat? Na sapos i gat, inap Mista Wama i tokaut sapos Ministri bilong em na Intenel Afes i glasim dispela hevi na painim sampela gutpela rot long karim aut dispela lo.

Em i go het na askim Mista Wama inap Ministri bilong em wantaim ol arapela Ministri husat i gat wankain wok bilong glasim ol hevi i kamap bikos long hevi bilong mani nau i kamap strong na bagarapim sindaun bilong ol pipel long ples, taun na kantri.

Ledi Kidu i askim tu Mista Wama long painim gutpela rot bilong salim ol lain i kam long arapela kantri long go bek long kantri bilong ol. Na glasim tu rot bilong stretim program bilong painim ples bilong ol lain i kam long taun na stap long skwata setelmen. Em i askim Mista Wama inap Ministri bilong en i painim ol gutpela rot bilong stretim dispela hevi wantaim lo aninit long Vegrensi Ekt.

Ledi Kidu i tok olsem planti ol pipel long PNG i save long wanem as tru hevi bilong lo na oda i kamap bikpela long kantri. Em i tok hevi bilong lo na oda i kamap bikpela tru bikos i gat bikpela hevi tru bilong mani. Planti lain i laikim mani na i painim rot bilong kisim mani olsem na hangre long mani i kamapim ol kainkain hevi long sosaiti.

Ledi Kidu i laik save wanem samting Ministri bilong Jastis i mekim wantaim ol arapela ministri na ol ajensi long developim wanpela gutpela rot long adresim hevi bilong poveti na lo na oda.

Long bekim ol askim bilong Ledi Kidu, Mista Wama i no bin bekim stret ol askim. Tasol bihain long Gavana bilong Is Sepik, Sir Michael Somare i strongim askim bilong Ledi Kidu, Mista Wama i stap long pulim toktok na i tok em bai glasim ol dispela hevi na bekim askim bilong Ledi Kidu insait long wanpela ripot.



P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Ostrelia na Nu Silan	K115.00
Esia Pasifik na Japan	K150.00
Amerika na Yurop	K215.00



Bogenvil nius wantaim VERONICA HATUTASI

BRA kisim oda long go bek long ples na helpim kamapim gutpela sindaun

BOGENVIL Revoluseneri Ami (BRA) i givim oda long paitman bilong ol long Sentrel na Saut Bogenvil i lusim Buka, na go bek wok long stretim ples insait long wanwan eria bilong ol. Bihainim dispela oda, ol ripot long Buka i tok planti BRA paitman i go bek pinis long distrik na ples bilong ol.

Man i go pas long plenim ol pait bilong BRA egensim sekuriti fos long ailan, Ben

Kamda i bin sainim wanpela oda long Oktoba 29, 1997 long dispela. Tupela BRA lida, Steven Topesi na Peter Naguo i wari tu long ol lain bilong ol. Bikos sampela i kamapim trabel na ol i no welkamim ol tumas long Buka na not Bogenvil.

Wanpela hap long oda bilong Kamda i go long ol lain bilong em i rit olsem, "Oda i go long ol BRA kampani long not

i kam long BRA hetkwata long odarim ol saut na sentrel BRA paitman i go bek kwiktam long ol distrik bilong ol. Sapos ol i no harim tok, wankain pasin olsem dispela i bin kamap long 1989/1990 agrimen bilong stapim pait bai ikamap."

Mista Kamda i bin tokim niusleta bilong Bogenvil, Villepress, olsem ol sinia BRA komanda i laikim gutpela sindaun i kamap long Bogenvil

long gutpela rot. Na ol i no laikim wankain hevi olsem dispela long 1980/1990 i kamap gen. Bikos ol i no toktok yet wantaim PNG gavman long bihain taim bilong Bogenvil.

Em i tok tupela BRA komanda i laikim ol lain bilong ol long go bek long ples na stap insait long wok bilong kamapim belisi na sekan pasin, na ol arapela wok long kamapim gutpela sindaun long ailan.

Nogat moa meknais bihainim Burnham agrimen

SINDAUN long olgeta hap bilong Bogenvil i stap gut na isi nau. Ripot i tok olgeta birua lain bilong tupela sait wantaim i wok bung wantaim long mekim Burnham agrimen i karim kaikai.

Antap long ol arapela samting insait long agrimen, agrimen i toktok strong long stapim pait. Na go hetim ol wok bilong kamapim gutpela sindaun long ailan i go het gut tasol.

Ripot i kam long opis bilong FowoTeknikel Koman beis bilong PNG Difens Fos long Buka i tok olgeta grup na ol pipel long ailan i wok long bihainim ol samting we i stap aninit long Burnham agrimen.

"Ples i stap isi, olgeta lain i stap insait long wok bilong dispela agrimen. Ol pipel i fri na raun long laik bilong ol yet, bihain ol i rausim olgeta tambu we pastaim bin stapim ol long wokabaut fri. Em ol samting olsem ol sekpoin. Na tu tambu long ol kaikai bilong stoa samting we pastaim skel bilong wanpela man long baim long stoa em tripela paket rais na kain olsem tasol long ol arapela samting.

"Ol senta olsem Buin, Arawa na Sovele i pulap. Buka taun, bikos em i wanpela hap long provins we i gat ol stoa long en i wok long pulap olgeta de long ol pipel bilong bikailan husat i go long hap bilong wokim soping. I no ol man nating tasol ol BRA tu wantaim.

"Rot i op long Buin, Siwai, Nagovis, Arawa, Wakunai, Tinputz, Torokina i

go olgeta long Buka na olsem ol man i wok long go long Buka. Na tu raun long ol senta nabaut long bungim ol hauslain bilong ol o long wokim ol arapela wok.

"Wanpela samting tasol em ol rot i nidim meintenens," ripot i tok.

Ripot i tok nogat pait o meknais i kamap long provins na dispela i gutpela mak.

Ripot i tok moa olsem Buka Ailan i bungim hevi yet long wara i sot. Bikos ren i no bin pundaun long longpela taim, olsem ol arapela hap bilong kantri. "Tru olsem wanwan taim liklik ren i pundaun long Buka. Tasol mipela i pilim hevi long wara i sot yet. Long bikailan, ren i pundaun na ol orait. Tasol hevi bilong biksan em mipela i pilim yet long Buka Ailan," ripot i tok.

Stap na sindaun long Sentrel Bogenvil i go gut tasol long dispela taim.

"Ol grup olsem bilong ol soldia bilong PNGDF, BRA/BIG, ol resisten paitman, ol sief na ol ples pipel long sentrel Bogenvil i wok long holim bung wantaim long kiam ol toktok we i stap aninit long Burnham agrimen.

"Long wankain taim tu, ol seremoni long kamapim pasin bilong wanbel na sekan i wok long kamapim namel long ol grup we ol i bin mekim rong long wanpela na narapela insait long taim bilong hevi long ailan," ripot i tok.

Ol lida bilong tupela birua sait sekan, na promis long bringim bek amamas

GUTPELA nau olsem ol lida bilong tupela birua sait long Bogenvil hevi i kam bung wantaim na sekan pinis. Na tokaut long wok bung, na bringim gutpela sindaun na amamas, em ol pipel i bin lukim long bipo.

Dispela bung bilong sekan na kamapim belisi pasin i bin kamap long las wik. namel long ol bikman bilong Nesenel Gavman wantaim Bogenvil Tremsisenel Gavman, na BRA na Bogenvil Interim Gavman. Bung i bin kamap long Buka long Trinde Novemba 5, we moa long 5,000 manmeri na pikinini i bin kamap, wantaim tu ol arapela lida.

Insait long dispela bung, Bogenvil rijinol memba long Nesenel Palamen, John Momis, i sekan wantaim Primia Gerard Sinato, na tripela arapela Nesenel Palamen memba, em long Not Bogenvil memba Michael Ogio, memba bilong Saut Bogenvil, Michael Laimo, Sentrel Bogenvil na Bogenvil Afeas Minista Sam Akoitai. Ol sekan tu wantaim ol arapela bikman bilong BTG, na tu wantaim ol BRA na resisten paitman.

Bikpela kaikai i bin kamap tu long makim na amamasim dispela bung, we i namba wan taim bilong kamap.

Bikos rot i op nau na ol ka i wok long i go na i kam, i bin gat ol pipel bilong saut, not sentrel, not is na wes Buka, na Atols distrik long dispela seremoni.

Wanpela lida bilong BRA/BIG, Ben Kamda, husat i lukautim ol wok bilong bringim belisi pasin, na kamapim gutpela sindaun, i tok ol pipel bilong Bogenvil i les pinis long pait. Na tu long ol hevi na sindaun nogut long longpela taim. Na laikim olsem pait i mas pinis. Na gutpela sindaun i mas kamap gen long dispela naispela paradais ailan.

Long dispela taim tu, Kamda i bin holim pas na sekan wantaim komanda bilong ol resisten paitman long Buka, Hilary Masiria. Ol pipel i bin paitim han long lukim dispela gutpela sain. Bikos dispela i soim bilip bilong pasin birua bai pinis. Na ol bai wok wantaim long stretim hevi.

Ol bin hangamapim ol mimis o selmani antap long

ol bikman long wok-abaut aninit long en, na tripela pik i stap we ol bikman i sanap long ol long mekim sekan pasin.


Dispela i bihainim rot bilong tumbuna na kastom pasin bilong ol Bogenvil pipel.

Tupela bikman, Mista Momis na Sinato i bin sekan pastaim. Na bihain, ol arapela Nesenel Palamen memba i sekan wantaim ol BTG memba, na ol arapela bikman.


Taim Mista Kamda i sekan wantaim Masiria, em i tok dispela em bikpela tingting na laik bilong ol BRA paitman long lukim dispela. Na nau ol i laik wok strong long kamapim gutpela sindaun bilong ol pikinini bilong tude na bihan taim long stap amamas.

Mista Kamda i bin go pas long wanpela BRA grup bilong Sentrel Bogenvil long makim BRA/BIG long dispela bung.

Momis laikim nesenel gavman givim moa pawa long Bogenvil



• Bogenvil MP, John Momis.



• Sentrel Bogenvil memba, Sam Akoitai.



• Bogenvil Afeas minista, Michael Ogio.

BOGENVIL rijinol memba long Nesenel Palamen, John Momis, i strongim ol lida long ailan long sanap strong wantaim. Na askim strong nesenel gavman long givim Bogenvil gavman moa pawa.

Em i tok dispela em wanpela rot tasol bilong stapim olgeta pait. Na bringim bek gutpela sindaun na amamas long ailan.

Mista Momis i bin mekim dispela toktok long las wik Trinde.

Dispela em long bung bilong kamapim sekan na belisi pasin, namel long 4-pela nesenel memba bilong provins, Bogenvil primia, ol Bogenvil Tremsisenel Gavman memba, ol BRA paitman, na ol resisten paitman.

Mista Momis i bin tokim ol pipel olsem trupela gutpela sindaun na belisi bai no inap long kamap inap ol lida i sanap strong wantaim.

Na askim strong nesenel gavman long tilim gut ol pawa, na disisen bilong lukautim ol samting insait long ol provins i go long ol pipel.

"Moa pawa na kisim independens i no min olsem Bogenvil i laik bruk lusim PNG, nogat. Tasol i min olsem tilim ol pawa bilong

gavman aninit long mama lo bilong kantri," Mista Momis i tok.

Em i tok dispela em i rait bilong pipel. Na em i samting bilong ol lida em pipel i votim long mekim ol stretpela lo long givim moa pawa i go long ol pipel bilong Bogenvil na PNG tu," Momis i tok.

Mista Momis i tok pasin we gavman bilong bipo i kam inap nau i mekim long holim pasim pawa na i no tilim gut i kamapim hevi, we i stap nau long Bogenvil.

Ol pipel i pilim olsem gavman i no tilim pawa long mekim na stap insait long ol toktok we i karamapim welfea, laip na sindaun bilong ol," em i tok.

"Gavman i noken mekim griti pasin long holim bek olgeta pawa olsem wanpela hurita. Na ting olsem ol pipel bai sindaun na lukluk olsem ol longlong lain. Na kaikai long han bilong gavman tasol."

Mista Momis i no laik lukim dispela belisi na sekan bung i lus nating, we trupela kaikai bilong en i mas kamap.

Dispela em long pait pasin i stap. Na gutpela sindaun na amamas i go bek long pipel.



Gavman laik taitim baset wantaim ol rifom

YAKAM KELO i raitim

NESENEL Gavman i laik mekim 1998 nesanel baset i poroman wantaim olgeta rifom o ol bikipela senis we gavman i kamapim pinis.

Praim Minista Bill Skate i tok em i bin kisim olsem 8-pela wik olgeta long glasim na skelim dispela baset wantaim ol opisa bilong Fainens. Na em i laikim bai dispela baset i mas kamap olsem developmen baset we em i mas wok insait wantaim olgeta senis long ol sistem o rifom we gavman i bin pasim pinis.

Ol kain rifom olsem edukesen, helt, politikel, maining na planti arapela rifom we gavman i bin pasim pinis na mekim kamap.

Mista Skate i tok as bilong dispela em bikos i gat planti projek we i no wokim mani na i save kaikai bikipela mani. Olsem na ol i laik mekim ol senis we ol i mas rausim mani long ol dispela wok o projek na putim i go long arapela projek we i ken kamapim helpim na developmen long ol manmeri.

Narapela bikipela samting Mista Skate i tok em i glasim olgeta baset bilong bipo na

bikipela mani i save lus tasol long potnait pe bilong ol pablik sevans. Na liklik mani tasol i go long mekim ol wok developmen. Na long dispela, gavman i wok long kisim moa takis long ol manmeri tasol em yet i no mekim gupela wok developmen na sevis bilong sevim na helpim pipel.

Wanpela bikipela samting bai dispela gavman i mekim long 1998 nesanel baset em long kamapim tasol saplai baset. Dispela i min olsem 1998 nesanel baset i no ful baset.

Praim Minista Bill Skate i tok as bilong kamapim dispela hap baset tasol em bikos long hevi we i bungim kantri tude. Bikipela hevi bilong drai na ais long kantri bai kos bikipela mani moa long gavman i sevim ol pipel bilong in. Na dispela bagarap bai istap inap neks yia i go, Mista Skate i tok.

Narapela hevi gavman i skelim tu em long prais bilong ol kopa, wel, kopi, timba na arapela samting moa i pundaun pinis long wol maket. Na dispela i mekim hat long kantri i pulim mani long ol samting em i laik salim.

Narapela bikipela hevi Mista Skate i tok em pundaun bilong stok maket o strong bilong mani

long biknem kantri olsem Japan. Na dispela bai givim hevi long Australia. Na sapos Australia i bungim hevi long dispela, mipela tu long PNG bai bungim hevi bikos mipela i save kisim planti helpim na samting i kam long Australia.

Mista Skate i skelim olsem dispela taim nau em taim nogut na gavman i mas glasim na skelim gut tru ol rot bilong putim kamap baset.

Mista Skate i tok bikipela samting nau long gavman i mas kamapim em long skelim ol projek na wok na rausim sampela na putim mani i go long ol arapela projek we i ken givim sevis na helpim tru long ol pipel.

Mista Skate i tok dispela saplai baset bai i olsem developmen baset na em bai poroman wantaim olgeta rifom o ol senis we gavman i kamapim pinis na ol i wok i stap.

Gavman bai tokaut long dispela saplai baset long dispela wik long kibung bilong palamen.

Long narapela nius, plis long Australia i holim seketeri bilong Fainens Dipatmen Issac Lupari long dispela wik. Plis i holim em bikos em i holim wantaim em \$56,000 kes mani na raun. I gat lo i tambuim dispela.

Skate laik kirapim gen fri edukesen

PRAIM Minista Bill Skate i tokaut olsem gavman bilong em bai wok strong long kirapim bek fri edukesen na fri helt sevis.

Mista Skate i tok taim em i raun long ol hailans provins las wik, em i luksave olsem planti papamama i pasim mani bilong ol long baim skul fi bilong ol pikinini bilong ol. Tasol ol yet i wok long kisim bikipela bagarap nau long hangre bikos long hevi bilong bikipela drai na ais we i bagarapim Papua Niugini nau. Mista Skate i tok dispela em wanpela sori samting na gavman i mas traun long helpim ol manmeri long dispela taim nogut.

Gavman i mas mekim sampela kain helpim long sait bilong edukesen na helt sevis bai ol papamama i ken kisim helpim na ol i ken yusim mani bilong ol long baim kaikai bilong strongim bodi na stap laip, em i tok.

Praim Minista i tok em i toktok pinis wantaim ol Minista na sinia gavman opisa long skelim na stretim ol dispela samting bilong mekim kamap. Em i tok strong olsem gavman i mas stop nau long no ken kisim takis long

ol samting bilong wok skul o ol samting bilong mekim wok long haus sik. Gavman i mas larim ol dispela samting i kam fri long mekim ol wok bilong ol long sevim pipel.

Fri edukesen em i no nupela toktok. Dispela toktok i bin kamap bipo pinis wantaim ol olupela gavman na ol manmeri i klia gut long dispela.

Gavman i wok long kisim takis yet long ol manmeri tasol gavman i no save tingting long daunim ol sampela hevi ol manmeri i save bungim. Olsem na gavman bai traun nau long stapim sampela projek we i no gupela tumas na i save kos bikipela mani tumas na helpim ol skul pikinini wantaim edukesen bilong ol. Mista Skate i tok. Long dispela Fraide tu, bai Praim Minista i tokaut long nupela Minista bilong Edukesen. Olpela Minista em Gabriel Dusava we kot i rausim em pinis long i no ken stap olsem memba na Minista. Palamen i tokaut long dispela tu na Praim Minista bai tokaut long nupela Minista long kisim dispela ples.

Kot long Manus i holim tupela ovasis sip

KOT long Manus i holim pinis tupela bikipela sip bilong ol ovasis husat i save raun kisim pis hait long biksolwara bilong Papua Niugini.

Long haus palamen long dispela wik, Gavana bilong Manus provins Steven Pokawin i askim Minista bilong Fiseris sapos ol pipel bilong Manus i ken kisim dispela tupela bikipela sip. Mista Pokawin i askim sapos i gat sampela kain lo bilong Fiseris we ol sip olsem we i brukim lo na wanem provins i holim em, bai dispela provins na ol bisnis lain bilong em i ken tekova long dispela kain sip.

Minista bilong Fiseris Kala Swokin i tok em i klia long dispela stori bilong tupela ovasis sip ya we kot long Manus i holim bikos tupela i no bihainim lo bilong pulim pis long solwara bilong Papua Niugini. Mista

Swokin i tok nau olsem kot i holim pinis tupela sip ya, dispela tupela sip i kamap olsem samting bilong gavman (Stet). Na dipatmen bilong em bai putim tupela sip ya long tenda na husat bisnisman o ol pis bisnis grup i laik baim, ol i ken aplai long dispela tenda na dipatmen bilong em i ken skelim.

Mista Swokin i tok bai ol i putimaut tenda klostu taim, na sapos ol lain long Manus i gat laik ol i ken aplai i go long Piseris Dipatmen na em i ken skelim. Tasol Mista Swokin i tok em i no klia sapos i gat sampela bikman na bisnis lain i soim interes long kisim dispela tupela sip. Em i mekim dispela tok long bekim askim bilong Mista Pokawin sapos Minista i save olsem sampela bikman i wok long laik kisim tupela sip ya.



Maski kukim ples nating... • Ol paia man i tromoi wara long mekim indai paia we ol bikhet man i mekim long nupela friwe rot long Mosbi.

Minista bai sekim gut ol timba takis

MINISTA bilong Fores Fabian Pok i tok gavman bilong em bai sindaun na lukluk long rot bilong traun daunim takis long bisnis bilong timba insait long kantri. Dokta Pok i tok i tru prais bilong ol diwai i go long ovasis maket i pundaun wankain olsem planti arapela minerol we prais bilong ol tu i pundaun. Na dispela i kamapim hevi long ol timba kampani na tu hevi long gavman lo, y pulim mani. Long dispela as, Ministri bilong em i laik skelim na sekim gut dispela hevi na lukluk long rot bilong traun daunim ekspot takis i go daun liklik, Dokta Pok i tok.

Dokta Pok i tok tu olsem em i klia sampela timba kampani i wok long stapim wok bilong ol bikos ol i tok ol i bungim dispela hevi bilong timba prais i pundaun long wol maket.

Tasol Minista Pok i tok em i no klia tu sapos sampela timba kampani i wok kamap nau long taim bilong ol long pinis. Na tu sapos sampela timba kampani riau tasol i stat na pasim wok bilong ol bikos long dispela hevi bilong wol maket prais i pundaun. Olsem na ol bai sekim gut dispela samting

tu. Minista Pok i mekim ol dispela toktok long bekim askim bilong Kandrien Glosta memba Peter Arul. Mista Arul i askim sapos gavman ken kirapim gen timba kampani long ilektoret bilong em long Wes Nu Briten provins. Taim dispela timba kampani i pasim wok bilong em, planti wokmanmeri i nogat wok na raun pulap long Kimbe taun i stap.

Mista Arul i tok hevi bilong bikipela drai i mekim ol manmeri ya i hangre nabaut bikos ol inogat wok bilong mekim na kisim mani.

Narapela bikipela hevi tu Mista Arul i tok em ol asples o papagraun tu i no moa kisim loyalti mani bilong ol kampani i stopim wok pinis. Na nau ol papagraun i hangre long bikipela drai taim nau bikos ol i save kisim strong long loyalti mani bilong timba. Memba bilong Kandrien Glosta i tok dispela timba kampani long Wes Nu Briten em bikipela kampani na i kisim planti wokman bilong olgeta hap provins. Tasol nau, olgeta i nogat wok na pulap raun long Kimbe taun i stap. Olsem na em i askim Fores Minista long traun painim rot long mekim dispela timba kampani i wok gen.

Earn More Money

Learn The Skills That Bring Success

With ICS Certificate Courses, you can learn the skills you need to get the job you want — without spending a fortune or investing years in school! Choose from over 100 fascinating skills that you can learn at home in your spare time, in **Accounting, Business Management, Hospitality Management, Computer Programming and Applications, and Secretarial and Office Skills.**

Send today for FREE information!

* Courses are completed in six months or less.

© International Correspondence Schools
Dept. FTAC
P.O. Box 1900
Scranton PA 18501-1900 U.S.A.
Fax: (717) 543-8102

Yes! Please send me **FREE** information on ICS Certificate Courses in:

Tick one or more boxes:

<input type="checkbox"/> Accounting	<input type="checkbox"/> Business Management
<input type="checkbox"/> Hospitality Management	<input type="checkbox"/> Secretarial and Office Skills
<input type="checkbox"/> Computer Programming and Applications	

Name _____ Age _____
(Please Print Clearly)

Address _____

City _____ Postal Code _____

Country _____ Phone (____) _____

ATING yu bin lukim wanpela kramsel i slip long wesana long nambis o insait long wanpela liklik raunwara? Kramsel ya i save hait tasol insait long liklik haus bilong em na stap. Em i no save kam arasait na wokabaut. Nogat. Em i pret. Em i larim tait i karim em i go i kam long kain kain ples. Na sapos em i hangre, em i opim maus tasol na tait i bringim kain kain kaikai i kam stret insait long maus.

Nau yumi lusim nambis na yumi kalap antap long wanpela maunten. Antap ya yumi lukim wanpela tarangau i sel long win na i flai i go. Tarangau i wokim haus bilong em long ol liklik stik diwai na ankaim antap tru long longpela diwai. Tarangau em i pisin bilong pait na bilong painim na kilim ol liklik enimal. Long taim em i flai antap tru, gutpela ai bilong em i save lukim liklik rat i ran insait long kunai. Lukim pinis, nau tarangau i pulim win i go insait na em i hetwin i go daun olsem wanpela roket na wantu em i holim rat long tupela han bilong em na karim i go antap.


TU MINIT TINGTING

Ol pisin i flai nabaut

Yu lukim: tarangau na kramsel, tupela i narakain samting tru. Tarangau i no save wet long kaikai i kam insait nating long maus bilong em. Nogat. Em yet i go painim kaikai.

Ating nau yu inap save watpo sampela provins i droim wanpela tarangau antap long plak bilong em; tasol i no gat wanpela provins i putim kramsel olsem. Tarangau em i man bilong goaut na wok; em i no sindaun nating olsem kramsel. Olsem na ol bikman i laik bai ol pipel i lukim piksa bilong tarangau i stap long plak na ol tu i go mekim wankain: ol i taitim bun long wok.

Long Baibel i gat stori long ol tarangau na planti arapela kain pasin. Long Eksodas 19:4, God i tok long ol Israel olsem: "Mi bin karim yupela olsem tarangau i karim nupela pikinini long wing



FRANK MIHALIC i raitim

bilong em." Planti taim Jisas i gat tok long God i save lukautim gut ol pisin. Long Matyu 6:26 em i tok olsem: "Yupela lukim ol pisin. Ol i no save planim kaikai, na ol i no save bungim na putim long haus

kaikai. Tasol Papa bilong yupela i stap long Heven em i save givim kaikai long ol. Ating yupela i no winim tru ol pisin, a?"

Dispela tok bilong Jisas i tru, tasol nogut yumi lus tingting long wanpela liklik poin. Em hia: ol pisin yu i no save sindaun nating olsem kramsel na God i tromoim kaikai i go daun nating long maus bilong ol. Nogat. Ol pisin i save raun raun na painim kaikai bilong ol. God i givim; tasol ol i mas painim.

Yumi tu i wankain. God i save givim planti gutpela samting long yumi; tasol yumi mas taitim bun na painim. Ol man meri bilong kago kal tasol i laik sindaun nating klostu long matmat na wet bai ol tumbuna i mas salim nating ol kago i kam daun long ol. Sore, ol i wet i stap yet, tasol i nogat kago i kamap.

Long narapela taim Jisas i tok-save long ol pipel nabaut olsem: "Maski ol wan wan pisin ol inap

long tu toea tu toea tasol. Tasol God i wari long ol. Em i no larim wanpela i pundaun nating long graun . . . Olsem na yupela i no ken pret; yupela i winim planti lain liklik pisin." Lukim Matyu 10:29-31.

Long Matyu 23:37 Jisas i krai sore long Jerusalem na i tok, "Jerusalem, planti taim moa mi laik bungim ol pikinini bilong yu, olsem kakaruk meri i save bungim ol pikinini bilong em aninit long wing bilong en. Tasol yupela i no laik." Olgeta manmeri i stap long ples ol i save gat long dispela pasin bilong ol kakaruk.

Papua Niugini em i gat planti kain pisin long olgeta hap bilong en. Long tulait inap long tudak yumi inap harim krai bilong koki na kakaruk na kotkot na balus.

Wan wan pisin ya i gat krai bilong en stret. Long krai bilong en yumi inap save wantu em i koki o kokeru. Na krai bilong olgeta pisin i autim dispela hap tok bilong Gutnius: "No waris! God i save pisin long mi na long yu, na em i save lukautim yumitupela wantaim."

Ol Hagen Katolik i bringim Baibel i go long Enga long tingim ol namba wan misinari

Long tingim ol namba wan misinari husat i bringim Gutnius bilong God i go long Enga samting olsem 50 yia i go pinis, ol katolik yut, lijen bilong Maria, na planti ol arapela strongpela katolik manmeri bilong Hagen i kisim Gutnius baibel na wokabaut long Hagen i go long Enga.

Ol i stat wokabaut long Mande Novemba 10, long Hagen i go long Kuruk. Long Tunde Novemba 11 ol i lusim Kuruk na i go long Kamaga. Long Trinde Novemba 12 ol bai lusim Kamaga na i go long Angei. Angei em i stap long boda bilong Enga na Hagen. Long Angei bai i gat wanpela seremoni.

Insait long dispela seremoni, ol Katolik bilong Hagen wantaim asbisop bilong ol, Asbisop Michael Meier SVD, bai givim dispela Gutnius baibel i go long Fr Gerard Bus SVD wanpela bilong ol namba wan misinari i go long Enga.

Long Angei Fr Bus, na bisop bilong Enga Bisop Herman Raich SVD na ol Katolik bilong Enga bai karim dispela Gutnius baibel i go long Tsak. Long Tsak ol bai kisim dispela Gutnius baibel i go long Pumakos na bihain wokabaut i go long Pompabus.

Long Pompabus, bai i gat bikipela golden jubili selebresen bilong tingim 50 yia bilong Katolik Sios long Enga. Dispela selebresen bai stat long Novemba 14 i go pinis long Novemba 15 long Pompabus.

Bisop Raich SVD, i givim bikipela tok tenkyu na amamas i go long ol namba wan misinari husat i bringim Gutnius bilong God i go long Enga. Em i tok Gutnius bilong God em i wanpela bik, ita hop tru bilong ol Enga pipel.

"Mipela i hop dispela Gutnius bilong God bai wok strong yet tude long strongim bilip na hop bilong ol pipel bilong Enga," Bisop Raich i tok.

Em i tok em i laik lukim Gutnius bilong God i strongim bilip bilong ol katolik bilong Enga na i mas karim kaikai long nau na bihain taim. Na em i hop na pre long dispela i mas kamap. Namba bilong ol Katolik bilong Enga i kam inap tude i sanap olsem 60,000 olgeta.

ELCPNG yusim K60,000 long helpim ol lain i kisim bagarap long biksan na ais

WENCESLAUS MAGUN
i raitim

Bisop bilong Evangelikel Sios bilong Papua Niugini (ELCPNG) Bisop Sir Getake Gam i tok, ELCPNG i kisim pinis samting olsem K60,000 i kma long Lutheran Wol Federesen, Lutheran Sios long Jemeni, Ostrelia na Amerika. Ol bai yusim dispela mani long helpim ol lain bilong hailens,

Madang na Morobe husat i kisim taim long hevi bilong biksan na ais.

Sir Gam i tok, ELCPNG i hop long kisim moa long K150,000 long ol lain Lutheran Sios long arapela kantri. Wantaim helpim i kam long ol bilipmanmeri bilong Lutheran Sios long PNG yet, ELCPNG i plen nau long kisim ol dispela helpim i go long ol provins olsem Madang, Isten hailens, Simbu, Westen hailens, na Sauten hailens. Sir Gam i tok ol i no inap

long go insait long Enga bikos ol i wetim Gutnius Lutheran Sios long stat mekim samting pastaim na sapos Gutnius Lutheran Sios i singautim ol long helpim ol bai go het na helpim ol.

Em i go het na askim Gavman long helpim ELCPNG bai ol i ken go het na helpim ol pipol long ples we ELCPNG i save olsem ol i painim bikipela bagarap. Pasin ELCPNG i mekim i bihainim wanpela singaut i kam long *Action by*

Churches Together (ACT) wanpela bodi bilong olgeta ol Sios long Wol bilong glasim ol hevi i kamap we El Nino i save kamapim bihain long olgeta tupela o sevenpela krismas.

Ol memba bilong ACT em long Lutheran Wol Federesen, Lutheran Wol Rilif, ELCPNG na Gutnius Lutheran Sios bilong PNG.

Dispela hevi i kamapim biksan long PNG na Latin Amerika, paia long Indonesia, na saiklon win long Banglades.

Pasto Yamerap givim laip long wok sios



• Pasto Bafina Yamerap na meri bilong em.

SANANG ZAZORING
i raitim

Insait long Sios bilong God, wanpela man tasol i no inap paitim bros bilong em long wanem wok em i mekim. Em i no inap daunim arapela. Man i wok long senis bilong taim na wanem yia, dispela man em i mekim pinis hap wok bilong em olsem na em i gat biknem na namba long wok em i mekim pinis. Pasin bilong save em i wankain. Nau level bilong save na laip i go antap. Olsem na ol wokman bilong sios long tude i mas sanap wantaim dispela senis na mekim wok.

Stori na wok sios bilong Pasto Bafinu Yamerap, i go long dispela skel na em i stori long wok sios em i bin mekim na nau em i laik risain long wok. Pasto Yamerap, i kam long ples Fomio insait long Watabung eria bilong Kianu seket insait long Evanselikal Lutheran Sios bilong Simbu distrik.

Pasto Yamerap i bin tren long Ogelbeng Lutheran Seminari long 1968 i go long 1970. Em i greduet na wok pasto moa long 27 yia olgeta. Long ples, em i bin go long Sande skul, brata bilong em i save skulim ol long tok Kate. Bihain em i baim wanpela Kate Gae buk na lainim planti samting insait long dispela buk long toktok bilong God.

Long 1956, Pasto Yamerap i bin skul long tokples Kate long Kamangumato ples na marit. Foapela yia bihain, Pasto Yamerap i go long Kalasa Baibel skul insait long Finschafen distrik inap long tuepal yia. Long dispela taim, em i no klia long Tok bilong God tasol em

i go skul na kisim save long God. Na long 1964, em i statim wok olsem evanselis na kisim strong bilong wok Gutnius.

Long dispela taim, Lutheran Sios bilong Asaroka seket i bin lukautim planti hap bilong sios insait long Goroka eria. Taim Yamerap i pinisim skul long seminari long 1970, em i kam bek na sios i givim em sevenpela kongrigesen insait long Watabung na Monono eria long lukautim na mekim wok insait long en. Stat long 1970 i go 1976, Pasto Yamerap i mekim wok bilong autim Tok na givim sakramen na bungim pinis 2,000 pipel husat i kamap Kristen insait long Evanselikal Lutheran Sios bilong PNG.

Bihain Pasto Yamerap i skruim wok i go insait long Nambayufa eria na em i go bek long asples bilong en na nau em i wok yet i stap. "Em i laik bilong God na em i putim mi long dispela wok na mi pinisim misin bilong mi," Pasto Yamerap i tok. Meri bilong en Akike i tok tu olsem ol i save bungim planti hevi long wok misin bilong ol.

"Mitupela i no save kisim gutpela helpim i kam long ol pipel we mitupela i bin wok long en. Mitupela i painim hat tru long wokim haus na wokim gaden bilong mitupela na mekim arapela samting. Ol papa-graun i save askim mitupela long baim graun na diwai na mituepal i painim hat long kisim kaikai," Misis Akike i tok.

Pasto Yamerap i tenkim God long makim em olsem wanpela wokman bilong em maski em i sin man. Long pinisim wok bilong Pasto Yamerap, em i tok amamas long putim wok em i mekim i go long narapela wan wok bilong en.

Gavman bai rausim CPI, na katim pe bilong ol politisen na pablik seven

WENCESLAUS MAGUN I
raitim

Praim Minista Bill Skate i tokim ol Gavana bilong hailens, ol kaunsel presiden, ol pablik seven, na ol pipel bilong hailens provins olsem gavman bilong em bai rausim Konsuma Prais Indeks (CPI), katim pe bilong ol politisen na pablik seven na yusim dispela mani bilong baim kaikai, marasin na ol arapela samting bilong helpim ol lain i kisim taim long hevi bilong biksan na ais.

Em i tok dispela ol mani i ken go insait long strongim K20 milion i kam long Orogen sia, K10 milion i kam long Poveti Aliviesen Fan antap long K4.3 milion kina gavman bilong em i putim pinis bilong stretim ol hevi bilong biksan na ais long Papua Niugini.

"Mipela bai go moa yet na putim K6 milion long wan wan yia insait long baset i go long wanpela Tras Akaun bilong stretim ol hevi bilong neserel disas-

ta," Mista Skate i tok.

Em i tok dispela em i namba wan taim tru bilong wanpela praim minista long mekim kain pasin olsem. Long hevi bilong lo na oda, Mista Skate i tok em i makim samting olsem K20 milion antap long baset bilong ol plis-man long helpim ol na stretim dispela hevi. Em i go het na tok, gavman bilong em i wet long kisim bekim i kam long ol save-man bilong lo long tokaut sapos ol inap givim wok long ol yut long mekim ol pablik sevis wok. Mista Skate i gat bikipela tingting bilong kisim ol yangpela husat i raun nating long rot, na givim ol wok aninit long dispela progrem.

"Mipela bai salim ol yut long go wok wantaim ol ami o kisim kontrak long penim ol haus, wokim rot, bris na ol arapela infrastruksa sevis na baim ol yut grup bilong ol," Mista Skate i tok.

I luk olsem gavman bilong Mista Skate i gat ol gutpela plen bilong bringim sevis long ol pipel bilong PNG, tasol Mista Skate i wari liklik long wanem, sapos

pasin politik i strong, i luk olsem ol dispela gutpela tingting bilong em bai i no inap karim kaikai. Olsem na em i askim ol pipel bilong Papua Niugini long wok bung wantaim.

"Lusim tingting olsem yu bilong hailens, o papua, o niugini ailans, na mamose na wok bung wantaim," Mista Skate i tok.

Em i ting hevi bilong biksan i kam bilong skulum ol pipel bilong PNG long wok bung wantaim, helpim arapela arapela na bringim ol sevis i go insait long ples o wanem hap yumi stap long em.

Mista Skate i bin go lukim long ai bilong em stret ol hevi ol pipel bilong Sauten Hailens, Enga, Westen Hailens, Simbu na Isten Hailens provins i kisim insait long hevi bilong biksan na ais. Em i bin go wantaim bos bilong Draut na Rilif Imejensi Komiti, Peti Lafanama, Dairekta bilong Disasta na Imejensi, Kenel Eric Ani ol wokman bilong gavman na ol nius man.

PM Skate rausim skul fi, takis long ol kaikai na marasin

Praim Minista Bill Skate i tokim ol lain long ol ples long hailens we biksan na ais i bagarapim olsem em bai askim kabinet long givim tok orait long ol papamama long noken baim skul fi bilong ol pikinini insait long 12-pela mun stat long neks yia.

Mista Skate i tok tu olsem em bai rausim takis long ol kaikai olsem rais na tin pis. Na ol pipel i ken go na baim ol dispela samting long prais i daumbilo inap long mak we ol inap long baim wantaim liklik mani bilong ol.

Taim em i lukim olsem planti lain i dai long hevi bilong ol kainkain sik na sua ol i kisim na dai isi isi bikos i nogat marasin long helpim ol, Mista Skate i tok em bai rausim tu fi bilong baim marasin. Na dispela i soim

olsem taim ol sikman i sik ol i ken go long haus sik na kisim marasin fri.

Dispela ol tingting Mista Skate i kamapim i sut i go stret long ol ples we biksan na ais i bagarapim na i no long ol arapela hap bilong kantri we i nogat hevi bilong biksan na ais.

Mista Sket i mekim ol dispela tok-tok taim em i harim na lukim long ai bilong em stret olsem ol papamama i stapim skul fi mani long dispela taim bikos ol i nogat arapela we bilong mekim mani. Taim ol i mekim olsem planti moa pipel i dai long hangre. Mista Skate i wari tru long lukim ol pipel i stap hangre bikos i nogat wara na kaikai. Olsem na em i tokim ol long yusim wanem mani ol i haitim i stap bilong baim kaikai long yusim long dispela taim bilong hevi.

Nogat marasin long planti haus sik insait long hailens

Insait long lukluk raun bilong PM Bill Skate long ol hailens provins long las wik, em i painim aut olsem planti ol haus sik i nogat marasin. Ol i sot long marasin long las yia yet. Na nau taim biksan na ais i pundaun na kamapim ol kainkain sik, ol helt woka i nogat rot moa bilong helpim ol.

Long Pori insait long Sauten Hailens, Mista Skate i lukim planti ol skul pikinini na ol lapun i gat bikipela sua ol i kolim long tropikel alsa. Dispela ol bikipela sua i save kaikai mit bilong ol man i go insait tru na brukim bun na ol man i save dai nau i go bikipela tru long hap bilong Pori.

Dokta boi bilong Pori haus sik, Mondobia Dieba i tokim Wantok olsem stat long mun Epril long las yia i kam inap long las wik taim Praim Minista Skate i go lukim ol, ol i nogat marasin. Em i tok sapos ol i no kisim kwik saplai bilong marasin, planti man, meri na pikinini bai dai long sik.

Pori i gat wanpela level foa komyuniti skul tu. Tisa Mary Osman wanpela asples meri yet i tokim Mista Skate olsem hevi bilong biksan i sotim tru ol kaikai na dispela i stapim ol pikinini long go kisim gutpela skul.

"Sampela pikinini i save kam skul inap ten kilok na ol i save askim mipela long go long ples bikos ol i hangre. Sampela i strong liklik i save

skul i go inap long 12 kilok," Misis Osman i tok.

Em i tok dispela pasin i bagarapim tru pasin bilong ol pikinini long kisim gutpela save.

Wantok i glasim ol wankain hevi long ol arapela hailens provins, Mista Skate wantaim deleligesen bilong em i go raun lukluk.

Long Gumine, tupela helt woka, Mis Francisca Gabee na Grace Sine i tokim Wantok olsem stat long 7 Julai 1996 i kam inap long dispela mun, ol i sot tru long ol marasin. Ripot bilong ol sik i go bikipela tru long dispela taim em long disenti o pekpek wara, konjangsen o ai sik, Pneumonia, sik bik bel na bun nating, ol i kolim long malnutrisen, sik malaria na sid bilong mekim pasin pamuk o STD.

Wanem ol liklik marasin ol pipel i kisim i no inap helpim ol sikman bikos, nogat kaikai bilong hepim ol marasin long pait na kilim ol binatang nogut bilong kilim ol sik insait long bodi.

Taim Mis Gabee i tokim Mista Skate long ol dispela wari, em i wari long ol pipel bilong em na i kra. Mista Skate tu i sori tru long ol pipel bilong Gumine na PNG na i kra long ol pipel. Em i askim ol pipel long sanap strong, na beten bai ren i kam.

PM Skate bai givim wanpela ministri i go long Enga

PM Skate i promisim Gavana bilong Enga, Peter Ipatas, ol faivpela lida bilong Enga, ol kaunsel presiden, ol pablik seven na samting olsem 3000 pipel bilong Enga, long Wabag las wik Tunde Novemba 4, olsem em bai givim wanpela ministri i go long wanpela mamba bilong Enga.

"Mi bai makim wanpela man Enga insait long gavman bilong mi insait long wan o tu wik taim. Olsem bai i gat maus bilong ol Enga," Mista Skate i tok.

Mista Skate i mekim dispela tok long Wabag insait long wan wik lukluk raun bilong em long ol hailens provins long lukim na harim stret wari bilong ol pipel husat i karim hevi bilong biksan na ais.

Em i tok tu olsem, em i gat bikipela amamas long ol lida bilong hailens bikos long strong bilong ol em i kamap praim minista. Mista Skate i tok em i bin gat laik long kamap namba tu praim minista na minista bilong faimens tasol ol lida bilong hailens i tok strong olsem em i mas kamap praim minista.

Olsem praim minista inap long foapela mun nau, Mista Skate i luk-save long planti ol hevi ol arapela gavman i kamapim na lusim i stap inap long 22 yia olgeta. Em i luk save long hevi bilong lo na oda, nogat wok, nogat gutpela sevis bilong rot, bis, ples balus, skul, haus sik, wara saplai wok didiman na planti ol arapela sevis. Antap long dispela em hevi bilong biksan na ais. Em i tok planti taim em i

save askim God watpo em i kamap praim minista long dispela taim. Tasol i luk olsem God i makim em long taim nogut bilong em i ken kisim ol pipel bilong Papua Niugini i go fri long ol hevi nau yet ol i bungim.

Wanpela bilong ol bikipela hevi tru i stap long kantru tude em hevi bilong ol polisi o lo. Mista Skate i tok em bai glasim olgeta polisi bilong PNG na traime senisim wanem ol polisi i no gutpela long wok developmen bilong kantri.

Em i tok tu olsem kantri bilong yumi i mas i gat ol lida husat i bihainim tok tru na mekim pasin i tru. Long tingting bilong Mista Skate, God wanpela tasol em i praim minista bilong kantri. Na Mista Skate em i mekim wok olsem wanpela eksekutiv opisa tasol.

Mista Skate i askim tu ol pipel bilong PNG long beten long ren. Em i tok, God wanpela tasol inap salim ren sapos olgeta pipel bilong PNG i brukim skru na beten. Em i bilip ol pipel i beten long nupela gavman bilong em, na i kamapim dispela gavman. Na olsem tasol ol pipel i mas brukim skru na beten long ren.

"Yumi mas i gat ol lida husat i lukluk i go long wanem samting ol bai mekim long bringim gutpela developmen i kam long PNG long bihainim taim," Mista Skate i tok.

Em i askim tu ol pipel bilong Enga long mekim ol senis na soim ol dispela senis long Gavana Ipatas bai Mista Ipatas i ken yusim ol dispela senis long developim PNG.

Paia i kukim olgeta haus long Ababe na Hifompa ples



□ Tupela meri bilong Ababe ples i sindaun aninit long diwai na kra long ples bilong ol paia i kukim pinis.

Praim Minista Bill Skate i givim bikipela tok sori bilong em i go long ol pipel bilong Ababe na Hifompa ples insait long Goroka long Isten Hailens provins bihain long paia i kukim moa long 80 haus na lusim moa long 385 famili i nogat haus.

Mista Skate i glasim hevi

bilong ol pipel bilong dispela ol ples insait long wan wik lukluk raun bilong em long faivpela hailens provins long glasim bagarap biksan na ais i kamapim.

Gavana bilong Isten Hailens, Peti Lafanama i tok sori tu long ol pikinini, na ol mama na papa. Em i tok nau

yet ol i no painim as bilong dispela hevi. Tasol gavman bilong em i givim pinis samting olsem 25 bek rais, K1000 bilong baim ol sel long mekim haus na em i tokim ol pipel bilong dispela ol ples olsem gavman bilong em bai painim sampela moa rot bilong helpim ol.

Gavana Ipatas i tok Enga em ples bilong bel isi na amamas

Plantu taim ol pipel i save tok Enga em i ples bilong ol mah nogut. "Noken go long Enga bikos ol man bai kilim yu." Tasol Gavana bilong Enga Peter Ipatas i tok dispela em i no tru. Em i tok, Enga em i wanpela namba wan provins long PNG. Na em bai mekim ol pipel bilong PNG na long arapela kantri i luksave olsem i gat ol gutpela manmeri na pikinini long Enga.

Dispela toktok bilong Mista Ipatas i bihainim komplek bilong

sampela kampani husat i no laikim ol wokman bilong ol i slip long Enga na mekim wok tasol ol i mas slip long arapela provins na fta' long balus o helikopta i go long wok.

"Sapos Praim Minista Bill Skate inap kam na slip long Enga, bilong wanem ol arapela lain i no inap slip long Enga," Mista Ipatas i tok.

Em i tok ol Enga pipel i laik senis. Ol i laik bihainim lo. Ol i laik lukim Enga i develop. Olsem

na kain ol kampani olsem Plesa Niugini i noken yusim ol niuspepa, televisen na radio long pentim rabis piksa bilong Enga.

"Husat man i laik skelim Enga i mas kam na stap long Enga bipo long em i mekim tok," Mista Ipatas i tok.

Em i tok nau long dispela taim, Enga i stap isi na i gat laik long go het. Mista Ipatas i tok, Enga provinsel gavman i redi long bringim ol wok developmen i go insait long provins.

Mosbi So na PNG Made Ted Fea bai bung wantaim

PNG MADE Tred Fea long dispela yia, 1997 i bin kamap gut tru bikos long gutpela sapot na wok bung wantaim bilong olgeta lain long mekim kamap dispela samting long las wiken long Mosbi.

Tasol long neks yia, bai PNG Made Tred Fea i bikpela moa bikos ol bai bungim wantaim bikpela Mosbi So. Na ol komiti i ting dispela bai bikpela samting tru long neks yia na em i gutpela tingting long bungim dispela so bilong ol bisnis wantaim Mosbi So.

Long las wiken planti bisnis na kampani i soim ol kain kain prodak o ol samting ol i save wokim olsem bisnis bilong ol. Planti kampani tu i kam long arapela provins olsem Lae, Madang na arapela moa. Planti manmeri husat i save wokim ol samting long han bilong ol yet na salim i gat sans tu long soim ol samting bilong ol long dispela Tred Fea long las wiken.

Ol manmeri bilong wokim ol samting olsem nekles, kaving, pulpul na arapela moa i putim aut ol dispela samting na planti manmeri i baim long ol.

Dispela Tred Fea em taim bilong ol kampani na bisnis lain na ol liklik bisnis manmeri long soim aut ol samting bilong ol. Na tu em sans bilong ol bisnis long bungim ol yet na toktok moa long ol kain wok bilong ol we ol i ken helpim narapela na sevim taim na mani bilong narapela long mekim ol bikpela oda i kam long ovasis.

Wantok i bin toktok wantaim Sels Menesa bilong FRG Clothing bilong Madang Terry Steven long wok



• Sapos yu no draiv gut, bai yu inap bungim kain birua olsem. Dispela em wanpela piksa tasol ol plis i soim ol birua bilong ka. Dispela em long PNG Made Trade Fair las wiken.

bilong ol. Mista Steven i tok FRG Clothing em kampani we i kamapna stap long PNG stret na em i save samapim ol kolos. Ol i save samapim ol kolos olsem skul yunifom, ol kampani yunifom na planti arapela kain kain stail trausis, siot na kolos bilong ol manmeri i ken baim na werim.

Planti bikpela kampani long PNG i save laik baim ol kampani yunifom bilong ol long ovasis. Ol i save mekim ol bikpela oda i kam long ovasis. Tasol Mista Steven i tok ol dispela bikpela kampani i mas save

olsem mipela i gat ol kain kampani bilong samapim ol yunifom i stap long kantri. Na ol i mas baim ol yunifom bilong ol hia long PNG yet.

Na dispela inap helpim ol kampani long sevim bikpela mani long lus bikos ol bai baim long isi prais hia yet. Dispela tu inap helpim ol lokol kampani long kamapim moa wok na givim wok long planti yangpela manmeri husat i raun nabaut na painim wok raun, em i tok.

Praim Minista bilong Papua Niugini Bill Skate i bin opim dispela

bikpela de bilong PNG Made Tred Fea long Fraide nait.

Ol kampani i amamas long soim ol samting bilong ol na mekim bisnis wantaim arapela bisnis. Tasol ol manmeri bilong go raun na lukluk long Tred Fea i no amamas tumas long ol samting ol i laik baim. Ol i tok prais bilong ol samting i antap tumas na i kos bikpela mani tumas. Tasol ol i holim pas dispela tingting bilong ol bikos Tred Fea i no bilong baim ol samting. Em i taim bilong soim tasol.

Yusim gut plis welfea divisen

BUSTIN ANZU i raitim

SIKSTEN-PELA polisman na meri i bin bung long Goroka las wik long bung bilong welfe bilong polis fos insait long kantri. Tu dispela i makim namba faiv bung.

Dispela bung i bin kamap long Nesenol Spots Institut (NSI). Hat tok bilong dispela bung em long "kisim gut infomesen na yusim long kamapim gutpela welfe sevis insait long polis komuniti." Aninit long dispela hat tok i gat arapela samting tu em ol i bin tok-tok. Problem bilong haus bilong ol polisman na meri, i no gat disiplin insait long polis pos na tu taim long wanpela bikpela sik ol i kolim aide/hiv.

Welfe bilong polis fos em wanpela bikpela samting we polis yet i mas kamapim na lukautim long painim gutpela sindaun. Long rot bilong kamapim gutpela sindaun, welfe divisen bilong polis fos i mas kisim gut impomesen na kirapim gutpela polis komuniti insait long kantri.

Oipela Polis Saplin na nau gavana bilong Simbu Fr. Lui Ambane husait i bin kam stap na pasim dispela kibung i mekim dispela ol toktok. Em i tok nau yet planti hevi i stap insait long polis komuniti long oigeta hap na ol polisman na meri i no save wokim wok bilong ol gut. Em i tok. "Sapos i no gat hevi insait long polis komuniti, wok bilong polis fos bai smat stret. Ol bai amamas long wok na sevim komuniti. Nau yet planti hevi i stap yet na dispela i mekim wok bilong ol polis i hat stret.

Aninit long dispela hat tok em i tok olsem welfe divisen i mas painim rot long kisim ol stori autsait long polis fos na stretim sindaun insait long polis eria. Em i tok yumi noken wet long yumi yet long stretim sindaun tasol mas lukluk autsait long kisim halivim long etapim hevi stap insait.

Long taim bilong pasim kibung em i tok i gat ol narapela hevi tu i stap olsem problem bilong haus bilong ol plismanmeri, i no gat disiplin insait. Em i tok dispela em sampela bikpela hevi namel long narapela hevi i save stap. Em i tok olsem em yet i bin stap wanpela polisman bipo na em i save long ol dispela hevi. Em i tok i no gat rot bilong stopim tasol i gat wai bilong daunim ol dispela hevi.

Em tu i toktok long dispela sik nogut, aide i wok strong na kilim planti man na meri insait long kantri na wol tu. Em i tok olsem yumi mas abrusim dispela sik.

Wankain kos bai kamap long Simbu long neks yia. Dispela kibung i save kamap long oigeta yia insait long wanwan provins. Dispela em long kisim sampela gutpela tingting long kamapim gutpela sindaun insait long polis komuniti long kantri.

Praim minista....opim poket na haus bilong yu pastaim

BAIBEL i tok olsem yumi noken harim tasol o toktok tasol. Yumi mas mekim. Nau long taim bilong hevi, dispela toktok i mas karim kaikai.

Olsem nau Praim minista i wok long singaut olsem yumi mas helpim ol turangu husait i kisim taim long bikpela drai i kamap nau. Mi wanbel long dispela singaut bilong em. Tasol em yet i mas bihainim dispela singaut bilong em wantaim sampela wok...sampela eksen.

Sapos em yet i lukluk pastaim long poket na haus bilong en, em bai lukim olsem em inap long kisim planti moni long dispela tupela hap long helpim ol pipel husait i kisim taim nogut nau.

Pastaim yumi lukluk long ol kainkain alawens em Praim minista wantaim ol lain minista na ol memba i save kisim. Olsem, ol sitin alawens na trenspot alawens na ol arapela liklik alawens olsem.

Sapos ol i putim ol dispela mani long helpim ol pipel husait i kisim taim nogut nau, em bai inapim wan milien kina. Na sapos olgeta fo'nait bilong ol, ol i rausim K100 na putim long akaun long helpim ol turangu ya, em bai inap long narapela 1 0 2 millen kina.

Gavman i yusim bikpela mani long baim ol vais minista, tasol mipela i no klia long wok bilong ol. Ol i nogat wok ya. Rausim olgeta vais minista na yusim mani yupela i baim ol nau long helpim ol lain husait i bungim hevi nau.

Yumi mas lukluk tu long pei bilong ol bikman bilong ol kampani em gavman i bos long em olsem, PTC, Elcom, Harbours Bot na ol arapela olsem. Pei na ol alawens bilong ol dispela lain i bikpela tumas.

Rausim sampela pei bilong ol dispela lain na baim kaikai bilong ol lain husait i kisim hevi long taim drai nau.

Yes. Em i gutpela olsem Praim Minista i singaut long ol narapela manmeri long Papua Niugini long helpim ol turangu husait i bungim taim nogut nau. Na mi askim olgeta pipel bilong Papua Niugini long bihainim singaut bilong Mista Skate.

Tasol pastaim, em i mas soim yumi olsem, poket bilong em na haus bilong em i bihainim singaut bilong em. Bihainim ol pipel bilong Papua Niugini i ken bihainim em.



Tude i makim de em gavman bilong Nigeria, wanpela kantri long Afrika, i bin kilim Ken Saro-wiwa.

Ken Saro-wiwa em wanpela man bilong Ogoni provins long Nigeria yet husait i bin egensim Shell kamapani, bikos wok bilong Shell i bagarapim graun na ol pipel bilong em. Gavman i no bin laikim dispela na kilim Mista Saro-wiwa.

Tasol Shell i wok yet long Ogoni provins na i no kea long ol bagarap ol i kamapim long hap.

Nau yumi lukim ol bikpela maining kampani i egensim tingting bilong ol lida bilong yumi long senisim sampela samting insait long mainim indastri, em ol i lukim i no stret.

Dispela i no namba wan taim. Bipo mipela lukim olsem, BHP, wanpela kampani bilong Australia, husait i go pas long ol wok i kamap nau long Ok Tedi main long Westen provins, i raitim sampela lo bilong yumi. Olsem mipela yet i no save long mekim dispela wok.

Olgeta de long niuspepa nau i gat dispela toktok bilong ol maining kampani i egensim tingting bilong ol lida bilong yumi. Bai yumi larim dispela i go het o wanem?

Dispela pasin i mas stop nau. Mipela i no votim ol maninin kampani long makim maus bilong mipela long palamen.

Ol maining kampani i no kam long kantri long helpim ol asples. Ol i kam long mekim bikpela winmani na ranawe i go bek long ples bilong ol.

Olem na mi askim olgeta memba bilong palamen long sapotim dispela bil na mekim em i kamap lo.

Sapos nogat, dispela bai soim olsem yupela ol memba i mas stap pinis long poket bilong ol maining kampani.

Betde Griting Eric Toto Niles



i winim 5 -pela krismas long Trinde Novemba 12.

Hepi betde Toto na God bles! Rhett, Fio, Loz, Mims, Yosh, Jessica na papa mama long Bittern Pl, Gordons na ol bubu na auntie uncle long Mengar na Florida.

BELATED B/DAY GREETINGS TO:

CATH



CATHARINE


CATHERINE

CATHY

POLANGOU - TAUREKA - 10/11/97. B/day wishes from the Polangous - (5 Mile), Moses & Darnberith (Rainbow), Freddie & Tim (Erima), workmates (Word).

Special hugs from your daughter Nathalie, hubby Dickla & Nikuma. (Haus lain).

PS. No party this year... wrong time!



NATIONAL CAPITAL DISTRICT COMMISSION

Nius i kam long Siti Hol



TAKU GIVIM SAPOT LONG TEKNIKEL SKUL



• NCD Gavana Hon. Philip Taku

Gavana bilong Nesenel Kapitel Distrik, Philip Taku, i tokaut pinis olsem gavman bilong em bai givim moa sapot long wok bilong Edukesen, Helt na Lo na Oda. Em i tokaut tu olsem gavman bilong em i laik lukim olsem ol teknikel skul long Papua Niugini i trenim ol nambawan saveman na meri. Gavana Taku i mekim dispela tok-tok long namba 50 Aniveseri o kris-mas bilong Mosbi Teknikel Koles. Em i tok "koles i save kisim bikipela namba bilong studen long ekstensen kos program we ol Maining na Petroleum indastri i save go pas long sponsarim". Olsem na Mosbi Teknikel Koles i namba tu bikipela level bilong teknikel trenim skul we kantri i

save kisim planti teknikel saveman na meri long en. Em i tok Komisen i save long sampela hevi em koles save bungim. "Gavman na ol praivet bisnis kampani i nidim ol top saveman long kain skul olsem Mosbi Teknikel Koles. Tasol skul i nogat ol stret-pela wok samting olsem masin long bungim ol senis bilong tude, we ol studen i ken yusim na kisim gut save", Mista Taku i tok. Em i tok dispela em we olgeta pipel, ol bisnis kampani, na gavman i mas wok bung na helpim kain skul olsem Mosbi Teknikel Koles. Mista Taku i tok Nesenel Kapitel Distrik Komisen i gat bikipela tingting long skulim ol manmeri bilong kantri long kisim moa save na developim siti na kantri long bihain taim. Olsem na i no longtaim, Komisen bai putim moa mani i go insait long mekim dispela tingting i kamap tru. Em i askim tu Nesenel Gavman long givim moa luksave long teknikel skul olsem Mosbi Teknikel Koles. Na tok moa olsem PNG i nidim moa saveman na meri long sait bilong teknikel wok, em koles i save skulim. Koles i tokaut long sampela hevi

bilong en olsem eria ol save stapim ol ka ausait long het opis i mas gat sampela senis, koles save sot long wara, na tu i nogat inap samting we ol studen i ken yusim long pilai spot. Mista Taku i tok em bai karim ol dispela hevi i go long menesmen na komisen. Na bai mekim tingting long 1998 NCDC baset. Mista Taku i tok Komisen i ken kisim sapot long sait bilong man long ausait long mekim sampela wok. Gavana i tokaut tu long sapot bilong gavman bilong em long wok bilong skulim o givim save long moa pikinini insait long Nesenel Kapitel Distrik. Em i tok Komisen i givim K4 milien. Long dispela mani, em i tok K2.7 milien i bilong baim skul fi bilong ol skul pikinini, na K1.3 milien i bilong mekim ol wok bilong skul. "Long Jun gavman bilong mi i makim K1.5 milien long sanapim 112 Dabol Klasrum bilong ol Elementeri Skul. "Mipela bai go het long givim dispela sapot long yia 1998," em i tok. Nesenel Kapitel Distrik Komisen i baim pinis K2 milien bilong 34,000 studen olsem skul fi. Dispela em ol studen bilong 50 skul olgeta insait long NCD.

OL BISNIS MAS KUKIM NA SALIM GUT KAIKAI

WANPELA kos we i skulim ol pipel, husat i wok long bisnis bilong kukim na salim kaikai long pablik i bin kamap long las wik. Ol manmeri insait long kos i bin kisim toktok long mekim gut wok bilong ol.



wok long redim kuk-kaikai na salim i mas save long ol dispela samting", Pater Koieba i tok.

Dispela toktok i kam long Nesenel Kapitel Distrik Komisina, Pater Caedmon Koieba, husat i opim dispela woksop long Tunde Novemba 5. Pater Koieba i bin makim Gavana Philip Taku. Na tok olsem dispela em i wanpela bikipela woksop. Bikos woksop i skulim ol manmeri long sefti bilong kaikai, we i bikipela samting.

"Ol kaikai mipela kaikai i go insait long bodi bilong mipela. Olsem na em i bikipela samting long lukim olsem kaikai i klin, na mas abrusim ol samting we bai bagarapim dispela trupela tes o swit bilong en. we bai gutpela long kaikai", Pater Koieba i tok. Em i tok kaikai bai bagarap sapos taim mipela i no redim gut, i no lukautim gut, i no redim gut. na i no givim gut long pablik husat i baim.

Pater Koieba i tok long sampela yia i go pinis. NCDC wantaim sapot bilong Nesenel Helt Dipatmen i bin wokhat long stapim sif tafoid insait long siti, we i kamap long pasin bilong pipel kukim rabis kaikai na salim, o ol pipel i no kaikai gutpela kaikai.

"Wok bilong yupela olsem ol menesa na supevaaisa em long lukim olsem olgeta wokman meri i redim aninit long menesmen o lukaut bilong yupela i save long ol namba wan helt rul. we ol mas bihainim oltaim.

Tude moa pipel save kaikai long ol restoren o bikipela haus kaikai, na ol stua we isave kukim na salim kaikai. Long olgeta yia. i gat bikipela bilip olsem kain pasin bai kamap bikipela. Olsem na ol manmeri husat i kukim na salim kaikai mas oltaim lukim olsem ol i kuk gut.

"Pasin bilong kaikai buai, spet, smok, kus, na i no katim longpela finga na kuk o salim kaikai i no gutpela long helt bilong ol kastoma. Ol pipel husat i

Dispela tripela de woksop i bungim 30 pipel olgeta. Dispela em ol pipel husat i wok olsem ol menesa na supevaaisa bilong ol bisnis we i save kukim na salim kaikai long pablik.

KEMPEN BILONG KLINIM SITI STAT PINIS

Kempen bilong klinim siti em ol kolim long tok inglis olsem "City Wide Clean-Up Campaign" em Nesenel Kapitek Distrik Komisen i bin statim long mun Septemba i wok long go het gut.



Ol kontrak na NCDC wokman i wokhat long Air Niugini Viles long 6 Mail

Dispela kempen o wok bilong klinim siti i save long olgeta yia, we i nogat fi bilong en. Olsem na askim i go nau long ol pipel bilong Mosbi long stap insait na sapotim dispela kempen.

Insait long dispela kempen, ol kontrak wokman meri wantaim ol opisa bilong Komisen bai rausim olgeta kainkain rabis olsem olpela masin bilong wasim kios laplap, bokis ais, na ol olpela ka long eria bilong yu. Olsem mipela tok pinis, dispela em fri na mipela i no inap sasim yu.

long Badili, Koki, Ela Bis, na Daun Taun eria.

Long Novemba 24 i go inap long namba 28 de, dispela kempen bai kamap long Hanuabada, Elevala, Kanudi, Tatana, Na long Desemba 1 i go inap long namba 5 de, kempen bai kamap long Kila Kila, Pari, Sabama, Kaugere, Taikone na Vabukori. Na bai pinis long Hos Kem, Konedobu, na Gabutu long Desemba 8 i go inap long 12.

Dispela kempen i bin stat long Septemba 22 long Wod 12, we i karamapim ol eria olsem Bomana, 8 na 9 Mail eria. Kempen bai go nau

LUKAUTIM GUT BODI

1. Wasim han bilong yu gut long sop na wara bihan yu kaikai o dring.
2. Wasim han bilong yu gut long sop na wara bihain yu stretim kaikai.
3. Wasim han bilong yu wantaim sop na wara taim yu pinis long toilet o klinim pekpek bilong pikinini.
4. Wasim skin na klos bilong yu gut wantaim sop na wara olgeta de.
5. Bolim dring wara sapos wara i no long siti saplai.
6. Wasim ol prut na kaikai bilong long gadan long klin wara bihain long yu kukim na kaikai.
7. Putim ol dis, sospen na piet long hap ples we ol kokros na binatang nogut i no inap holim.
8. Haitim ol kaikai long ol binatang na rat.
9. Susu bilong mama i gutpela moa long susu bilong insait long botol.
10. Wasim o bolim ol sel o kina yu kisim long nambis kostu long siti.

LUKAUTIM GUT PLES

1. Klinim gut toilet bilong yu olgeta jim.
2. Brumim o klinim haus bilong yu. Olgeta de.
3. Klinim arere long haus na puum ol rabis long hap ples we ol rat na lang i no go na hait insait.
4. Yusim klin wara long kuk o waswas olgeta de.
5. Tromoi pipia bilong beibi olsem pepa napkin long rat ples.
6. Sut bilong haus sik o marasin bai i no inap helpim yu sapos ples bilong yu i no klin tumas.

POSITION VACANT

SECURITY MANAGER (GRADE 13) - K17,700 p.a.

National Capital District Commission is seeking a well experienced, qualified, motivated and competent Security Manager to lead the Security Section. This position reports directly to the Deputy City Administration (Finance & Administration) and plays a significant role in ensuring a safe and secure working environment for the employees within the Commission's premises and establishments. The incumbent will manage, control and direct a wide range of security activities including all firms contracted to the Commission.

QUALIFICATION AND EXPERIENCES

The applicant must possess highly developed interpersonal and communication skills, a broad understanding of security and investigation functions and the ability to work under pressure. Must have satisfactorily completed year twelve (12) education and/or some other relevant higher qualifications to university or discipline force level. Ten (10) years proven and sound experience in managerial/supervisory role in a security environment.

The position is restricted to Nationals only.

Written applications with curriculum vitae, copies of certificates and the names and contacts of three (3) recent referees to be addressed to

The Personnel Manager
National Capital District Commission
P O Box 7270
BOROKO
National Capital District

Further details may be obtained by contacting the Recruitment Office on telephone 324 0727 or 324 0728. Applications close at 4:06 pm on 28 November, 1997.

The National Capital District Commission is committed to equal opportunity in employment. Selection will be on the basis of merit.

NCDC Pablik Afeas Divisen i autim dispela tok

WAN SOLWARA NIUS

Namba 3 bikpela stil pasin kamap long Fiji

FIJI : Ol plisman long Fiji i painim nau sampela stilman husat i stilim moa long K100,000 na ranawe long wanpela stil ka. Dispela bikpela stil pasin i bin kamap long biksiti Suva long dispela wik Mande. Ripot i tok ol stilman i yusim strongpela samting bilong pait olsem gan. Na go insait long Rajendra Prasad supamakot na stilim ol mani. Bihain ol ranawe long stil ka, em i bin wetim ol long ausait. Ol lusim dispela stil ka long Samabula Not na ranawe.

Plis i no holim yet wanpela bilong ol dispela lain. Tasol bikbos bilong ol plis insait long kantri, Plis Komisina Isikia Savua i kisim pinis wanpela ful ripot long dispela stil pasin. Bikos i gat save olsem ol stilman i yusim gan we i wankain olsem dispela em ol soldia bilong Fiji Militeri Fos save yusim. Dispela em i namba tri bikpela stil pasin long kamap long siti, insait long tupela wik tasol.

Helt minista laik rausim smok na bia kampani

SAMOA : Helt Minista Telefoni Retzlaff i tok em bai askim gavman long salim sia em (gavman) i gat wantaim tupela bikpela kampani insait long kantri. Dispela em kampani bilong mekim smok, em ol i kolim Rothmans, na narapela kampani bilong mekim na salim bia na ol arapela strongpela dring, em ol i kolim Samoa Breweries.

Minista i laik mekim dispela bikos em ting olsem em i no gutpela long Helt Dipatmen i traim hat long skulim ol manmeri long birua bilong dring bia na smok, na long sem taim gavman i gat bikpela sia long dispela tupela kampani husat i mekim smok na bia. Minista i tok klostu bai em putim dispela askim i go long gavman. Bikos nau yet em namba bilong ol manmeri long Samoa husat i save smok na dring bia i go antap tru. Dispela yia long mun Jun tasol, gavman i apim prais bilong smok na bia wantaim ol arapela strongpela dring. Astingting bilong dispela muv em long mekim hat long ol yangpela manmeri long baim na smok o dring.

Bikbos bilong Mama Benk no amamas long ol timba kampani

SOLOMON AILANS: Bikbos bilong Mama Benk bilong Solomon Ailan, Rick Hou, i tok ol timba kampani long kantri i nogat as tru long stap salim timba bilong ol. Em i tok ol timba kampani i ken mekim profit mani yet, maski prais bilong timba i go daun long ovasis maket. Nau yet ol timba kampani i hipim tasol ol timba na i no salim. Kos bilong ol dispela timba i winim K20 milien. mekim na gavman i pret olsem sapos ol timba ya i stap yet, nogat gutpela mani bai kam insait long kantri long sait bilong takis.

Tasol bikbos bilong mama benk i tok ol timba kampani mas save olsem prais bilong timba i no inap long stap long wankain mak long olgeta taim. Olsem na ol i mas sevim planti mani ol save kisim long helpim ol long dispela taim nogut. Em i tok Vanuatu, Papua Niugini na Solomon Ailans em olgeta i kisim taim long hevi bilong prais bilong timba i go daun. Em i tok as bilong dispela em long Indonesia na Malasia, husat save katim planti wankain timba i salim moa timba tru long Esia maket, em mipela tu save salim timba. Olsem na nogat planti kantri long Esia i laik baim timba long dispela taim.

Win bagarapim Kuk Ailan

KUK AILAN : Ol helpim wokman meri long Kuk Ailan i painim nau 20 pipel husat i lus yet bihain long bikpela strongpela win i kamap long ailan long las wiken. Nem bilong dispela win em ol i kolim 'Cyclone Martin'. Ripot i tok win ya i ron long spit bilong 160 kilomita long wanpela aua. Na apim solwara i go antap long mak bilong 4 mita olgeta, we i bagarapim planti samting olsem ol haus. Ripot i tok i gat bilip i stap yet long painim ol dispela pipel husat i bin lus long dispela birua. Bikos save i stap olsem strongpela solwara i mas karim ol i go lusim long ol liklik ailan. Tasol nau yet em ol atoriti i tokaut olsem tripela pipel em ol i makim olsem ol dai pinis. Na narapela 14 pipel em balus i karim ol i go long Rarotonga long kisim sut marasin.

Ripot i tok namel long ol lain i lus em wanpela nes meri tasol bilong ples Tauhunu, we i bin kisim bikpela bagarap stret. Long ples Tukao klostu long Tauhunu em 4-pela haus tasol i sarap yet. Olgeta i pundaun. Na ol manmeri na pikinini i kisim bikpela bagarap stret. Na mas lukim ol dokta long sekim ol na givim sut marasin. Wanpela mausman bilong disasta komiti i tok taim ol i tokot wantaim Manihiki, ol i painimaut olsem 13 bilong ol pipel husat i bin lus em ol i painim pinis. - PACNEWS

Iran i bikhet yet long larim Yunaited Nesens grup i sekim ol samting bilong pait

IRAQ, MIDEL IS: Iraq, em dispela kantri long Midel Is we i save het strong tumas na bikpela pait i save kamap long rijon.

Na i no bilong wanem kantri ya i gat nem long het strong pasin. Dispela em bikos presiden bilong iraq, Saddam Hussein em i wanpela hetstrong man. I hat tru long senisim tingting bilong em sapos em i no wanbel long wanpela samting long nesenel na intanesenel level. Olsem na planti ol pait we i save kamap long Pesian Galp insait long Midel Is em i sut long Iraq we i save statim ol pait. Sevenpela krismas i go pinis, Iraq ami i bin mas i go long Kuwait, kanmtri klostu long em na kamapim pait long hap. Pastaim bikpela pait i bin kamap namel long Iraq na Iran bikos long dispela hetstrong pasin bilong Presiden Hussein. Na tu Iraq em i wanpela pawaful na strongpela kantri bikos em i wanpela ris kantri long wanem em i gat planti wel (oil) em i save salim long wol. Iraq em i wanpela kantri we i save wokim na salim ol strongpela samting bilong pait. Ol samting ol i yusim long nuklia wo na ol arapela pait na hevi.

Stat long taim Rasia Ripablik i bruk daun na resis long nuklia na kol wol namel long Rasia na Amerika i pinis long 1990, Amerika na ol arapela pawaful na bikpela kantri long wol i stapim Rasia na ol arapela kantri we i save



Saddam Hussein, presiden bilong Iraq

mekim ol samting pait long Nesens bilong go pas long noken go het na mekim moa wok bilong was olsem dispela ol dispela samting. Ol i makim wok i kamap na ol kantri we i mekim ol samting bilong pait

na ol i hipim ol i stap tu i mas rausim na kukim ol dispela samting.

Orait, Iran i bikhet yet. Long dispela wik, ol ripot i tokaut olsem Presiden Saddam Hussein i no laik larim wanpela savelain grup bilong Yunaitet Nesens i go insait long kantri na sekim ol militeri plent instelesen we i save kipim ol samting bilong pait long en. Grup ya i go insait long Iraq tupela wik i go pinis tasol long las Trinde, Iraqi i stapim grup long go hetim wok bilong ol bikos ol i painimaut olsem sampela Amerika lain i stap insait long dispela grup. Na Iraq i no laikim ol Amerika lain long go insait long kantri. Long dispela wik, sampela wepons ekspet bilong Amerika o ol saveman long ol samting bilong pait i laik go long iraq. Tasol Iraq i strong yet long fespela grup i lusim kantri na em i no inap long kisim ol Amerika lain tu. Na em i sanap strong long dispela disisen bilong em.

Bikos Iraq i hetstrong na nau planti lain long Amerika i singaut strong long tekim militeri eksen long en (Iraq). Yunaitet Nesens i laik salim wanpela grup bilong em i go long Iraq bilong sindaun tok-tok wantaim presiden na ol bikman long hap tasol Iraq i no givim yet wanpela bekim long dispela.

Sapos olsem wanem, Amerika na Briten bai i putim ol tambu long wokabout bilong iraq long outsait wol.

SBDC helpim yu wantaim liklik wok bisnis

I KAM LONG LAS WIK

PASIN NA LAIPSTAIL YU MAS GAT LONG KAMAP GUTPELA BISNISMAN O MERI

Dispela wik mipela bai toktok long pasin na laipstail bilong ol pipel husat i statim nupela bisnis, na i ron gut tru. Olsem na yu mas skelim yu yet na lukim sapos yu wanpela bilong ol dispela kain manmeri, bipo yu ken mekim tingting long stayim bisnis bilong yu yet.

- Ol bisnis pipel
- Mas gat tingting long bisnis bai ron olsem wanem long bihain taim.
- I gat plen bilong bihain taim bilong bisnis.
- Man o meri husat i save olsem ol plen bilong em bai karim kaikai.
- Man o meri husat mas gat pasin bilong ogenaism gut ol samting o wok;
- Mas gat pasin bilong givim o tilim gut wok long ol manmeri.

- Mas gat pasin bilong mekim wok we bai apim tingting na laik bilong ol wokman meri bilong em o ol arapela mameri long mangalim na bihaininim.
- Ol wokman meri
- Ol wokman meri mas harim tok na redi long wok bung wantaim na givim sapat.
- Ol wokman meri bai gat strongpela bilip long man o meri i go pas long o i



long sanapim nupela bisnis.

- Ol wokman meri mas mekim gut wok bilong ol we bos i no inap long sekim olgeta olsem ol samting i stret o nogat.

i). Mas gat gutpela klin pasin:

Em i bikpela samting olsem yu mas gat gutpela pasin na aidia long wanem samting bilong mekim long bisnis bilong yu, na wanem kain we yu laik ronim bisnis, na yu laikim bisnis i go kamap olsem wanem. Sapos yu no bin tingting long ol dispela samting, yu mas stat nau bipo yu go het wantaim ol plen bilong sanapim nupela bisnis.

Dispela em mipela i toktok pinis. Tasol em i gutpela long mipela i autim tok, taim yu tingim we bilong glasim yu yet, bihainim stail ol i kolim SWOT. Sapos yu bihainim dispela stail o pasin long glasim yu yet, bai yu kamap wantaim ol askim olsem, yu wanpela man husat i ken abrusim ol hevi na go het long wok o plen bilong yu o nogat? Sapos yu wanpela kain man bilong abrusim ol hevi na go het, ol plen long nupela bisnis bilong yu bai karim kaikai.

Mipela bilip yu glasim na tingting long yu yet, bipo yu go het wantaim plen na statim nupela bisnis bilong yu. Yu mas save olsem i gat planti helpim yu ken kisim.

NEKS WIK:

Mipela bai toktok long nupela kain rot bilong statim bisnis. Dispela nupela kain rot long tok inglis em ol kolim "franchising". Dispela em kain bisnis we yu kisim laisens o tokorait long mekim na salim prodak bilong ol biknem kampani olsem Pepsi, Big Rooster, Petrol na Diesel Sevis Stesin, na sampela moa. Hia em yu bai go insait long wok bung wantaim ol arapela bisnis. Painim moa long dispela long neks wik long dispela pes.

LAMPSTAIL

KANAGE

"Em nau, narapela wik bilong mi ken"



■ Papa Kanage i bilong kolples. Em i no save raun long taun. Em save bosim ples na stap. Wanpela taim ol yangpela meri kam bung na sindaun stori arere long haus bilong em. Misis Kanage kam ausait na tokim Kanage long katim paiawut bilong mekim paia. Trangu trausis i no pas gut long Kanage. Olsem na taim em taitim masel long katim paiawut, ol meri lukim masin gan bilong em swing i go i kam. Wanpela lap nogut tru na tokim Kanage: "Aiyo papa! Yu lodim masin gan stret ya." Kanage harim tasol em i no bisi long toktok bilong ol yangpela meri. Em brukim paiawut i stap na narapela meri tok gen: "Aiyo tru ya. Lapun tasol baga lodim yet". Em nau. Kanage isi tasol taim na tokim ol: "Pikinini, bipo taim mi yangpela, dispela masin gan save bagarapim planti sindaun ya. Sapos yupela ting mi giaman, askim tasol ol mama bilong yupela". Ol yangpela meri harim olsem na lus wanwan.

Chris Yaluwe (namba 2 wina) KIMBE

■ Wanpela de Kanage kisim huk bilong pilim pis na go long nambis. Em huk i stap na pilim pekpek. Orait em pekpek wantaim na holim string i stap. Em pekpek pinis na kisim wanpela skin kokonas na laik rabim as bilong em. Taim em rabis as i stap, em kalap nogut long pis i pulim sting bilong bilong huk. Boi kalap nogut long pulim string na, em putim dispela skin kokons em rabis as long en long maus, na taitim bun tru long pulim pis. Em pulim pis kam antap pinis, man em lukim ol pekpek pulap long maus bilong em. Kanage lusim olgeta samting na kalap i go insait long solwara. Sem taim pis tu bihainim na kalap i go bek long solwara na swim i go. Kanage bel kaskas stret na waswas tasol na go bek long haus.

Mathew Nali KIMBE

■ Kanage em wanpela miks blut pikinini, papa bilong Sepik na mama bilong Samatex. Em skul long wanpela komyuniti skul long Madang not kos. Na save prenim wanpela hapkas waitmeri na PNG miks. Wan wik holide na em i go holide long Wewak wantaim dispela prenmeri. Wanpela Sarere tupela go raun long Dagua maket. Dispela de, laik bilong Kanage i kirap stret long kaikai gru mambu. Em laik baim na prenmeri i tokim em: "Em ol meri kunai kantri i salim gru mambu i stap. Inap yu kisim na mi testim wanpela". Kanage baim sampela gru mambu i kam na penmeri tokim em: "Yu wantaim gru mambu bilong yu mekim na bai mi lusim skul bilong mi". Em tok olsem kwik wan em testim wanpela na laik daunim. Tasol abrus na pas long nek bilong em, na em kus na kapupu wantaim. Kanage harim na tokim prenmeri: "Kapupu bilong yu tu mekim na gru mambu bilong Sepik save bagarap."

Gerard Tom WEWAK

• Lukim moa tokpilal long pes 13 na 17

Sapos yu painim ples bilong piknik o raun, go long Hula

WATSON GABANA i raitim

AIR Niugini i save kamap wantaim kain kain advetismen long TV, redio na niuspepa long ol gutpela holide ples we yu ken kalap long balus na raun gut long wanem hap yu laik go long en. Tasol nau, toktok i wok long kamap olsem Air Niugini laik apim prais bilong tiket. Sapos Air Niugini apim prais bilong tiket, wanem hap tru bai ol kokol turis i go long spendim wiken bilong ol? Na tu sapos yu stap long Mosbi na painim ples bilong i go piknik bai yu go we? Sapos yupela i no tingim wanpela hap yet, mi laik tokim yupela long wanpela naispela ples yu ken ting ting long go. Dispela em long HULA. Mi bin i gat sans long spendim wanpela wiken wantaim wanpela poro bilong mi long ples Kamali klostu tasol long Hula tupela wik i go pinis. Na tru long ekspiriens, mi laik tokim yupela ol wikenda lain olsem Hula em wanpela naispela ples we yu ken spendim wiken bilong yu long hap.

Hula em wanpela ples i stap long Sentrel provins klostu tripela aua draiv long Mosbi siti bihainim Magi haiwe. Ol Ostrelia ami i bin yusim dispela ples olsem ples balus bilong ol long namba tu wol woa. Long Hula, ol ami salim balus bilong ol go pait wantaim ol Japan long rot i go olsem long Popondeta. Nau, bus i karamapim dispela hap na ol asples i mekim gaden antap long dispela ples balus bilong Ostrelia.

Tasol wanpela samting putim ples Hula antap long mep bilong kantri em 'Hood poin lait haus'. Olgeta taim sapos yu harim ripot bilong weda long Kalang FM, Nau FM na Yumi FM, lukim weda ripot long Post Courier o National niuspela na tu harim long weda ripot bilong EMTV nius bai yu no inap abrusim dispela hap nem, Hood Poin.

Mi bin go wantaim poro bilong mi Maino Kwalimu long Kamali long Fraide 31 Oktoba. Mitupela i bin lusim Mosbi long foa klok apinum na bihainim Magi haiwe. Dispela i bin namba wan taim bilong mi tu long lusim Mosbi na raun i go olsem.

"Dispela em maus rot bilong Tubuserea," Maino stat soim ples. Olgeta taim mitupela kamap long wanpela maus rot, Maino bai tokim mi long nem bilong wanem ples stap long pinis bilong dispela rot. Stat long Tuberezea i go inap maus rot bilong Gaire, mipela ron antap long kolta. Taim mipela lusim maus rot bilong Kwikila mipela stat long ron antap long das rot.

Mi bin kirap nogut tu long lukim antap long het bilong mi. ELCOM pulim pawa lain i go



• **ANTAP: Junia Maino wantaim mama bilong em na tupela arapela pren amamasim ol yet long gutpela nambis bilong Hula.**

• **LEPHAN: Watson Gabana so-ov nating long nambis bilong Hula. Foto: Maino Kwalimu.**

manmeri long en. Na tu em ples we namba wan misineri bilong Metodis (nau Yunaited) sios i bin statim wok bilong ol na karim Gutnius bilong Papa God i go long olgeta hap bilong Papuan rijen na kantri.

Mi bin gat sans tu long go antap long dispela lait haus. Ol i gat naispela naispela nambis na solwara i save bruk klostu faiv o siks mita. Taim mipela i bin raun long nambis i go, mipela i bin bungim sampela Saina husat i bin raun i go waswas long solwara. Mipela stap sampela taim long hap na mipela i go bek long ples. Taim mipela kam kamap long ples, mi bin kirap nogut long lukim tupela 'white horse', ka bilong plis sanap i stap. Sampela manki i tokim mi olsem ol plisman long Mosbi i painim sampela stilman husat i bin stilim wanpela ka na karim i go long ples. Dispela em long ples Makerupu wanpela ples namel long Kamali na Hula. Plis kisim bek ka na draivim i go bek long Mosbi.

Long Sande apinum, mipela lusim ples na tekov i go bek long Mosbi. Taim mipela kamap klostu long Mosbi, mipela i bin witesim dai bilong biknem PNG boksa, Howard Gereu.

Mi bin lainim planti samting long pasin na kalsa bilong ol Papuan komyuniti. Tasol bikpela samting tru mi no inap lus tingting em gutpela na naispela nambis long Kamali na Hula.

Mi tok gen; sapos yupela nogat wanpela hap long go, yupela i ken go long Hula. Bai yupela lukim planti samting yupela i no bin lukim long Mosbi o arapela hap bipo.

inap long Ginigolo. Ol laik pulim i go olgeta long Hula tasol kain komplek pasin bilong graun na ol stapim. I no longtaim, Maino tok: "Mitupela kamap klostu pinis."

Dispela taim, mitupela ron antap gen long kolta. "Watpo na ol i no bin pinisim kolta?" mi askim. "Moni bilong dispela rot gavman salim i go long stretim wanpela rot bilong hailens. Olsem na Woks dipatmen i no bin pinis dispela hap rot," Maino tokim mi.

Mi no save wanem hap em kisim dispela tok. Tasol mi bin kirap nogut bihain long harim wankain toktok i kam long ol manmeri bilong Hula taim mi askim long dispela hap rot ol i no bin putim kolta. Em orait, dispela i no bikpela samting tumas. Taim mitupela kamap long Kamali, taim i bin olsem 7 kilok. Mitupela kaikai tasol na i go slip.

Neks moning, sampela manki bilong ples kisim mi na mipela i go raun long bikples na pilai soka i go inap apinum. I nogat wanpela samting bai yu sot long en. Pulap long kaikai, abus na pis. Dispela bikpela san na ais i no kamapim wanpela liklik hevi long ol manmeri bilong Kamali, Makerupu na bikples Hula.

Olgeta manki i save pilai insait long Kamali soka asosiesen. Em wanpela we, ol bikman bilong ples kamapim long stapim ol yangpela i no ken kam raun nating nating long siti.

Long Sande moning, Maino kisim mi na mitupela i go long bikples Hula, ples bilong meri bilong em wantaim meri na pikinini bilong em. Hula, olsem mi tok pinis em wanpela bikpela ples stret. Wanpela bilong olpela ples we gavman bilong Ostrelia i bin bungim ol



• Lapun Matai Yati (sindaun) na Pasto Anthony Elemy (sanap) long Tabubil.

Wok strong long kamap long mak

VICAR GIGMAI K. OKUK
i raitim

"Mi NO ting long tok olsem, mi stretpela man pinis. Mi no lainim olgeta samting mi mas save long en, tasol mi wok strong kamap long dispela de, taim Krai bai lukim mi sanap long mak, Em i

laikim mi sanap long en." Filipai 3:12.

Long olgeta hap, yumi save kam long bungim ol man i narakain long olgeta arapela. Na i gat stori bilong ol tu i go wantaim ol. Yumi bai lukim stori bilong wanpela man bilong Makam. Nem bilong en, Matai Yati. Em i gat 75-pela krismas bilong Lagiampun, Kaiapit Seket.

Dispela man i bin wok olsem 44 yia olgeta long Wok Gutnius. Na long dispela taim yet, em i wok strong i stap. Bodi bilong en i lapun na skin i slek, tasol dispela hevi bilong bodi i no pasim o kalabusim dispela gutnius i pulap long em.

Mama i bin wok long ples Lagiampun long 1922. Em i yangpela man taim woa i kamap long ples bilong en. Long dispela taim, em i save ronawe long ol soldia na hait raun.

Bihain long woa, taim em i gat 25-pela krismas, em i go skol. Long 1951, em i pinisim skol tasol ol bik-brata i no laik bai em i kam long hai skol long wanem, ol tu i stap pinis.

Orait, long dispela taim em i kisim sip na i go long Namatanai, na wok kontrak long wanpela kokonas plentesen long ples Marinzuan. Bihain long wanyia and 6 raun, em i kam bek long ples.

Long ples em i marit long meri bilong en, Nanwan. Na long dispela taim tu em i stap insait long baptais na konfemesen klas. Em i save long rit na rait, olsem na em tu i kamap tisa bilong ol long wankain taim. Em i lainim na bringim olsem 300 lain olgeta, wantaim em yet long baptais na konfemesen.

Long Disemba bilong 1955 em i go stap long 8 Mail long Lae. Na em i kisim wok long Lae Ples Balus. Tasol tupela mun bihain long Jun, em i go wok long wanpela Timba Kampani, long het bilong Wara Busu. Na 8-pela yia olgeta, em i stap long bus long dispela wok.

Long 1958, em i kam mlong Lae na stap wantaim ol nambawan lain husait i kirapim St Pauls Luteran Sios. Na long dispela taim, em i wok na kisim Gutnius i go namel long olgeta Kristen memba bilong dispela kongregesen.

Tasol long 1964, em i lusim St Pauls na i go kamap hetman bilong Our

Saviour Kongregesen. Na bihain ol i makim em, i kamap seket kaunsil memba bilong ol. Na bihain long planti wok bilong lainim wok na stadi, em i kisim blesing bilong karim hevi bilong ol manmeri, olsem wanpela pasto. Long dispela taim em i bringim moa long 500 lain manmeri long konfemesen.

Tasol long 1971 em i surik i go long hap bilong 2-Mail, St Timoti Kongregesen. Long dispela hap, em i stap Siaman bilong kongregesen, na wok olsem Evangelis na Asisten Pasto. Long dispela ples em i bringim olsem narapela 800 lain i kam long konfemesen. Tasol long 1979, em i pinisim wok bilong en long 2-Mail.

Long dispela taim, em i go bek long ples Lagiampun, wantaim olgeta presen ol kongregesen i givim em, bilong karim dispela wok Gutnius i go het. Long ples em i wok strong yet i kam inap long 1994, taim meri bilong en, Nanwan i lusim laip bilong en. Long dispela taim, tupela i gat 4-pela pikinni meri na tripela pikinni man na planti ol tumbuna pikinini.

Tupela yia bihain, long Ogas bilong 1996 Lapun Matai Yati i kam stap wantaim pikinini bilong en long Tabubil. Na long dispela hap, em i wok strong na smat tru long dispela wok. Na planti kristen i save amamas long gutpela wok na pasin bilong en. Long krismas em i go pas long olgeta wok i kamap, long wanem dispela wanpela pasto bilong ol, Pasto Anthony Elemy i stap long Kiunga.

Na long dispela yia 1997, em i mekim wok strong yet long; bung bilong ol mama, yut, konfemesen klas, kongregesen grup, wanwan femili na long ol Sande lotu. Em i mekim wok na kamapim gutpela piksa tru bilong gutpela wokman bilong Krai.


Wanem samting tru, i stap insait long em, na kirapim em long paia tru long olgeta dispela wok? Em i wok, "Wanpela teks i save strongim mi long mekim dispela wok, i stap long Luk 23:26. Mi pilim olsem, mi mas kamap olsem dispela 'Saimon bilong ples Sairini'. Mi gat wok bilong karim diwai kros bilong Jisas Krai na bihainim Em long dispela taim mi stap lap yet."

Em tu i tok olsem, "Sapos yu yangpela i laik bihainim Jisas Krai, yu mas daunim yu yet na karim hevi bilong ol arapela kristen manmeri, autim Gutnius long ol, na kisim ol manmeri na givim i go long God, long wankain pasin Jisas yet i mekim, taim Em kisim yumi manmeri, na putim yumi insait long siots bilong God."




National Heart Foundation
of Papua New Guinea Inc.

LUKAUTIM LEWA BILONG YU KAIKAI GUTPELA KAIKAI




TOK NOGAT LONG:



- Ol kaikai em yupela save fraim wantaim gris o wel, na tu long ol kaikai i gat gris
- lem fleps
- Sips
- Krim bans na ol arapela swit kaikai
- Planti sol o ol kaikai i gat planti sol

TOK YES LONG:



- Ol gutpela prut
- Gaden kaikai olsem kumu gras
- Rais, pasta na siril
- Wolgrein bred
- Pis
- Mit na kakaruk

***Yu bai gat gutpela helti bodi we yu no inap
go fat na lewa bilong yu bai tenkim yu***

NATIONAL HEART FOUNDATION OF PAPUA NEW GUINEA INC.
P.O. Box 158, Mount Hagen, W.H.P. Phone: 542 2199 Fax: 542 2384

KANAGE



■ Kanage ritim *Wantok* niuspepa na lukim nem bilong meri Wabag i laikim penpren. Tingting bilong em kirap long raitim pas. Bihain em go long pos opis long baim stem. Opisa i bilong Papua. Olsem na taim em givim stem long Kanage, em tok: "Raka, 20t ia mai".

Opisa i min olsem givim mi 20t long dispela stem. Kanage ting em tok nogut long em. Na em bekim strong tru: "Yu tu Raka 20t ia mai!"

Ol arapela manmeri harim olsem na kilim skin stret long lap. Kanage tanim na bikmaus tu long ol: "Yupela tu, Raka 20t ia mai!"

Sackie Sakare Miok (Namba 3 wina) BOROKO

■ Kanage i no toilet long tupela wik olgeta. Wanpela de em raun long nambis na pilim pekpek. Em ron i go kalap long han bilong diwai mangro, rausim trausis na taitim bun long pekpek. Em taitim bun i go tasol pekpek i no kam ausait.

Sem taim em lukim wanpela traipela pis, ol kolim 'karwa' i kam swim aninit i stap. Em laik kilim pis ya tasol pekpek tu i laik kam ausait long em taim. Em kisim smatpela tingting na srukim olgeta gia bilong skin. Na makim stret as antap long pis. Wanpela traipela mama bilong pekpek olsem ston i kam aut na go daun paitim pis antap long het stret. Pis ya i dai na em kalap i go daun kisim na karim i go long haus. Misis Kanage lukim na askim: "Yu kilim dispela pis olsem wanem?" Na Kanage smail na bekim isi tasol: "Mi kilim long wanpela spel-dainamait bilong mi yet."

Matthew Kalae
BIALLA

■ Kanage i bilong Tambul long Westen Hailans provins. Em stap long bus haus na mekim paia i stap. Orait 5-pela meri painim masrum i kam na bikpela ren stret i pundaun. I no longtaim ol i lukim haus bilong Kanage na go insait. Na tokim Kanage olsem ol kol na laik hatim skin long paia. Tasol Kanage em lukim ol longtaim pinis, na kwiktaim em kilim paia na wet i stap.

Em stat nau long mekim trik long ol meri. "Sapos mi mekim paia, bai yupela givim mi wanem samting," Kanage i askim. Na ol i tok, "Bai mipela givim yu wanem samting yu laikim, yu kolim tasol". Kanage tokim ol: "Sapos mi slip antap long bel bilong yupela, bai mi mekim paia." Ol i tok orait na Kanage amamasim em yet. Na bihain mekim bikpela paia tru na ol meri hotim skin.

Sampela de bihain ol meri ripot na. Kanage kamap long viles kot. Em save olsem em bai go kalabus nau. Kwiktaim em dikim wanpela taro na kukim. Na bihain putim antap long gras olsem pekpek bilong dog stret. Na karim i go putim klostu long hap em kot bai kamap. Long kot, mejjstret i askim sapos em i tru Kanage paulim ol meri long bus. Kanage strong long sait bilong em tasol ol meri tu i strong yet. Taim mejjstret askim gen, Kanage ron tasol i go na kaikai dispela taro antap long gras em ol manmeri ting pekpek bilong dog. Ol lain bilong Kanage lukim na tok: "Kanage kaikai pekpek". Ol paitim lain bilong meri na Kanage winim kot.

Texi Mom
LAE

■ Kanage em namba wan taim bilong em long flai long Air Niugini F28 balus. Em lusim Mosbi na go long Mosbi siti. Taim ol ron antap, wanpela ea hostes i skelim kofi na bisket na givim long ol pasindia. Em kam kamap long sit em Kanage i sindaun na askim: "Papa, yu laikim kofi wantaim susu o kofi nating?" Kanage skin kirap na hariap tru em smail ha tokim ea hostes: "Ha pikinini, susu maski, bihain mitupela yet orait yu givim mi susu. Nau em ol planti pasindia i lukiuk ya. Yu givim mi kopi nating".

Trangu ea hostes i sem tru. Tasol em save olsem tok pisin bilong em yet i givim rong tingting long papa Kanage.

Yefei Molou
VANIMO

• Lukim moa tokpilai long pes 18.

Azzimbah ben mekim nois long Milen Be provins



• Ol boi bilong Azzimbah ben i raun pilai long Milen Be provins las wik.

YAKAM KELO i raitim

AZZIMBAH nupela musik grup bilong Mosbi nau i wok long mekim planti nois long redio na ol kaset long kantri.

Azzimbah i no westim taim long putim nem bilong em tu i go antap wantaim ol arapela biknem ben bilong PNG. Na yu ken harim long olgeta kona bilong siti na ples tu bai ol manmeri i singim ol song bilong Azzimbah ben.

Long Septemba 27 bihain long Azzimbah i mekim planti nois long ol bikpela hotel na disko ples long Mosbi siti, Azzimbah i mekim namba wan raun bilong em i go aut long Milen Be provins.

Ol ben memba bilong Azzimbah em; Martin Rawali, Tizie Sepa, Andy Miro, Benjamin David, Daniel Sepa, Mitchel Samei, Ivana Kepi na Tanora Sepa.

Kamap bilong Azzimbah ben long Milen Be provins, ol manmeri i wetim ol pinis. Nius long kamap bilong Azzimbah i bin ron pinis na ol manmeri husat i save harim na danis long musik bilong Azzimbah i kamap long Gurney ples balus long welkamim ol boi.

Man i go pas long kamapim dispela raun na pilai bilong ben Kris Metlem na Wally Benny na mausmaun bilong Coca-Cola spona bin kamap na kism ol boi long ples balus.

Menesa bilong Azzimbah ben Tanora Sepa i tok dispela i bin namba wan taim tru bilong ol boi Azzimbah long pilai ausait long Mosbi na Sentrel provins. Na dispela em namba wan taim bilong ol boi long raun na kamap long Milen Be provins.

Mista Sepa i tok taim Azzimbah i pairapim musik bilong ol long AW Pak, ol manmeri Samarai i no isi long kam pulap na raunim long lukim na harim musik bilong ol boi. Ol manmeri i bin amamas tru long lukim ol boi Azzimbah long namba wan taim bikos ol i save harim long redio na kaset tasol na ol i save laikim tru musik bilong ol. Tasol long dispela

taim, em i sans bilong ol stret long lukim long ai na harim stret long ia na toktok wantaim ol. Klostu olsem 800 manmeri i bin bung long dispela namba wan de taim Azzimbah i pairapim musik long AW Pak.

Ol manmeri i tok ol i amamas tru long lukim Azzimbah ben bikos ol i namba wan taim long kism Azzimbah ben i go long ol.

Mista Sepa i tok Azzimbah i stap long Milen Be provins na pilai raun inap tupela wik olgeta insait long bikpela promosen raun bilong Coca-Cola kampani.

Ol boi Azzimbah i laik mekim bikpela tok amamas i go long ol kampani na grup husat i bin helpim ol long givim sapat na spona long dispela raun bilong ol long Milen Be provins. Ol kampani olsem Alotau Stevedoring, Masurina Lodge, Alotau Bakery, Cameron Club, Air Niugini, Coca-Cola Amatil, Alotau PNGBC, Alotau International School, Alotau Steamships Hardware na Babra Fashion na Alo Sounds long ol gita na musik samting bilong ol we Azzimbah ben i bin yusim.

Tanora Sepa i laik mekim bikpela tok amamas tu i go long Kris Metlem na famili bilong em, Wally na ol lain bilong em, Tonny na famili na Benny wantaim famili long lukautim ol long kaikai na haus long dispela tupela wik raun bilong ol long Milen Be provins.

Ol i laik tok bikpela amamas tu i go long olgeta manmeri long gutpela sapat na amamas bilong ol long Milen Be provins. Ol i laik mekim bikpela tok amamas tu i go long bikpela spona bilong ol Tanorama kampani long mekim olgeta rot bilong ol na tu tok amamas i go long Martin Brash long wokim ol vidio klip bilong ol.


Bai Azzimbah ben i pairap tu long vidio klip we ol i gat tripela musik bilong soim. Ol dispela song we bai i kamap long musik vidio klip bilong EMTV em Azzimbah, Smel Tinpis na Vavine.

Yu ken putim ai long EMTV long lukim stail bilong ol boi Azzimbah na harim ol gutpela musik bilong em long ol redio stesin na kaset.



TOP 20 This Week!

L/W	T/W	SONG	ARTIST
2	1	MAI TAURI AU	KABANI
1	2	LESE MORI	AZZIMBAH
3	3	FROOKS LONG MI	AZZIMBAH
4	4	JUSTINA	LEO WALILING
5	5	NOQUI-TAU	KABANI
7	6	OVAVINE	AZZIMBAH
6	7	ERE BINI TU	KABANI
8	8	KEPOKO	HIRI BAND
11	9	UNITY	F. TADOIN/N.JOHN
12	10	SWEET SOMETHING	APRENTICE
13	11	ToBEST	KANAI P'INERI
14	12	BR. BOB MARLEY	APRENTICE
10	13	OPERESSIN RAUSIM	K. PINERI
15	14	DEDICATE MY LOVE	K. PINERI
11	15	AZZIMBAH	AZZIMBAH
18	16	HILSIDE	AZZIMBAH
16	17	SHERRY	SERU SEREVI
17	18	BOMANA	AZZIMBAH
0	19	UWAHO	HIRI BAND
19	20	KALUNGE	WILLIE TROPUS



PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995



**PAPUA NEW GUINEA
FOREST INDUSTRIES ASSOCIATION (INC)**
P.O. Box 4037, Boroko. Phone: 325 9458 Fax: 325 9560

TOKSAVE O NOTIS I GO LONG OL LAIN I GAT INTERES LONG DISPELA MIPELA BAI WOK SAPOS GAT GUTPELA MAKET, WANTAIM RUL NA LO BILONG WOK

• Pasin bilong katim timba na developim insait long kantri yet, na tu i noken bagarapim bus graun wantaim laip na sindaun bilong ol ples pipel em astingting bilong Fores Polisi, we bisnis bilong katim na salim timba i sapotim. Wok bilong katim na salim timba, na tu long senisim na planim ol nupela diwai save kisim planti mun yia. Na Gavman i save olsem em i mas lukautim ol risoses bilong kantri olsem timba, long lukim olsem gutpela helpim i go long pipel bilong kantri, ol timba kampani, na bihain taim bilong kantri i noken bagarap. Long kamapim dispela kain developmen, em long tok inglis ol i kolim "sustainable development", mas i gat rul na lo i lukautim wok bilong katim na salim timba insait long kantri.

• Maket bilong salim timba i bin bagarap stat long mun Me bilong yia 1993 yet. Em i tru olsem ol timba kampani i no inap long lusim yet mani, bikos long bikpela kos bilong mekim wok bilong katim na salim timba insait long kantri, wantaim nogat gutpela maket bilong salim timba.

• Long 1993 na 1994, olpela Fores Minista tokaut olsem em i kisim 24 tingting bilong ol manmeri long wok bilong katim timba na developim insait long kantri yet. Long dispela taim i kam inap nau, Gavman i no mekim wanpela samting yet long ol dispela tingting i kam inap nau. Mas i gat ol gutpela rul na lo we bai sapotim ol timba kampani long kari-maut gut wok bilong katim na salim timba, na long sem taim ol i mas mekim mani. Tasol Gavman i no toktok long dispela.

• Prais bilong timba i go daun long wol maket, i no long ol timba bilong PNG tasol. Ol ovasis kampani long ovasis husat long namba wan taim i laik baim timba bilong PNG i senisim tingting bilong ol. Bikos ol i no save long wanem kain rul o lo Gavman bai

mekim long ol timba kampani insait long kantri, aninit long Straksarel Ajasmen Program.

• Nau yet i gat samting olsem 100 bisnis wok bilong katim na salim timba insait long kantri, wantaim 40 bisnis wok bilong salim timba long ol ovasis kantri. Mas i gat ol gutpela rul na lo we Gavman i mas bihainim long sekim wok bilong katim na salim timba insait long kantri. Na mipela i sapotim wok bilong Gavman long sekim na lukim olsem olgeta timba kampani mas mekim gut wok bilong ol.

Em i no asua bilong mipela na prais bilong timba i go daun long wol maket. Na tu em i no asua bilong mipela long ol lo we i mekim hat long ol timba kampani long katim na salim timba long kisim inap mani, bikos ol lo ya em Wol Benk i go pas long en we kantri i bihainim tasol.

Mipela ken tok tasol olsem i gat rum o spes bilong olgeta kainkain kampani long wok insait long bisnis bilong katim na salim timba. Na dua bilong FIA i op long ol bikpela na liklik kampani long joinim na kamap memba.

Fores Industri Asosiesen i makim interes bilong olgeta lain husat i wok na kisim helpim long wok bilong katim na salim timba insait long kantri.

WOK BILONG KATIM NA SALIM TIMBA I MAS KAMAP LONG HELPIM NA SAPOTIM PIPEL BILONG PAPUA NIUGINI. NA LONG SEM TAIM, WOK BILONG KATIM NA SALIM TIMBA INSAIT LONG KANTRI I NOKEN BAGARAPIM OL BUS GRAUN NA WARU. WANTAIM LAIP NA SINDAUN BILONG PIPEL.



Perth siti i stail moa long go lukluk

Maketing Menesa bilong Word Publisng, Joe Kanekane i bin stap insait long wanpela kibung long Perth, Westen Australia, long wik i go pinis.

Em i stori long dispela stail taun na wanem samting em i lukim.

PLANTI pipel bilong Papua Niugini husat i save go skul o raun long Australia i save go long ol bikpela siti olsem, Brisbane, Cairns Sydney na Melbourne.

Dispela ol siti i stap klostu long PNG na i isi long go na kam bek kwiktam. Ating sapos wanpela man i kolim kapitel siti bilong Westen Australia, Perth, planti man bai i no inap long save gut.

Perth i stap longwe tru long Papua Niugini na bai yu kisim klostu olsem 8-pela awa long go long hap.

Las wik mi bin go long dispela siti long stap insait wantaim ol arapela nuis lain long Perth. Dispela bung i pulim planti ol lain long Australia, Nu Silan, Hong Kong na Saina.

Dispela wokabout bilong mi i stat long Mosbi, long Mande we mi kalap long wanpela F28 long go long Cairns. Long Cairns mi senisim balus na kalap gen long narapela Balus.

Dispela balus i bikpela long F28, na em i ken karim planti pasindia. Mipela i lusim Cairns long 11 kilok.

Long go long Perth, ol wokman blong Balus long toksave long mi olsem em i bai kisim klostu long siks pela awa long go long hap.

Mipela i lusim Kwinnsien na katim Norten Teritori long go long Perth. Ples i drai nogut tru, nogat ol diwai olsem ol bus na ples bilong mipela long hia.



• Joe Kanekane i lukluk raun long Yunivesiti long Westen Ostrelia.

Stat long taim mipela lusim Cairns, mi no lukim wanpela hap ples we i gat sampela diwai o grinpela gras liklik, insait long dispela tripela awa, ples i pulap long ol drai gras tasol.

Bihain long tripela awa mipela i kamap long wanpela ples ol i kolim Ayers Rock. Dispela ples i nogat wanpela siti o gutpela samting, wanpela ples balus tasol na wanpela bikpela ston we kala bilong em i ret nogut tru.

Planti turis long olgeta hap bilong wol i save go long dispela hap long lukluk long dispela ston.

Samting we i save pulim planti lain em dispela ston i save senisim kala bilong em long ol wanwan taim. Sapos yu go long moning bai yu lukim em i braun, long belo em bai kamap ret, na long nait em bai go ret olsem wanpela paia i lait.

Bikpela bilong dispela ston i klostu long 6-pela mail, na em bai kisim yu 6-pela minit long raunim. I gat sampela ol liklik rot i stap we yu ken bihainim na go antap long het bilong dispela ston.

Mi no go long dispela hap long wanem balus i laik tekov na mi go bek. Long Ayers Rock na Perth em

i narapela 3-pela awa, na baksait bilong mi pen long wanem mi no save sindaun long balus long kain longpela taim olsem.

Wankain olsem pastaim nogat wanpela maunten o diwai, ples i drai nogut tru. Taim mipela i kamap klostu long Perth, ples i senis liklik na mipela i lukim sampela hap i grin.

Dispela em long wanem i gat ol pipel i stap long dispela hap na wokim fam o lukautim bulumakau na sipsip.

I gat sampela bilong dispela hap we ol i plainim wain tu, na taim

mipela i ron antap mipela i lukim ol lain wain diwai i go inap ai bilong mi i pen.


Taim balus i tanim na raunim Perth, mi lukim dispela siti i stail nogut tru. Ol stori we ol man i bin toktok long mi i kamap tru.

Perth i stap insait liklik, na i no klostu long solwara ol i save kolim Indian solwara. Namel long dispela siti i gat wanpela wara ol i kolim Swan. Dispela wara i save brukim siti inap long tupela hap, na tu i save mekim siti i luk nais tru.

i go moa long pes 17

Nau yu no nap brasim strong bai yu wasim isi tasol!

NEW



NUPELA Pawa Klina. Tok save long ol pren bilong yu.

Wei bilong wasim samting wantaim NUPELA Pawa Klina. Dispela Klina yu save pinis tasol ol i putim mo pawa long detergent. Em i save putim out ol strongpela Pawa bubble long go insait long ol klos na klinim ol gut tru. Yu no nap wok hat bai Pawa bubble i wokim strongpela wok. Mekim de bilong yu isi traim NUPELA Pawa Klina em igat mo Pawa na strong bilong detergent.



Nem: Sackie Sakar Miok

Krismas: 28

Adres: M.M. & Sons Pty Ltd., PO Box 4045, Boroko - NCD.

Save Laikim: Go long lotu, lukim televisen, na harim gospel musik. Mi save laikim tu long raitim pas long ol penpren.

Nem: Jacob Joe

Krismas: 29

Adres: Kimbe Town Authority, PO Box 127, Kimbe - WNB.

Save Laikim: Raun wantaim ol poroman, lukim pilai soka, na waswas long solwara. Na tu mi painim wanpela gutpela meri bilong maritim. Mi bai amamas tasol long bekim ol pas o leta em mi kisim.

Nem: Paul Taitas

Krismas: 16

Adres: Kumbango Division Two, PO Box Kimbe-WNB.

Save Laikim: Pilai soka, waswas long solwara, go long lotu, na tok pilai wantaim ol poroman o poromeri.

Nem: Timothy Kelep

Krismas: 27

Adres: PO Box 1232, Mt Hagen-WHP.

Save Laikim: Pilai basketbal, tok pilai wantaim ol mangi, go lotu, waswas long wara, na painim penpren na raitim pas long ol.

Nem: John Minson

Krismas: 28

Adres: PO Box 490, Wabag, Enga Provins.

Save Laikim: Ritim buk, go lotu, harim musik, na raitim leta long ol penpren.

Nem: Roselyn Kepekali

Krismas: 15

Adres: PO Box 325, Wabag, Enga Provins.

Save Laikim: Go long skul, raitim leta, mekim fani, harim musik na go lotu.

Nem: Wilfred Gukain

Krismas: 16

Adres: Garu New Project, PO Box 791, Kimbe-WNB.

Save Laikim: Mi wanpela mangi bilong Is Sepik husat i stap long Wes Nu Briten provins. Mi ritim nem bilong plan-



ti manmeri long dispela niuspela we i askim long penpren. Na kirapim tingting bilong mi tu long rait i kam.

Ol samting mi save laikim long mekim em raun long ol arapela provins, raitim leta, pilaim ol spot olsem soka na volibal, ritim komik, toktok wantakm ol pren na go amamas long ol sosel nait.

Nem: John Sakol

Krismas: 18

Adres: PO Box 1232, Mt Hagen, WHP.

Save Laikim: Pilaim ol spot olsem ragbi na basketbal, go long lotu, ritim Baibel, na raitim pas long ol penpren.

Save long olgeta de laip bilong Hong Kong

ZANANG ZAZORING i raitim

JULAI 7 19:35 p.m., Hong Kong taim! Flait PX 010 i redi long putim taia long Hong Kong Intanesenol Air pot. I gat lait yet na mi lukim ol longpela bilding long windo bilong balus. Bel i kirap tu long lukim Hong Kong long wanem, em i pestaim bilong mi. Na lait bilong siti tu i bringim tudak i kam daun hariap.

"Ladies and gentlemen!", Air Hostes i singaut. "In preparation for landing - fasten your seatbelts and sit upright!". "(Ol manmeri, wokmen i singaut. "Redi long go daun, pasim sit-belt na sindaun stret!". Na i no longtaim na pailot i singaut. "Flight attendants, be seated for landing!".

Nau Air Bus A3101 go daun isi isi. Hong Kong ples balus em i bisi tru, na ol balus i pas pas tru. Balus bilong mipela i kisim sampela 10 minit samting long kamap long teminal wan. Pastaim balus i flai antap long ol longpela haus, na mi pret liklik - nogat taia bilong balus i holim het bilong wanpela bilding na mipela i pundaun! Narapela tingting i tok, man, pailot igat save yet. Tasol las tingting i kamap na mi pasim ai na mekim sotpela prea - long wanem. God i stap tu long mekim olgeta samting i kamap stret.

Mi no nupela long go ovasis na long intanesenol falit, olsem na taim mi putim lek ausait long balus, mi no pilim wanpela pret. Narapela Papua Niugini wantok na famili bilong en i go tu long mekim soping na lukluk raun long Hong Kong, olsem na mipla i tok gutbai na ol i go long laik bilong ol yet. Pastaim dispela wantok i askim mi long wanem as mi go long Hong Kong. Mi tokim em olsem. "Mi go long wanpela intanesenol bung bilong ol Luteran Sios o Luteran Wol Federesen 9 Asembli bung".

Hong Kong i kamap pinis hap bilong China long Julai 1. Tasol mi gat askim yet long odoriti bilong China bai mekim wanem tok long dispela intanesenol bung bilong mipela Luteran Sios long Wol. "Olgeta samting bai orait?. Mi yet i askim olsem".

Long Hong Kong i no gat mit long kisim visa, olsem na mi pilim pinis - dispela kantri em i no strik tumas. Mi go insait long imigresen, tasol mi lukluk bek na narapela meri Goroka, Riu Jondi, husat i makim ol Luteran meri i go na em i gat mit long mi helpim em. Olsem na mi go bek na helpim em wantaim visa applikesen bilong ples balus na kastam fom. Ol arapela 8-pela delegeet i kisim kago na wet long ol aspies Hong Kong Luteran Sios i kam long kisim mipela.

Mipela i stap klostu long 1 aua na long nameltaim, mipela i lukim ol retpela teksi i wok long kam. Insait long dispela taim, moa long 1,000 teksi i go i kam pinis long sekim ol pasindai long ples balus. Taim bas i kam, ol i tokim mi olsem, bai mi slip long South Pasifik Hotel. Ol i go putim mi long rum namba 10 and 17 floa. Tasol pe bilong hotel em \$HK1,600.00 o klostu K270.00 long wan nait.

Hong Kong em i wanpela bikpela siti wantaim olgeta haus em i stap antap tru long skai. Tasol long makim Hong Kong wantaim London siti, yu bai lukim olsem, ol British i

kisim wanpela liklik hap na pipia bilong London na karim i kam na wokim Hong Kong siti. Ol i kolim Hong Kong olsem. "Cosmopolitan City". Sapos yu kisim wanpela grasrut lapun bilong Papua Niugini i go long Hong Kong, em bai tokim yu olsem. "Ol man i no wokim dispela samting - ating ol tewel na masalai o ol daiman i wokim".

Olgeta manmeri insait long Hong Kong ol i bisi lain - olgeta de em i bisnis de. Sande tu Sande. Olgeta stua i op, ol ples bilong kaikai (restaurant) i op long moning i go 9 kilok nait. Mi go isnait long wanpela restaurant na askim long rais na papa bilong haus kaikai i tok strong. "Sorry, you are too early!". Tasol yu save, mi laikim rais long nau tasol, maski moning o apinun. Mi skrapim het na lusim dispela haus kaikai. M no moa askim long rais long arapela haus kaikai, long wanem, mi kisim taim pinis.

bilong en em i \$HK20.00 na i go antap. Long dispela taim, mi tingim bek long toktok bilong "Finschhafen" - yu no ken mekim nating. Yu mas dring suga tru tru. Olsem wanpela stori i stap olsem. "Papa, yu laikim hamas spun? Papa i bekim - pikinini, i no planti spun, 7-pela tasol!"

Hong Kong em i ples bilong kaikai. Olgeta hap yu go - ol manmeri i sindaun na wok long kaikai. Ol i kaikai na i no sotwin. Hong Kong em i British koloni, tasol planti lain i no save long tok Inglis, na em i hat tu long toktok i go i kam wantaim ol. Ol i wokim bikpela haus na siti, tasol olsem wanem long edukesen? Tasol Hong Kong em i gat laipstail bilong China tasol. Insait long ol stua, mi mas makim long han, long wanem, planti i no save long Inglis.

Bihain long China i tekova Hong Kong long han bilong

bungim Henry Tamarua, wokman bilong Guthius Luteran Sios bilong Enga man, mitupela i holim pas, olsem pasin a! PNG we! Mitupela stap insait long bikpela bung bilong ol Luteran Sios long Wol. Henry i lusim Thailand na kam bihain long Luteran yut pri-assembly bung. Em i go pinis wan wik pastaim long mi na em i no save long wanem samting i kamap long politik bilong Papua Niugini.

Mitupela i go long hotel na skruim toktok long politik. Mi tokim em long win bilong Enga rijinol memba, Peter Ipatas, husat i winim pinis. Mi tokim em tu long win bilong Wenge bratas insait long Morobe na tu long win bilong papa na pikinini Somare, husat i brukim rekot bilong PNG politik. Mipela i lukim tu wanpela bilding gavman i bin yusim long wok bilong Sanlain insait long Hong Kong na toktok liklik long dis-



• Olgeta de ol rot bilong Hong Kong i save pulap long ol manmeri na ol ka. Foto: Zanang Zazoring.

Ol lek bilong pik na kau i hangamap long rop, olsem tasol long ol kakaruk na pisin. Ol kain kain frut yu save long graun, olgeta i stap long strit bilong Hong Kong em yu ken baim na kaikai. Pe bilong wanpela muli em faiv o siks Kong Kong dola long san, na long nait, pe i go antap long 9 na 10 Hong Kong dola. Yu mas baim, sapos yu laik stap laip yet long graun.

Bihain mi wokabaut liklik i go long narapela sop we mi lukim ol i salim sampela rok rok insait long bikpela waya bokis. Mi askim wanpla man na em i tok, em i bilong kukim na salim long ol man i baim na kaikai. Mi sakim het tasol na skruim wokabaut i go. Em i tru - long wanem, insait long Malaysia tu, ol i save kaikai rok rok. Mi tingim yet long 1994, insait long hap bilong Petaling-Jaya, em wanpela hap bilong Kuala-Lumper siti. Mipela i go sindaun na ol i kukim na bringim 4-pela dis rok rok. I gat planti arapela abus tu i stap, olsem kakaruk, fis, kuka, pik na arapela, olsem na mi no laik kaikai rok rok yet. Planti kastam bilong Asia i wankain.

Long Hong Kong, mi no laik kaikai insait long hotel, long wanem, pe bilong kaikai i antap tru. Wanpela plet kaikai pe bilong en olsem \$HK140.00 na i go antap, olsem na mi mas go long ol restaurant na kisim kaikai long pe aninit long \$HK50.00. Wanpela plet noodle na kap kofi nogat swit

Inglan, mi lukim olsem i no gat wanpela samting i kamap, blut i no kapsait, olgeta pipel i bisi long bisnis bilong ol yet na ol i no wari long arapela samting. Wanpela man i tok, em ol bikman tasol i putim flek bilong Britain i go daun na putim flek bilong China i go antap na em tasol. Dispela man nem bilong en Peter, na em i givim mi bisnis kat bilong en long wok bilong ol telefon, fax na long telekomyunikesen.

Stori i stap olsem. Long bipo 200 yia i go pinis, Britain i kirapim Opium Woa na long tupela paat, China i lus olsem na Hong Kong i go aninit long pawa bilong Inglan. Toktok i stap longpela taim inap wankel i kamap na Britain i lusim Hong Kong i go long pawa bilong China.

Hong Kong em i ples bilong ol maniman. Tasol i gat ol rabismanmeri tu i stap. Wanpela man i wok long winim musik long ol manmeri i mas sori na givim em kaikai na mani samting. Mi lukim olsem, nogat man i gat wari long dispela man. Long strit, mi lukim wanpela rabisman klos bilong en i deti tru na em i slip na singaut i stap. Mi go na mi givim em sampela koin mani na mi ken lukim em i amamas tru na lap na tok tenkyu long tokples bilong en. Husat i save, mi lusim na mi go pinis. Mi bungim narapela rabisman gen na mi givim em \$10 na mi go pinis.

Em i 9 Septemba, na mi

gela. Na yu save? Mi bagarap pinis long buai, olsem na mi mas lus tingting long Papua Niugini long sotpela taim. Long pasim maus bilong mitupela, mi kisim kopi bilong National Niuspepa mi bin baim long Port Moresby na givim Henry long ritim.

Long wanpela nait bihain long bung, mi lus insait long siti, long wanem ol bilding i luk wankain. Mi raun raun samting olsem 4 taims. Bikpela samting em yu mas save long nem bilong bilding, strit namba na rot. I gutpela yu mas kisim teksi na go kamap stret long hotel, tasol em i samting bilong mani. Olsem na sapos yu laik i go long Hong Kong yu mas go wantaim bikpela mani, na tu, yu mas i gat tiket bilong kam bek long kantri bilong yu.

Mani bilong mi long hotel i sot olsem na mi mas kam bek wan wik bipo long bung i pinis. Pe bilong hotel insait long wan wik em i winim \$HK6,000. Sapos yu gat wantok long ovasis, yu mas go na stap wantaim ol. No gat pasin wantok i stap long Hong Kong we ol bai sori long yu.

Mi mas i go long Air Niugini Opis long Central Square na senisim tiket na kam bek. Long senisim tiket, ol i sasim mi narapela \$HK600 long wanem, dispela em i spesel tiket. Mi mas lusim Hong Kong long Mande 14 Julai, olsem na plen bilong mi long go long bikpela China em mi lusim.

Perth siti i stail moa long go lukluk

i kam long pes 15

Perth i stap longwe long ol arapela siti na laip-stail bilong ol pipel long hia i no olsem ol lain long ol arapela biksiti.

Ol pipel i save isi isi tasol long wanem wok bilong ol, i no kain ol haraip hariap olsem long Brisbane na Sydney.

Perth tu i gat planti ol pipel bilong Esia, Pasifik, na ol arapela kantri, na i no ol waitman meri tasol. Bikos ples i no bikpela ol manmeri long dispela hap i save helpim ol arapela yet, na sapos yu wanpela man long narapela ples, ol bai helpim yu gut tru. Namba wan samting tru mi wokim em long traim painim sampela Papua Niugini husat i skul i stap long dispela hap.

Tupela tasol i skul i stap long yunivesiti, tasol mi kisim taim long painim tupela long wanem ples i bikpela tru na i hat long painim tupela.

Perth i gat tapela bikpela strit, we ol bikpela haus bilong bisnis na ol arapela stua i stap long dispela hap.

Perth tu i gat ol olupela samting bilong ol lain husat i kam long dispela ples, na i gat kain kain ol stori. Sampela ol haus bilong bipo i stap yet, nogat bagarap i kamap long dispela ol haus. Wanpela bikpela bisnismen bilong Australia, Alan Bond i bin stap bipo long Perth na planti samting ol haus na bisnis i stap long dispela hap.

Perth tu i gat nem long winim dispela Amerika Kap, wanpela resis namel long Australia, Amerika, Nu Silan na Inglan.

Ol lain long Perth i save laikim pilai kriket na Ausie Ruls. Perth i gat dispela bikpela haus ol i kolim WACA, we ragbi tim bilong Westen Australia i save stap insait

Arere tasol long Perth i gat wanpela taun i stap ol i kolim Freemantle. Dispela em olgeta lain husat i save wok long ol konstraksen kampani, o ol liklik manmeri bilong dispela hap i save stap.


Perth tu i gat sampela gutpela haus long Australia. Planti bikpela bisnismen long Australia i baim ol kain haus, we i save stap arere tasol long dispela bikpela wara, Swan.

Mi bin raun long ol arapela hap bilong Australia, tasol Perth i winim olgeta, long wanem em i wanpela taun we i gat liklik stail bilong em yet.



Mi tingting long go bek long Perth wanpela taim, long wanem siti i gat planti samting we mi laik lukim tru.



• Joe i sanap wantaim Rod Boucher, wanpela niusman bilong Tasmania.




93FM YUMI FM



NAUFM

YUMI FM

PNG FM PTY. LTD.
Trading as
NAUFM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995



• Joe i sanap arere long ol pepa bilong em we em i soim ol arapela wan wok long dispela kibung.

93FM YUMI FM Redio Stesen bilong yumi yet Harim olgeta gutpela program long 93FM YUMI FM

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnismen ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM YUMI FM

Salim rekwest i kam long: **YUMI FM** request
Locked Bag 93
Port Moresby, NCD.
Fax: 320 1995

KANAGE



i kam long pes 11

■ Kanage bilong Enga provins. Wanpela nait Kanage na bikbos go long wanpela klub long dring. Tupela bosim wanpela tebol na bikbos odarim wanpela SP botol. Na Kanage odarim wanpela Pepsi loiwara dring.

Bikbos i lukim na i no stret. Bikbos laikim olsem tupela wantaim mas dring SP bia. Orait Kanage tok klia nau long bikbos bilong em: "Bikbos, nau long Enga, yu save. hevi bilong lo na oda i bikipela. Olsem na ol lain long SP faktori, hsuat i save mekim SP bia na Pepsi i masta maining olsem long dispela taim nogut. "Plis Enga Pipel, Stap Isi". Dispela em mining bilong Pepsi, olsem na mi bai dring Pepsi na stap isi. Nogut mi joinim yu na s'krum hevi bilong lo na oda".

Bikbos harim na bekim: "Kain olsem tenkyu tru, sevim sampela bia bai mi wanpela spak".

Chris Abeo
BOROKO

■ Kanage i stap long Madang taun. Wanpela apinun, em wantaim tambu man go dring long Madang Hotel. Misis Kanage kukim kaikai pinis na sindaun wet i stap. Na tokim pikinini: "Singautim papa i kam, kaikai i redi pinis". Pikinini go sindaun long leta na singaut i stap. Sem taim mama i autim traipela mama bilong kapupu stret. Pikinini harim na askim: "Em wanem samting". Na mama i bekim: "Pikinini, yu stap isi. Mi sutim garamut bilong papa long harim na kam kwik."

I no longtaim Kanage i kam kamap. Na Misis hatim em nau: "Yu yangpela man na painim meri raun. Nogat sem bilong yu. Lukim yu yet, yu traipela kela man nau ya. Mi holim wanem kain kela na ol meri holim wanem kain kela. Em wanpela kela tasol ya."

Ol manmeri husat i harim kros i kam bung i harim dispela na lus wanwan long haus bilong ol.

William Gawi
MADANG

■ Kanage em wanpela bus kanaka bilong Kaintiba eria bilong Morobe provins. Em i no lukim taun o siti long 50 ya olgeta. Em save lukim ol manmeri i dres ap olsem waitman meri long olgeta Sande na save wari stret, olsem em i laik bihanim ol. Olsem Sande, em save stadi long wanem klos laplap ol i werim.

Orait wanpela de, helikopta bilong CRA Maining kampani i kamap long ples. Na kisim em i go long Lae siti. Em go insait long Papindo stua long Eriku na stat nau long baim ol samting em tingim ol manmeri long ples save werim.

Em tingim su na baim soka su, em paul long tawol bilong wasim pes na baim bebi tawol (nepi), em paul long baim aiglas bilong putim long san taim na baim aiglas bilong painim pis long wara, em paul na baim kondom na baim toilet rol

Em go bek long ples na long Sande moning, em lukim ol manmeri bilas gut tru na go long lotu. Em tu stat supim long ol klos laplap bilong em. Na wok-abaut i go long haus lotu.

Olaman! Lukim Kanage. Nepi i stap long nek na traipela kondom i stap long beksait poket, na soka su long lek, na toilet rol long wanpela han na pasim long lek olsem soken.

Ol manmeri lukim Kanage na i no tingting long lotu. Olgeta pilim fani na stat long lap na ronawe long haus lotu i go bek long haus.

Berry Elias
LAE

■ Lapun Kanage em Kawas nogut bilong Buka. Na save wok long Takubar Plantasin long Rabaul, Is Nu Briten provins. Wanpela taim em wantaim ol wantok i kalap long bulldog bilong go kisim ko.onas. Ol ron i go na i no longtaim ol kalap nogut long lukim Kanage pundaun long beksait.

Neks de em Kanage go long haus sik. Na ol nes askim long krismas bilong Kanage. Na Kanage bekim olsem em i gat 10-pela krismas. Nes tanim na skelim pes bilong Kanage na tok: "Hei lapun! Em krismas bilong ol mangi ya." Kanage kirap na tok gen: "Na 9 bai olsem wanem". Na nes i tok: "Em bilong ol mangi yet". Kanage les tasol na tok: "Pikinini, maski mekim nating long 1."

Terry J. Ragi
KOKOPO

Masalai kilim olgeta brata na liklik brata tasol i stap laip

BIPO bipo tru i bin gat 12-pela brata na ol 11-pela i strongpela na ol fitman long pait. Tasol las brata bilong ol tasol em i no strongpela man na i no fit long mekim ol kain samting olsem. Olsem na olgeta brata bilong em i no save laikim em na ol i save paitim em, krosim em na sampela taim ol i no save givim em kaikai.

Wanpela nait olgeta i go painim abus long bikbus na dipela liklik brata i stap em yet long haus bilong ol i stap. Haus bilong ol i haus tru. Ol i save slip nating i ong hul bilong wapela bikipela ston.

Bikipela mun i lait na bikipela win i kamap na ol maunten i pairap na dua bilong ston ya i pas na em stap insait loing tudak stret.

Yangpela boi ya i sindaun i go na laki tru dua bilong dispela ston ya i op gen na isi tasol em kisim ol samting bilong em na go ausait long dispela giaman haus bilong ol na go slip long ausait i stap.

Bihain ol bikipela brata bilong em i kam bek long haus wantaim ol abus na ol kaikai bilong kukim na kaikai.

Em nau liklik brata ya i siksti i go tokim ol brata bilong em i ong wanem samting i bin kamap long hul bilong ston ya. Na ol i kirap sarapim em na tok nogutim em na tok sapos yu laik orait yu ken slip ausait long kol win.

Tasol yangpela brata i strong nogut tru na tokim ol brata olsem, wanpela samting i pasim dispela hul bilong ston ya, noken go insait long slip.

Em nau ol strong na kisim ol abus na ol kaikai i go insait long haus bilong ol insait long hul bilong ston ya na mekim save long kukim na kaikai i stap. Olgeta brata i amamas gut tru na mekim save long kaikai na slip nabaut i stap. Tasol liklik brata i pret na i no laik go insait long hul bilong ston ya. Olsem na em slip tasol long ausait.

Long biknait taim olgeta lain i slip indai olgeta, bikipela nais na pairap tru i kamap



Liklik brata husat i slip ausait i ron go long dua na singaut, mi tok long yupela i mas harim tok na yumi olgeta slip ausait. Tasol yupela olgeta i sakim tok olsem na yupela strong na kam ausait nau.

Em tok olsem tasol na sanap lukluk i stap bikos i nogat wanpela samting em inap mekim long sevim laip bilong olgeta 11-pela brata bilong em.

Olsem na olgeta 11-pela brata i dai insait long hul bilong dispela bikipela ston ya.

Nau sapos yu go long dispela hap bilong Maunten Ilu long hap bilong Tari, Sauten hailans provins, bai yu lukim dispela bikipela hul bilong ston i stap.

Buddy Boi
(Igiri)
Hagen

long dispela hap maunten. Klaut na maunten i pairap na olgeta brata insait long hul bilong ston ya i kirap nogut na laik painim ples long ron go ausait. Tasol nogat, bikipela ston long dua bilong dispela hul i pas na olgeta brata i lok insait.



Mi wari tru bikos mitupela meri bilong mi i abrusim tupela krismas pinis taim mipela i marit tasol mipela i nogat pikinini yet.

Dia Laiplain,

Mi na meri bilong mi i abrusim tupela krismas pinis bihain long marit bilong mipela, tasol mipela i nogat pikinini yet. Maski mi kisim em i go long dokta long sekap na klinik wantaim long planti taim, nogat tenis i kamap.

Kain olsem mi tingting strong nau

Marit tupela yia tasol nogat pikinini yet

long salim em i go bek long papamama bilong em na kisim bek brat prais bilong mi. Na maritim narapela meri we i ken karim pikinini.

PUZZLED

Dia Pren,

Mipela i luksave long wari bilong yu na meri long yutupela i nogat pikinini yet bihain long tupela krismas bilong marit na stap wantaim.

Yu save olsem i mas gat man na meri long mekim bebi bikos kiau bilong tupela i mas bung wantaim long kamapim bebi.

Yu tok olsem yu kisim meri bilong yu i go long klinik planti taim. Tasol long yu yet yu askim ol long karimaut medikol sekap long yu?

Sampela taim em i save hat long ol man i akseptim olsem ol i no inap long wokim pikinini.

Inap yu go long dokta na bai karimaut tes long sekim sapos yu inap long wokim pikinini o nogat?

Mipela i wari taim yu tok bai yu lusim meri bilong yu na salim em i go bek long papamama bikos em i no karim pikinini. Mipela i ting dispela pasin na tingting i no stret. Yu maritim meri long karim pikinini tasol o yu gat laik long em na maritim em. Tingim, meri tu i mas wari nogut tru olsem yu tasol taim yutupela i no wok long hevimi bebi.

Sapos asua i stap insait long bodi bilong yu, yu bai nogat pikinini, maski sapos yu rausim meri bilong yu tru na kisim narapela meri. Olsem i moabeta long yu i skelim gut tingting bilong yu bipo yu brukim gutpela marit bilong yutupela.

Sampela taim asua long meri i no karim pikinini em taiming long yutupela i slip wantaim i no raitpela taim. Bilong kisim moa save, i moabeta long lukim dokta, sista long haus sik o famili plening klinik long kisim gutpela kliapela tok tok long dispela samting.

Laiplain.

Noken kilim ol waitman insait long kantri

Dia Edita,

Mi wanpela yangpela man insait long ples Tinganagalip long asples Rabaul, Is Nu Briten provins. Mi laik toktok long ol raskol pasin insait long kantri, egensim ol ovasis manmeri i kam wok insait long Papua Niugini.

I no longtaim i go pinis, mi harim olsem ol raskol o man nogut i kilim wanpela ovasis wokman bilong Ostrelia long Mosbi. Long Rabaul, mi harim wankain stori tu.

Mi pilim olsem dispela i no gutpela long ai bilong kantri long ol ovasis hap. Olsem wanem bai mipela kisim ol saveman meri bilong ovasis i kam helpim mipela, sapos mipela mekim olsem long ol long hia?

Ol ovasis manmeri i kam long hia long helpim mipela. Olsem na mipela mas sapotim na helpim ol. Na noken givim birua nogut long ol.

Mipela nidim ol dispela ovasis lain long helpim developim kantri bilong mipela. Mipela tasol i no inap long developim dispela kantri. Olsem na kain pasin nogut i bagarapim tasol nem bilong mipela.

Mipela mas soim kristen pasin long ol kain helpim wokman meri olsem Jisas i tok: "Lavim narapela olsem yu lavim yu yet".

**Steven T. Hokira
RABAU**

Promis bilong Gavana Agiru i no karim kaikai

Dia Edita,

Mi wanpela grasrut mangi bilong ples long Pangia eria bilong Sauten Hailans provins. Nau mi stap long Wes Nu Briten. Na laik autim tingting bilong mi long wok bilong gavana Anderson Agiru.

Bipo long taim bilong kempen long nesanel ileksen, Agiru i tok olsem sapos em i winim ileksen, ol namba wan wok em bai lukluk long mekim em:

- Wiru-Luk rot;
- Ol haus sik; na
- Ol komyuniti skul.

Mipela ol pipel bilong Las Wiru i gat planti moa kopu na ol arapela samting bilong salim. Tasol mipela nogat rot bilong kisim ol dispela samting i go salim long kisim mani.

Rot nau i stap i no luk olsem wanpela rot em ka i ken ron gut long en. Em i luk olsem wanpela bus rot stret. Na tu taim ol pipel bilong Wiru i laik kam long Pangia, ol save kirap long biknait yet. Na go kisim PMV long Pangia na kam long taun.

Olsem na nau mipela ol pipel i wetim tok promis bilong Gavana Agiru. Bikos em i kisim pawa nau, mipela laik lukim dispela promis i mas karim kaikai.

Tingim olsem pawa i stap long han bilong mipela ol pipel ya.

**Chris Yaluwe
KIMBE**

Man painim 4-pela brata

Dia Edita,

Mi painim ol dispela 4-pela brata lain bilong mi. Sapos yu wanpela brata na susa i save long ol dispela brata i stap we, orait ples tokim ol i mas raitim leta i kam kwik long mi.

Nem bilong ol dispela brata em Nickson Kalix Nikima, Timothy Jim Miname, Lawrence Yoll Itaita na Peter James Wasi.

Hia em adres bilong mi:

MOSA NBOL SECURITY SERVICE,
PO KIMBE
WEST NEW BRITAIN PROVINCE.
N.G.I.P.

Tenkyu tru long prinim pas bilong mi.
Tiss Kepas Lakowa

•Salim pas bilong yu long dispela adres:
EDITA
WANTOK NIUSPEPA
P. O. BOX 1982,
BOROKO.
NATIONAL CAPITAL DISTRICT

Wokim Pangia-Kanpena rot

Dia Edita,

Mi wanpela mangi Pangia long Sauten Hailans provins. Nau yet mi stap long Hagen, biktaun bilong Westen Hailans provins. Mi laik sapotim pas bilong brata Philip Warea na Chris K. Taiua. Leta bilong tupela i askim ol bikman na gavman long luksave na stretim Yalibu Pangia rot.

Mi laik joinim dispela toktok olsem mipela ol pipel bilong Molo insait long Pangia save wok-abaut long bus rot i kam kamap long Hagen taun. Na dispela save givim bikpela mekimsave stret long mipela.

Olsem na mipela laikim rot long Pangia i go kamap long Kanpena i mas kamap. Kamap bilong dispela rot bai givim bikpela helpim stret long mipela.

Mipela lusim na dispela askim wantaim nesanel Palamen memba bilong mipela, provinsal na nesanel gavman long skelim na mekim sampela samting.

Em tasol.

**Roman Adam Windi
Pangia
Sauten Hailans**



Memba Alois Koki mas tingim Mamusi pipel

Dia Edita,

Mi wanpela mangi Mamusi long Wes Nu Briten provins. Mi laik mekim sampela toktok long wok bilong nesanel Palamen memba bilong mipela ol Mamusi pipel, Alois Koki.

Memba Alois Koki i makim mipela long 21 yia olgeta nau. Tasol i nogat wok kamap o devel-

opmen i sanap long Mamusi. Tasol ol pipel i aipas na votim em gen.

Mipela ol Mamusi pipel i stap olsem ol tumbuna bilong bipo i save harim ol samting long het na go long ples. Olgeta hap bilong Papua Niugini i develop pinis, na olsem wanem long mipela ol Mamusi pipel.

Memba bilong mipela i slip o dai pinis? Na nogat wanpela wok i kamap long Mamusi.

Em tasol na yu husat Mamusi man o meri laik sapotim o egen-sim dispela leta, plis rait long dispela niuspepa. Na bai i ken ritim.

**Merkus Kevu
KIMBE**

Wokim Vanimo-Aitape na Waulink-Fatima rot

Dia Edita,

Mi wanpela mangi Lumi long Sandaun provins. Nau yet mi stap long Kimbe. Mi laik sapotim leta bilong brata Samson Sowa. Leta bilong em i bin askim nesanel gavman na ol nesanel politisian bilong Sandaun long lukluk na wokim Vanimo-Aitape na Waulink-Fatima rot. Mi laik skruim tok olsem ol bikman bilong

Sandaun provinsal gavman na nesanel gavman tu i msas lukluk kwik long dispela askim. Bikos kamap bilong ol dispela rot bai givim bikpela helpim tru long mipela.

Dispela em long wanem, long longpela taim nau mipela ol pipel bilong Lumi, Yangkok na Nuku long Sandaun provins i no lukim wanpela developmen liklik. Bikpela as bilong dispela em

i nogat rot. Olsem na plis luk-save long dispela askim na kra i bilong mipela.

Em tasol liklik toktok bilong mi. Na mi lusim long han bilong yupela ol nesanel memba bilong Sandaun long toktok strong long dispela. Plis helpim mipela.

**Jerom Malu
KIMBE**



• Man ya i amamas long buai bilong em taim em i soim long ol manmeri.

Bisnis bilong salim buai na smok bagarapim Lae siti

Dia Edita,

Mi wanpela mangi Mendi long Yalibu, Sauten Hailans provins. Nau mi stap long Lae siti, Morobe provins. Mi laik toktok long pasin nogut sampela manmeri save mekim long bagarapim namba tu bikpela siti bilong mipela, Lae.

Mi save stap long 3 Mail. Na lukim planti manmeri i longlong na salim buai na smok nabaut long olgeta hap kona bilong rot. Na tu long ai bilong ol bikpela stua na haus mani o benk.

Sem taim, ol save spetim buai long wol bilong ol dispela stua o benk. Mi laik askim

sapos ol dispela manmeri i gat tingting o nogat? Ating ol pig na dog mas karim ol ya?

Nau mi laik askim yupela ol dispela manmeri olsem plis yusim gut het bilong yupela. Na noken salim buai na smok long kainkain hap kona bilong siti. Salim buai long ol maket ples tasol.

Sapos yupela ol pikinini bilong man, yupela bai senisim pasin sapos yupela ritim dispela leta.

**Simon Yala
3 Mail
LAE**

Maski ranawe long Is Sepik

Dia Edita,

Planti taim mi save lukim ol Sepik i kalap long sip na go long ol narapela taun o provins. Ating ples bilong mipela i nogat graun o kaikai na mipela laik go long ol narapela provins?

Ples bilong mipela i gat planti kaikai olsem saksak, taro, mami na pis. Na tu mipela i gat planti graun. Bilong wanem na mipela lusim provins na go developim

provins bilong ol narapela lain? Wewak taun i bagarap na slip sore i stap. Wankain tu long ol liklik stesin insait long provins olsem Maprik taun.

Mipela mas stap long hia na developim provins bilong mipela. Mipela noken ranawe go long ol narapela hap.

**Joe Ambros
Maprik
Is Sepik**

Yumi mas strongim bilip long Jisas Krai

Dia Edita,

Mi wanpela mangi Wewak tasol nau mi mekim wok misin na stap long Lae, Morobe provins. Mi laik mekim wanpela toktok i go long ol Kristen manmeri.

Mi laik tok olsem yumi mas strongim bilip bilong yumi long Jisas Krai. Tingting na bilip bilong yumi i mas stap long em wanpela tasol.

Baibel i tok yumi mas givim bel bilong mipela olgeta long Bikpela na kamap holi. Olsem na yumi mas abrusim olgeta kain pasin nogut bilong dispela graun. Yumi mas bosim laik na ol tingting nogut i save kamap long yumi.

Yumi mas bihainim ol gutpela pasin em God papa i laikim yumi long bihainim.

Baibel i tok moa olsem sin i save givim pe long ol wokboi bilong em. Dispela pe em i dai tasol. Olsem na mipela mas tingim dispela na givim bel bilong mipela long Jisas Krai.

**Francis Quenten
LAE**

Ol wokmeri long Aitape save jeles tumas

Dia Edita,

Mi wanpela man husat i stap long Aitape long Sandaun provins. Mi no wanpela man husat i save raitim pas i go long edita bilong dispela niuspepa. Dispela em i namba wan taim bilong mi.

Wari bilong mi i go olsem. Insait long kampani bilong W&R Parer P/L hia long Aitape, ol meri ya i save gosip o tok beksait na jeles tumas long ol yet. Dispela pasin i save kamap insait long opis, na tu long ausait wantaim we ol pablik i luk-save.

Mi laik tok olsem dispela i no gutpela pasin. Em i rabis pasin.

Mi laik askim yupela ol dispela susa olsem yupela i mas bihainim Jisas Krai. Pasin bilong wanbel i mas stap. Olsem na yupela mas go na toksore hariap tru long ol lain yupela save tok beksait.

Tenkyu tru na yu husat i bekim dispela pas bai mi amamas tasol long ritim.

**Moris Mbiet
AITAPE**

Kimbe plisman, slek long wok

Dia Edita

OL plisman bilong Kimbe i no mekim wok bilong ol gut. Ol putim yunifom na raun nating long ka bilong gavman. Ol i spit i go i kam na soim ol yet long ol manmeri olsem ol plisman, tasol ol i no mekim wok tru.

Taim i gat wanpela trabel i kamap long wanpela plentesen blok o ples, i nogat wanpela plisman i save kamap hariap inap trabel i pinis. Ol i soim dispela pes bilong ol na stat painim man tasol sori tumas planti taim ol i no save kisim ol trabel man. Mi laik ol plisman i senisim dispela kain pasin bilong ol na mekim wok gut. Ol trabel na bikhet pasin i no inap go bikpela sapos ol plisman i wok gut.

Em tasol wari bilong mi na sapos yu husat i laik sapatim mi, mi bai hamamas long ritim pas bilong yu long Wantok.

Kumul Dhichol KIMBE

Noken pik poket long ol man bilong ples

Dia Edita

Mi wanpela mangi long ples Baiya insait long Westen Hailens provins. Mi laik sapatim pas bilong Opints Karpal. Pas bilong em i bin kam aut long Oktoba 23, 1997 long Wantok. Tingting bilong mi em wankain long Opints Karpal. Olsem na mi no inap raitim wankain stori.

Mi lukim ol mangi long taun i save pik poket long Warakum. Plis yupela go long ples papa karim yupela long en na planim kopi, pototo, kumu na lukautim pik. Yu inap kisim mani long ol dispela samting. Yupela noken katim ol bilum trausis na kisim mani bilong ol liklik lain. Taim yu mekim olsem, yu tokim yu yet olsem yu wanpela pipia man, nogat graun na ples bilong yu. Long PNG nogat wanpela man inap tok em i nogat graun. Olsem na mi askim yupela long lusim dispela rabis pasin bilong yupela. Na long helpim yu moa yet, plis ritim dispela baibel ves, Romans 6:23 na stap isi.

Joe Olgm BAYER RIVER

Pasin bilong wok bung inap strongim yumi

Dia Edita

Sapos yu bungim ol stik long wanpela mek pas, na traim long brukim, bai yu painim hat tru long brukim.

Tasol sapos yu rausim wanpela na traim long brukim yu inap brukim isi tasol. Wankain tingting i stap tu olsem, sapos yu laik brukim wanpela kantri yu mas brukim ol pipel long hap hap na bihain yu kontrolim ol.

Tasol sapos yu laik kamapim wanpela strongpela kantri, yu

mas strongim tingting bilong ol pipel long wok bung wantaim. Dispela toktok bilong wan pipel wan kantri em i no tok pilai. Em i tok tru. Nogat wan pipel bai i nogat wan kantri. Tude, yumi traim glasim pipel bilong Papua Niugini na skelim.

Tru tru PNG em i stap wan pipel na wan kantri? Watpo na kain ol tok i stap. Mamose. Hailens. Niugini ailans, na Sauten rijen i stap. Watpo na yumi save go insait long ol wan-

ples, wanpisan, wantok, na strongim sait bilong yumi? Mi bilip PNG i no inap go strong inap yumi tingim yumi yet olsem pipel bilong PNG na lusim tingting olsem mi bilong wanpela rijen.


Em tasol wari bilong mi na sapos yu husat i gat laik long sapatim mi plis rait i go long Wantok na bai mi ken ritim.

Keik Mok MOSBI

Strongim pikinini spot

Dia Edita

Mi wanpela mangi husat i save sapatim tru ol pilai bilong PNG i go long ovasis long pilai. Taim ol i save win na hapim nem bilong kantri bilong yumi long wol, man mi save hamamas tru. Yes mi bilip PNG i gat planti ol gutpela spot manmeri. Planti taim yumi save painim tasol ol dispela spot manmeri insait long ol siti na taun. Tasol yumi save lus tingting long ol gutpela spot manmeri long ol ples. Mi ting gavman i mas lukluk long dispela na traim painim rot bilong strongim pasin bilong pilai long ples. Wanpela rot mi inap tingim we gavman i ken mekim em long putim mani na ol saveman bilong pilai i go long ol ples na skulim ol pikinini long pilai. Ol pikinini i mas lain long pilai stat long liklik yet inap ol i go bikpela. Long dispela rot ating PNG inap kamapim sampela gutpela spot man na sampela yia bihain yumi



• PNGSC opisa John Hou i soim wanpela sumatin long rot.

inap brukim moa wol plis rait i go long rekod na tek pat long Wantok bai mi ken Olimpiks. ritim.

Em tasol bikpela wari bilong mi na sapos yu husat i laik sapatim mi

Spot Lava KAVIENG

PNG mas beten long ren

Dia Edita

Mi laik sapatim askim bilong Praim Minista bilong PNG, Bill Skate long askim ol pipel bilong PNG long beten long ren. Sapos yumi inap beten long ren senis bilong gavman na lukim senis i kamap, bilong wanem yumi i no inap brukim skru na beten long ren. Ating God i laik strongim bilip bilong yumi bilong sanap strong moa yet na beten long ren. Noken ting pasin bilong beten i mas stop bihain tasol long yumi kisim nupela gavman bilong Skate. Nogat. Yumi ol kristen bilong PNG i gat moa wok bilong mekim. Wanpela bikpela wok yumi

mas mekim nau long dispela taim, em beten wantaim na askim God long ren. God em i bos bilong san, mun na sta, ren, win na olgeta samting antap na aninit long graun. Olsem na God wanpela tasol inap senisim taim bilong biksan na givim yumi ren sapos yumi bilip tru long em na beten long ren.

Olsem na mi laik tok gen olsem mi sapatim askim bilong praime minista bilong yumi olsem yumi mas beten long ren.

Natug Hulung MADANG

Maski krai long pe na mekim gut wok

Dia Edita

Planti taim mi save harim ol wokman bilong gavman na ol bikpela kampani i save toktok planti long hapim pe bilong ol. Dispela em i gutpela askim. Tasol mi laik tokim yupela ol wokman husat i singaut planti long hapim pe. Planti bilong yupela ol lain i singaut long hapim pe i no save mekim bikpela wok. Mi wok planti taim long gavman opis na mi save lukim olsem ol man tru bilong wok i no save bikmaus long pe. Planti taim mi save lukim ol les mas i singaut tumas long kisim bikpela mani.

Traim na skelim pasin bilong yupela pastaim bipo long singaut long pe. Planti ol lain i wok long plentesin i save mekim bikpela wok na kisim liklik pe. Ol dispela lain i ken askim long pe i go antap na yupela ol gavman wokman lusim dispela gridi na mi pasin.

Em tasol, na sapos yu husat i gat laik long bekim pas bilong mi plis rait i go long Wantok bai mi ken ritim.

Konsen Sitizen WABAG

Holim strong pasin melenesia

Dia Edita

PLIS inap yu larim mi autim wari bilong mi. Planti taim mi ritim long niuspepa, harim long redio na lukim long televisen olsem ol planti senis na wok developmen long kantri i kamap bihainim tingting bilong ol saveman o konsalten long arapela kantri. Planti taim ol dispela saveman i no save bungim pasin melenesia wantaim save bilong ol. Ol i save givim baksait o lusim tingting tru long kalsa bilong yumi long PNG.

Ol hetman bilong ol dipatmen, na lida bilong provins na kantri tu i no save askim sapos ol saveman i bihainim kalsa bilong melenesia long wokim samting. Long dispela as planti gutpela pasin melenesia i no save stap insait long ol wok bilong ol saveman i kam long arapela kantri. I luk olsem pasin melenesia i wok long dai isi isi bikos nogat man i tingting long holim strong pasin melenesia.

Mi laik tok strong olsem God i givim yumi kalsa na pasin tumbuna na olsem yumi mas traim long holim strong ol dispela pasin. Mi bilip olsem bikos pasin melenesia i slek planti bikhet na paul pasin tude i kamap na i bagarapim sosaiti na kantri bilong yumi. Singaut bilong mi nau i go long ol lida, politisen, sios wokman na olgeta ol saveman long ples na taun long holim strong pasin melenesia.

Em tasol wari bilong mi, na sapos yu husat i laik sapatim mi, plis rait i go long Wantok bai mi ritim.

Hebron Cruze VANIMO

Kantri i lusim pasin bilong bihainim lo

Dia Edita

NAU yet long lukluk na tingting bilong mi, i luk olsem laip bilong ol manmeri na pikinini na kantri i wok long senis. Laip bilong ol manmeri na pikinini i wok long senis i go gutpela na nogut wantaim. Planti ol pipel i traim long mekim gutpela wok tasol planti moa pipel i traim long bagarapim sindaun bilong yumi. Pasin bilong dring spak, kilim man indai, stil, pamuk, i bagarapim tru sindaun bilong yumi. I luk olsem planti ol manmeri i no laik bihainim lo bilong kantri bilong yumi. Long tingting bilong mi, pasin bilong brukim lo, i stat long level bilong ol politisen, ol man bilong mekim lo na i go daun olgeta long ol grasrut. I gat wanwan lain tasol i strong long holim lo na skulim ol arapela long mekim dispela pasin. Ating ol papamama i mas skulim ol pikinini bilong ol long holim strong lo na bihainim. Sapos ol pikinini i no save bihainim lo insait long famili, dispela pasin bilong brukim lo bai i go bikpela na bagarapim sindaun long famili, ples, komyniti na kantri. Na tu mi laik yumi olgeta i mas tanim bel, bilip long God, pret long em na mekim ol samting long bihainim laik bilong em. Em tasol wari bilong mi. Sapos yu husat i laik sapatim mi, orait rait i go long Wantok niuspepa bai mi ken ritim.

Hebron Cruze VANIMO

God i gat gutpela plen long PNG


Dia Edita

NOGUT yumi tingting insait long bel olsem tru God i stap tasol ating em i no wok insait long kantri bilong yumi Papua Niugini. Dispela kain tingting em krangi tingting. God i gat gutpela plen long ol pipel bilong PNG na kantri bilong yumi. Insait long dispela taim bilong hevi olsem pait long Bogenvil, mani i sot long kantri, hevi bilong ais na biksan, lo na oda, nogat wok na planti ol hevi bilong kantri, yumi olgeta i mas klia olsem God i stap long sait bilong yumi na helpim yumi i stap. God i gat taim long harim krai bilong ol pipel bilong en. Em i putim ia na wet tasol long yumi long tanim bel. Long lusim sin pasin na go long em bilong kisim gutpela save na tingting bilong mekim wok. PNG em God yet i mekim na i putim yumi ol pipel bilong PNG long lukautim dispela kantri. Olsem na em i gutpela long yumi ol pipel bilong PNG long tenkim God long dispela na askim em long blesim kantri bilong yumi. Mi bilip God wanpela tasol inap bringim gutpela taim na sindaun long PNG.

Yes God i gat gutpela plen long PNG olsem na yumi ol pipel i stap long PNG i mas go long em bilong kisim klapela tingting. Em tasol wari bilong mi na God i blesim yupela.

Hebron Cruze VANIMO





Hon. Bill Skate, PM - Praim Minista TOKTOK I GO LONG KANTRI



"Yumi mas bungim olgeta Risoses bilong yumi long pait wantaim Draii"

Olgeta wanlain bilong mi long Papua Niugini, traipela san na hangre i no nupela samting long yumi. Olgeta taim, yumi save i gat we bilong pait wantaim kain hevi olsem.

Tasol nau, yumi stap long stat bilong wanpela taim nogut tru long histri bilong yumi. Sampela samting i soim olsem ating bai dispela em kamap olsem wanpela bikpela hevi insait long 100 yia.

Nambawan tingting bilong gavman bilong mi tete em long painim aut hamas bagarap tru dispela bik san na ais i kamapim.

Sampela nambawan saintis long wol i wok nau wantaim ol saintis bilong Papua Niugini na raun long olgeta hap bilong kantri long lukim wanem bagarap tru dispela bik san na ais i kamapim.

Taim dispela wok painim aut wok long go het yet, gavman bilong mi stat pinis na helpim ol manmeri. Mipela givim pinis moa long 4 milion kina i go long wanwan distrik bai ol i ken sapotim ol manmeri i bungim taim nogut.

Mi laik tokaut olsem inap long 22 yia, Kantri bilong yumi i bin stap aninit long Hevi bilong Gupela Menesmen. Gavman bilong bipo i bin luk daun long planti bikpela hevi.

Ol i no bin lukluk long wanem samting bai kamap o hau bai yumi redim yumi yet na abrusim kain hevi olsem long bihain taim.

Mi save olsem dispela gavman nau i no inap ron wantaim Hevi bilong Gupela Menesmen.

Long dispela as tasol na mi laik bai yumi glasim gut dispela hevi bilong Draii gut. Wapos yumi save long wanem samting i wok long kamap, bai yumi ken kamap wantaim gupela plen.

Yumi ken tanim dispela ol hevi i go kamap gupela rot bilong yumi ken painim bel isi sapos yumi save long wanem bagarap stret i wok long kamap. Dispela em ol salens mipela nau wok long bungim.

Gavman bilong mi na mi yet laik yusim dispela taim nogut na mekim gupela samting na helpim olgeta manmeri long ples. Ol samting inap kamap pinis long bipo.

Dispela em wanem samting mipela wok long plenim.

Tasol yumi mas save gut long sampela samting long stat yet. Yumi mas save gut long wanem samting gavman i ken mekim na samting gavman i no inap mekim.

Gavman i no inap baim kompensesen long wanem samting draii i kamapim.

Olsem arapela hevi, dispela bikpela Draii em kamap long laik bilong God. Mi na gavman bilong mi i no inap tokim wanpela man olsem nogat man o meri bai dai bikos long dispela draii.

Tasol harim gut ol wanpesis bilong mi. Gavman bilong mi na mi yet i bai skelim helpim bilong mipela i go long ol manmeri husat nau bungim taim nogut.

Gavman i tokaut pinis olsem em bai givim helpim bilong em i go tasol long manmeri husat laikim tru helpim pastaim. Gavman nau i ken rausim sampela samting long han bilong ol manmeri i stap orait na givim i go long husat i painim taim nogut.

Mi bai askim ol pren bilong mipela long ovasis olsem Ostrelia, Nu Silan, Gret Britan long helpim na tilim kaikai na sevises. Ol redi tasol long helpim mipela.

Tasol ol gupela pren bilong mi, mi no ken haitim wanpela samting long yupela. Larim mi tokaut klia long yupela. Olgeta saintis mi bin toktok wantaim i bin tokim mi olsem dispela draii i no inap pinis hariap. Na tu sapos ren i kam, em bai long sotpela taim tasol.

Olgeta liklik wara yu gat. Na wanem ren wara bai yumi kisim em bikpela samting tru. Yumi mas wok gaden yet bikos taim ren kam bai yumi ken i gat taim long planim kaikai.

Bikos long dispela ol hevi, mi kamap pinis wantaim ol sotpela na long tem plen bilong bihainim.

Mi askim olgeta manmeri long sapotim Lafanama komiti long wok bilong ol. Mi askim ol Gavana na Provinsal Edministreta na Disasta Reliv Komiti long wok klostu wantaim Nesenel Gavman na grup bilong em.

Provinsal Gavman mas wok bung wantaim ol Sios na arapela NGO grup long provins.

Mipela givim pinis kaikai na wara i go long ol manmeri husat i kisim bikpela taim tru long stap laip. Kos bilong kaikai long neks mun bai moa long K6 milion.

Mipela bai baim ol provins long tilim kaikai na wara na tu long sekyuriti ol bai givim. Dispela pasin bilong tilim kaikai na wara bai go inap long sampela moa taim.

Long tilim kaikai i go long husat hangre em bikpela samting tru. Tasol mi laik tok olsem pasin bilong lukautim wanwan i noken stap. Long wanpela wokabaut bilong mi, mi lukim long fes taim tru ol manmeri i no save long mekim wanpela samting. Dispela em ol man na meri husat i save tingting long ol yet.

Gavman bai helpim. Tasol mipela mas lukaut gut long pasin bilong: "Gavman tasol bai givim."

Mi askim pinis olgeta gavman oganaisesen long wok hariap na helpim ol manmeri husat stap long taim nogut.

Dispela draii bai bagarapim akrikalsas na resos sekta bilong ekonomi bilong kantri. Bungim dispela wantaim praes bilong ol kaikai long wol maket na bilong moni maket, yumi ken lukim olsem em bai bikpela hevi tru.

Gavman, Bisnis na we bilong kisim moni long ples bai bagarap neks yia. Olsem na bai mipela plenim gut baset na painim we bilong hevi bilong bikpela draii.

Rot bilong painim klinpela wara em wanpela bilong ol bikpela hevi Asesmen tim i bin lukim. Ol tok olsem dispela em wanpela bikpela hevi we kamapim planti sik.

Narapela samting ol i bin lukim em bikpela hevi nau stap wantaim ol meri bilong yumi. Ol mama na yangpela meri nau wokabaut longpela hap long kisim na karim wara.

Papa na ol pikinini man mas helpim ol mama bilong yumi long dispela taim nogut na helpim long karim wara na arapela samting.

Ripot i tok tu olsem raun wara we i save saplaim pawa nau go daun tru. Olsem na yumi ol lain stap long siti na taun, i no ken ting olsem yumi nau stap long guttaim. Levul bilong wara nau i stap damblo tru. Olsem na mi askim yupela savim wara. I no ken westim wanpela liklik wara.

Bai yumi mekim wanem long winim dispela hevi na tanim kamap gupela rot bilong stap amamas?

Nambawan samting; nogat wanpela samting long dispela graun bai yumi kisim nating. Long gupela taim, yumi save wok gaden long painim kaikai. Olsem na kaikai yumi kisim long arapela i no ken ting kamap fri.

Yupela mas wok long ples na distrik bilong yupela wanwan long kisim dispela ol helpim i kam long gavman we ol NGO bai karim na tilim.

Dispela ol wok bung wantaim bilong komyuniti long wokim nupela hulwara na wara projek na long digim baret mas kamap bikpela long wanwan ples.

Olgeta manmeri long ples bai amamas taim olgeta dispela samting i kamap. Na bai yupela i gat gupela klinpela wara na tu gupela rot bilong bungim wara long bihain taim.

Gavman bilong mi putim sait klostu 15 pesen bilong moni long wokim nupela wara projek long ples.

Mi askim ol lain bilong givim helpim (Aid donors) na Wol Benk long sapotim dispela komitmen neks yia na skelim moni, saveman bilong wok na resoses long kirapim nupela klinpela wara projek long wanwan ples na salim wara i go long nupela ples bilong wok akrikalsas.

Long 1997, nogat wanpela ples long wol mas stap nating. Olgeta ples mas i gat wel-wara na arapela mas i gat gupela wara saplai, we gavman bilong bipo i no bin tingim na mekim.

Yumi mas mekim nau, stretim olgeta samting nau na i noken tingting moa long dispela hevi sapos kamap bihain.

Yupela i no ken tingting long bagarapim ol samting na askim gavman long kompensesen bikos long wara paip i ran antap long graun bilong yupela.

I noken askim long moni taim yupela mekim wok. Bikos em laik bilong yupela long kisim wara saplai olsem na gavman i no inap harim tok na baim yupela long kisim fri moni long gavman.

Kansel siaman, ol lida long ples na sif mas wok bung wantaim long painim gupela rot bilong helpim ol yet.

Dispela em wanpela hevi bilong kantri olgeta. Yumi olgeta mas wok wantaim. Bai mipela askim ol Provinsal na Lokol Levul Kaunsal long painim rot na stretim dispela hevi.

Mi laik askim ol Gavana long skelim 1998 Baset bilong ol i go long helpim ol manmeri long eria bilong ol. Kain olsem nupela wara projek na baret bilong karim wara. Gavman bilong mi bai sapotim yupela long bungim dispela ol projek.

Ol pablik sevens long nesenel na provinsal gavman bai helpim tu long sapotim dispela ol wok. Plis bai helpim long sapotim long wok bilong sekyuriti. Na DCA wokman mas wok na opim gen ol ples balus nau.

Ol Helt ofisa, Lens na DPI ofisa mas skelim ol resoses bilong ol i go long ol manmeri long ples. Bai yupela standbai long helpim na karim kaikai na saplai i go long olgeta manmeri long ples. Sapos olsem wanem, bai mipela askim ol ami PNGDF long helpim.

Bikpela samting tru, yumi olgeta mas wok bung wantaim na pait wantaim dispela hevi. Long soim arapela lain long wol olsem yumi ken wok bung wantaim na pait wantaim neserel disasta. Na tu long soim olsem yumi ken yusim dispela taim nogut na kirapim strongpela Papua Niugini.

Wantaim dispela, mi laik tokaut olsem Novemba 16 1997 olsem de bilong Stapim kaikai long olgeta hap bilong kantri. Mi askim olgeta lain husat i stap orait liklik long stapim kaikai namel long 6 kilok moning na 6 kilok apinun long Sande Novemba 16 na givim moni yu savim i go long draut reliv.

Dispela bai tokaut klia long arapela manmeri long wol olsem yumi long Papua Niugini i wokabaut olsem wanpela.

Long pinisim, draii na trait em save kamap long laik bilong God. Sapos gavman bilong bipo i bin tingting na wokim wara saplai na tingting stretim gupela sindaun long ples bai yumi no inap bungim kain hevi olsem nau. Tasol taim bilong hevi em taim bilong salens.

Yumi olsem wanpela kantri, mas bung wantaim wok long daunim dispela draii taim.

Yumi olsem wanpela kantri mas plen gut na wokim ol projek na sambai long wankain hevi bihain.

Tingim tasol wanpela bikpela samting. Long sampela hap bilong kantri taim yu toktok i stap, wanpela pren bilong yumi i wok long bungim taim nogut. Olsem na ol i nidim sapot bilong yumi pastaim long yumi.

Husat i bungim bikpela hevi mas kisim helpim pastaim. Jisas Kraist lainim yumi long laikim wanpela narapela. Yumi mas soim olsem yumi save bihainim dispela tok long pasim bilong yumi. Yumi mas wok bung wantaim, tilim kaikai na lukautim ol lain husat i sik, lapun na yangpela pastaim long yumi yet.

Ol manmeri long Papua Niugini, Mi olsem Praim Minista, singaut i go long yupela olgeta long wok bung wantaim na winim dispela taim bilong bikpela draii.

Tenk Yu Na God Blesim Yupela Olgeta.




Bik Bro

REBO



SIPAK MAIK





Sande 16th Novemba,
wanpela de bilong stopim kaikai

Harim Papua Niugini,
 ol manmeri long asples bilong yumi nau stap long taim nogut.

SOIM OL ARAPELA LAIN OLSEM YU KEN LUKAUTIM KANTRI
 BILONG YU



Stopim kaikai long wanpela de
 na givim helpim i go long Ples we nogat ren.

Praim Minista Hon. Bill Skate i
 tokaut long Sande, Novemba 16 1997 olsem
 Wanpela De bilong Stopim kaikai,
 i stat long
 6 kilok moning i go inap 6 kilok apinun.

I noken kaikai wanpela samting namel long dispela aua.
 Givim moni yu sevim long dispela taim i go long Draut Reliv Apil,
 long helpim husat i bungim taim nogut winim yu yet.

Givim donesen bilong yu i go long:

Draut Reliv Apil long wanem PNGBC Brens klostu long yu.



• Ol meri pablik sevan long Mosbi i gat namba long soka tu ya.


▲ • Yu laik go we? Pilaia bilong Eagles long Godens tas kompetisen long Mosbi i karim bal na i laik ronawe. Eagles i bin pilai wantaim Wards Bulldog las Sarere.

• Ol skulmeri tu i gat namba long basketbal. Yangpela pilaia bilong Chariots i wokim stail bilong em wantaim bal long wiken. Chariots i bin pilai wantaim K.Jazz long Mosbi Kepitel basket bal lig. ▶

▼ • K.Jazz pilaia tu ya, em i gat namba bilong pilai basket bal. Long poto em i laik traim rin ya. Lukaut long em.



• Ragbi tas kompetisen i strong yet long Godens, Mosbi.



• Em Karate o soka? Meri i kalap olsem em i pait karate . Tasol nogat em pablik sevan soka long Mosbi las wiken.

Spot divelopmen long Sandaun provins

WANTOK long wanwan wik bai stori long yupela long Spot divelopmen insait long sampela liklik provins long kantri. Bai mipela traime long tokim yupela long wanem ol spot wanwan provins i save ranim long stat bilong dispela yia i kam.

Long dispela wik, Wantok bringim long yupela spot insait long Sandaun provins.

Vanimo, biktaun bilong Sandaun em i wanpela liklik naispela taun. I nogat wanpela rot i joim Vanimo wantaim narapela provins bilong kantri. Tasol Vanimo i joim wantaim Jayapura, kapital siti bilong Irian Jaya, wanpela provins bilong Indonesia.

Long Febuari i kam inap nau, kain kain samting i bin kamap long dispela liklik boda taun. Wanpela bilong ol dispela samting, we yumi ken skelim em divelopmen bilong Spot insait long taun na provins.

Spot kodineta bilong provins na biknem rana bilong PNG, Aaron Dupnai i bin toktok wantaim Spot Ripota bilong Wantok, Watson Gabana long hau kain kain pilai long Vanimo na Sandaun provins olgeta i ran long dispela yia.

"Vanimo em wanpela liklik taun tru na gavman long hia i gat planti bikpela samting long tingting long en. Olsem na ol i no givim planti sapot long spot divelopmen long provins. Tasol mipela i bin bungim wanpela gutpela yia long ol spot olsem; soka, basketbal, ragbi na sofbal. Tasol mi no ken tok olgeta samting i bin orait. I gat planti hevi tu mipela i bin bungim," Aaron tok.

Long Mas dispela yia, spot ofis long Vanimo i bin kirapim soka, basketbal na ragbi. Wantaim helpim bilong sampela bikman long gavman na bisnis haus long taun, ol i bin ranim dispela tripela spot gut tru i kam inap long arere bilong en.

"Spot long Vanimo i no save kamap long gren fainel olgeta taim bihain. Mipela save pilai i kam na pilai i no save pinis gut. Tasol dispela yia, mipela i bin bungim wanpela gutpela sisen stret," Aaron tok. "Dispela tripela spot i bin pinisim gut gren fainel pilai bilong ol," em tok.

•Sapot i kam long gavman: Aaron tok olsem ol i no bin kisim wanpela sapot i kam long gavman dispela yia. Em tok ol i bin yusim moni ol gat long las yia na traime ranim spot ofis i kam inap long pinis bilong en. Tasol Gavana, John Tekwie tok bai em givim K15,000 long ranim soka tonamen long neks wik. Ol ples bilong pilai tu i gutpela tumas. Gavman sapos long stretim ples bilong pilai tasol ol i no mekim.

Aaron, husat i bin wok klostu faivpela yia olsem spot kodineta i tok em i no lukim bikpela sapot i kam long gavman long divelopim spot insait long provins.

Lukluk long wanwan spot long Sandaun provins.

•Soka: Vanimo em asples bilong Guria, wanpela biknem soka tim long kantri. Long dispela taun tasol, Guria i bin stat na i go long olgeta hap bilong kantri. Tasol dispela i no min olsem soka em strong yet long Vanimo.

Long dispela yia, siksipela tim i bin pilai insait long Vanimo soka



• Wanpela tim bilong Vanimo soka resis long dispela yia.

resis. Aaron tok olsem pilai i bin stat na pinis gut we i no bin olsem sampela krismas bipo. Wantaim sapot bilong Trukai Yut spot program, olgeta samting i bin ran gut.

Long dispela yia, ol sumatin bilong Vanimo na Don Bosco hai skul i bin rausim tiket bilong Ninkras long winim dispela taitel.

Vanimo long dispela yia i bin salim wanpela tim bilong ol i go long Momase soka tonamen long Madang. Ol i bin kamap namba faiv long 16 tim husat i bin pilai resis long dispela taim.

Long neks wik (21-23) bai Vanimo taun bai paia long provinzel soka tonamen bilong ol. Gavana John Tekwie tok bai em givim K15,000 long ranim dispela tonamen. Bai tupela tupela tim i kam long wanwan distrik. Wanpela bilong meri na narapela bilong man.

Tim long olgeta distrik bai bung wantaim ol tim i stap klostu long taun long pilai insait long dispela tonamen.

Aaron tok olsem wanpela tim bilong Jayapura tu bai kamap long dispela tonamen. Tupela bikman husat i go pas long dispela tonamen em; John Koye na Aloius Mato. Tupela wok long redim olgeta samting long lukim dispela tonamen ran gut long dispela tripela de.

Ol tim husat laik pilai insait long dispela tonamen bai baim K200 rejistresen fi.

Ol oganaising komiti askim tu olgeta Guria klap long kantri long i go na pilai insait long dispela Sandaun soka sempionsip.

"Mipela redi tasol long lukim tim long olgeta hap bilong provins i kam na pilai insait long dispela tonamen. Dispela em wanpela rot bilong bungim olgeta manmeri wantaim. Na tu luksave long yumi yet long dispela taim," Aaron tok.

Soka i bin ran gut long dispela yia.

•Ragbi: Ragbi long dispela yia i bin gat foapela tim tasol pilai. Sisen i bin stat leit. Tasol i no planti tim olsem na i bin pinis long taim. Sempion tim bilong ol, Vanimo Hawks i bin gat sans long pilai

insait long Cambridge kap resis. Tasol ol i no bin go longwe. Ol i bin lus tasol long nambawan raun bilong pilai.

Ragbi long dispela yia tu i bin kamap gutpela tru. Vanwan tim, Hawks, Royals, Panthers na Tigers i bin putim kamap wanpela strongpela salens. Ol i bin pilai i go na ol yangpela blut bilong Hawks i bin winim dispela yia resis.

Ol i bin gat bikpela laik long pilai insait long Winfil 9's tonamen tasol hevi bilong moni na ol i no bin go.

•Basketbal: Vanimo taun i bin gat wanpela gutpela resis. Tasol hevi bilong spona na moni mekim na resis i no bin ran gut. Ol i bin pilai i go na ol sempion tim bilong wanwan distrik i bin bung long Aitape. Tripela distrik; Aitape, Vanimo na Telefomin i bin salim sempion tim bilong ol kam pilai long dispela tonamen. Ol meri bilong Telefomin i bin winim dispela taitel. Na tim ol boi bilong Vanimo i bin winim

Aitape long karim taitel i go bek long taun.

Dispela em wanpela bikpela tonamen tasol bilong basketbal, spot ofis long Vanimo i bin oganaisim.

•Sofbal: Vanimo i no bin gat wanpela resis bilong sofbal long dispela yia. Tasol sampela manmeri, husat i gat bikpela laik long dispela spot wok long bung wantaim na trening i stap long i go pilai long Keviang.

Aaron tok olsem ol kisim pinis gutpela spona i kam long Air Niugini na sampela bisnis haus long Vanimo na ol bai salim tim bilong meri tasol i go long dispela nesanel sempionsip bilong sofbal long Kavieng.

Dispela em sotpela stori long divelopmen bilong spot long Sandaun provins. Neks wik, Wantok bai bringim spot long Wewak na Is Sepik provins.



• Ol pilai bilong Jayapura mekim danis bipo long pilai.

SPOT LONG DISPELA WIK

RAGBI:

SP INTA SITI - Papua Niugini ragi futbol lig (PNGRFL) las wik i bin tokaut long foapela arapela tim bai pilai insait long neks yia SP Inta siti resis. Na tu ol i bin rausim tupela tim bilong las yia.

Waghi, Ramu, Enga na Kimbe bai joinim arapela tim long pilai insait long 1998 SP Inta siti resis. Tasol PNGRFL rausim Kundiawa Warriors na Madang Marlins long neks yia resis.

Ramu, Waghi na Wabag i bin pilai insait long Challenge kap resis long dispela yia. Na tu ol i painim pinis bikpela spona long sapotim ol.

Warriors i no inap pilai bikos long hevi bilong disaplin. Na PNGRFL rausim Marlins long hevi bilong painim spona.

PNGRFL brukim dispela tenpela tim i go insait long tupela grup. Olgeta hailans tim bai pilai long wanpela pul na arapela faivpela tim bai salens long narapela pul.

VIPERS: Queensland Channel 9 resis long Ostrelia toktok long rausim Vipers na wanpela narapela tim long resis bilong ol neks yia. Ol kamap wantaim dispela disisen long katim daun kos.

SP-OV-SISEN: Long las wik, SP Holdings i givim K6,000 long sapotim ov-sisen resis long Mosbi. Resis long dispela yia bai bungim moa long 20 tim na dispela stat pinis long wiken. Dispela resis bai bungim olgeta yangpela husat i no save pilai insait long tim bilong PRL.

SOKA:

Lae - Morobe soka federeesen i holim pinis wanpela soka tonamen bilong ol meri long las wiken. Siksipela tim i bin pilai insait long dispela nambawan resis. Lahi i bin winim LFA long kamap sempionsip dispela resis. Ol tim husat i bin pilai long dispela resis em; Wau, Bulolo, LFA, Lahi 1, Lahi 2 na Morobe Patrol Post.

Vanimo - Vanimo taun bai paia neks wiken taim ol ranim provinzel soka tonamen bilong ol. Gavana, John Tekwie givim pinis K15,000 long lainim dispela resis. Ol tim bai kama olsem long Jayapura, Lae, Mosbi na long olgeta distrik bilong Sandaun provins. Pilai bai kik ov long Fraide 21 i go inap Sande 23 Novemba.

Mosbi - NCD Pablik sevens resis stat pinis long las wiken. Sevenpela nupela klap joinim dispela resis na bringim namba bilong tim pilai long dispela resis i go antap long 30. Pilai bai ran inap 21 wik na bai pinis long neks yia.

Sem taim, Isten Papuan Kompetisen (IPC) tu statim pinis resis bilong ol las wiken.

Madang - Momase soka klap i winim maina primia na gren fainel bilong Madang soka asosiesen las wiken. Ol i bin winim Nabasa 2-0 long kisim dispela taitel. Ripot i soim olsem bikpela pait i bin kirap taim ol sapota bilong Nabasa i bin paitim referi.

Pilai long Kamali bungim planti yangpela

PILAI long Kamali soka wok long kamap strong taim ol tim stap damblo long lata givim strongpela salens long ol tim husat i wok long go pas.

Dispela i bin kamap ples kliia taim, Kwarere, husat i stap namb tri long lata i bin bagarapim tru sindau bilong kompetisen lida, Gavurigo 3-0.

Dispela i bin soim sampela gutpela stail pilai na teknik bilong ol manki Kwarere. Aninit long lukaut bilong biknem soka pilaia bilong Mosbi olsem Kila Vele, Maino Kwalimu na golkipa Raka Kila, ol boi Kwarere i bin mekim olgeta samting long strong bilong ol long daunim strong bilong Gavurigo.

Tupela tim wantaim i bin putim kamap wantepela strongpela pilai tru long dispela apinun. Taim tupela tim i bin go insait long fil, tupela wantaim i go stret long bisnis. Tupela i bin strongim kona bilong ol i go na go malolo wantaim 0-0 skoa lain. Taim tupela i kam insait long seken hap, Maino kisim wanpela bal long kona na setim i kam insait long namel. Bal pas antap long lek bilong Vele Kila long painim bal sing sing antap long umben. Stap liklik, Kwalimu Vele setim Kala lga long namba tu gol bilong ol.

Gavurigo i no tingting long dispela. Ol salim straika; Kila Karo, Norman Raka na Tau Iamo pait strong long lukim umben bilong Kwarere tasol dispela i no bin wokaut gut. Ol beklain; Giman Tau, Nama Geno na Pokana bilong Kwarere sanapim strongpela banis long beklain long stapim ol sans bilong Gavurigo.

Pilai i go strong tru na i no long taim, Kala painim umben bilong Gavurigo long namba tu gol bilong em na apim skoa i go antap 3-0 long fut-taim.

I tru olsem Gavurigo lusim dispela gem bilong ol. Tasol ol go pas yet long lata bilong Kamali soka resis.

Long narapela pilai bilong A-gret, Kinikele na Kwapiro i bin stongim sait bilong ol long lokim hon long 2-2 skoa lain.

Long dispela wiken, Kamali ples bai paia gen taim Kinikele bungim pes wantaim Kwarere. Na mein gem bai stap namel long Kwapiro na Gavurigo.

Dispela gem i wok long pulim planti yangpela ikam bung. Sampela yangpela bilong Makerupu na Babaka i wok long soim bikpela laik long pilai insait long dispela resis.

Dipatmen bilong Difens sapatim tupela soka klap bilong em

DIPATMEN bilong Difens i luk save long win bilong French Bake Haus Difens soka klap long PMSA na Difens soka klap bilong PSSA na givim K1,200 i go long ol.

Sekreteri bilong dipatmen bilong Difens, Raphael Stiven i bin givim dispela moni long las wik Fonde.

"I tru olsem yumi wok long bungim planti hevi long disaplun fos bilong yumi. Tasol dispela i no bagarapim o stapim yupela long winim ol pilai bilong yupela," Raphael tokim ol memba bilong tupela klap las wik.

Em i bin givim K1000 i go long kosa bilong French Bake Haus Difens soka klap, Parkop Komet na K200 i go long presiden bilong Difens soka klap long PSSA; Ambrose Takafoin.

Long dispela yia, FBH Difens i bin winim gren fainel bilong P:SA. Na tupela wik i go pinis, Difens soka klap bin winim pri sisen pilai bilong PSSA. Dispela i kirapim bel bilong dipatmen bilong Difens long helpim na sapatim spot insait long disaplun fos.

Komet tok bai em yusim dispela moni long baim ol presen bilong pilaia long presentesen nait bilong FBH Difens soka klap long Novemba 29.

"Mi laik tok bikpela tenk yu i go long dipatmen bilong Difens long luksave long sot bilong mipela na helpim. Tru olsem mipela i bin painim hat long kisim ol sponsa. Tasol nau, ol Lae bisket na FBH i bin kam na helpim mipela," Komet tok. Bai mipela yusim gut dispela moni na kamapim olgeta ripot long yu," em tokim Raphael.

Em tok tu olsem bai em askim sampela ol bikman bilong Difens long kam na stap long dispela taim.

Ol rana bilong yumi nogat rispek long ol yet: Green tok

WATSON GABANA i raitim

PASIN bilong go raun lukim ples long ovasis em i namba wan ting ting hait bilong planti gutpela rana bilong PNG. Taim ol lukim ples pinis, ol i no moa tingting long ran moa. Olsem na etletiks i no kamap strong long kantri.

Presiden bilong PNG etletiks yunien, Tony Green mekim dispela tok long Mosbi las wik Sande.

Em tok olsem Papua Niugini i gat planti gutpela rana tru i stap. Tasol ol i nogat pasin bilong disaplun. "Taim ol rana bilong yumi i go lukim wanpela ovasis kantri pinis, ol laik kusai

na i no tingting moa mekim i go antap long narapela step," Green tok.

Green bin tok olsem, planti gutpela rana bilong kantri i no save tingting long trening hat na karap i go antap long narapela level. Em tok taim ol winim gol medal, ol ting olsem ol kamap pinis long wanpela bikpela mak na stat long les nabaut na dring spak.

"Yumi no inap kamap long wanpela gutpela mak, sapos yumi go het long mekim ol pasin i no stret na tingting long winim gol medal wanpela taim tasol. Olgeta gutpela rana bilong yumi mas nau tingting long sindaun na plenim wanem samting ol mas mekim bihain long ran resis insait long wanpela pilai. Long dispela

rot, bai yumi lukim etletiks i gro insait long kantri," Green tok.

Narapela samting, Green tok i wok long daunim gro bilong etletiks long kantri em wok politiks. Em tok hevi bilong ol rana long painim moni na i go resis long ol bikpela tonamen i wok long daunim developmen bilong etletiks.

"Papua Niugini i no inap kamap long wanpela gutpela mak sapos gavaman bilong yumi i no helpim dispela spot. Sapos yumi laik kamap olsem Ostrelia, Nu Silan o Fiji, gavaman bilong yumi mas traim na sapatim ol gutpela rana," Green tok.

Green tok olsem yumi ken kamap wankain olsem arapela liklik kantri long wol olsem

Tobago na Trinidad long Carribean o Kenya long Afrika sapos ol rana bilong yumi rispektim ol yet.

Etletiks em wanpela pilai bilong wanwan manmeri. Taim ol kam na luksave long strong na teknik bilong ol, ol i ken skurim long dispela.

Tasol Green lukim olsem gavaman bilong yumi i no mekim inap wok long helpim dispela spot gro insait long kantri. Tasol taim ol rana bilong yumi go long ol bikpela gem, ol save mekim gut tru.

Tony Green em bilong England na wok long PNG klostu tenpela krismas nau. Em i bin stap presiden bilong PNG etletiks yunien (PNGAU) klostu faivpela krismas.



Em bilong mi ya... • Scholly Kuipuru bilong Mobil i kalap antap long kisim bal long pilaia bilong Shell. Ol Mobil i bin pilai strong na winim gem 15-12.

24 spot edministreta na menesa kisim level 2 setifiket

WANEM samting yupela lainim pinis long dispela wik, yupela mas lainim arapela tu. Long dispela rot, bai yumi developim spot insait long kantri. Sekreteri Jenerel bilong PNG spot federesen (PNGSF), John Dawanicurra mekim dispela tok taim 24 manmeri pinisim wan wik spot edministresen na menesmen kos long las wik Sarere.

Dawanicurra i bin tok olsem yumi ken i gat gutpela gutpela spot manmeri. Tasol sapos yumi nogat menesa bilong ranim dispela gut ofis, bai olgeta dispela manmeri stap nating. Olsem na em askim dispela 24 manmeri long yusim gut wanem save ol kisim long dispela kos na traim long lainim arapela manmeri long wanwan spot bilong ol. "Long kamapim gutpela menesa na spot edministreta long kantri, yumi mas gat pasin bilong lainim na tilim save. Long dispela rot, yumi ken lukim planti manmeri kamap spot menesa na edministreta long komyuniti bilong yumi," Dawanicurra tok. Dispela ol 24 spot menesa na edministreta i bin kamap na kisim level 2 kos bilong ol. Kos i bin stat long las wik Mande na pinis long Fraide. Carol DuBem bilong Ostrelia i bin stap olsem instrakta long dispela taim.

Carol i bin ranim wankain kos bipo long PNG long 1994, 95 na las yia. Long dispela taim em i bungim gem sampela olpela sumatin bilong em na tu ol arapela nupela spot edministreta na menesa.

Carol i bin skulim ol long we bilong ranim wanwan spot asosiesen na tu rot bilong yusim gut moni. Long taim bilong presentesen bilong setifiket, Carol i bin tokim ol sumatin: "Mi no laik bai dispela save yupela kisim i stap hait insait long dispela hap pepa. Mi laikim yupela long yusim gut dispela save na traim putim long prektis na tu lainim arapela manmeri husat laik mekim wankain wok."

Timai Tally, taim bekim toktok bilong Carol i bin tok olsem dispela menesmen kos i bin kamap long wanpela taim we ol sot tru. "PNGSF na nesenel olympiks komiti i kamap wantaim dispela program long wanpela rait taim. Mipela planti ol spot menesa na edministreta i amamas long wanem samting mipela lainim long dispela kos na bai mipela putim olgeta samting mipela lainim long wok." Timai Tally em menesa bilong Bart's Fitness Gym long Is Boroko. Em wanpela bilong arapela 23 menesa husat i bin kisim dispela kos.

Alex na Maea bai werim Kumul jesi namba wan taim

OL BIKMAN bilong Papua Niugini ragbi futbol lig (PNGRFL) kamap pinis wantaim trening skwat bilong PNG Winfil 9's las wiken bihain long nenesel 9's tonamen.

Bihain long gren fainel long Sande las wik, siaman bilong PNGRFL, Kevin Murphy kamap wantaim dispela nem bihain long em i bin skelim pilai bilong wan wan pilaia.

Tupela bilong dispela 20 man Kevin i bin makim bai fes taim bilong tupela long welim Kumul jesi. Alex Krewanty, liklik brata bilong biknem PNG ragbi pilaia, Anord Krewanty na Max Maea bilong Kimbe i bin putim kamap wanpela strongpela pilai na kirapim bel bilong ol selekta long makim ol. Alex i bin winim bes

gren fainel pilaia awod na Max winim men-ov-tonamen awod.

Pot Mosbi Vipers wantaim Kimbe i bin pilai insait long gren fainel bilong dispela 9's tonamen. Vipers i gat moa ekspirians olsem na ol i bin bagarapim tru sindaun bilong ol yangpela blut bilong Kimbe 24-6 long kisim K3,600. Kimbe i bin kisim K2,000 prais moni.

Long pilai bilong Melanesian Hotel sil, Kagua i bin rausim trausis bilong Lae 18-8 long kisim K1200 prais moni na Lae kisim K800. Long Puma plate, Wabag bagarapim sindaun bilong Is Nu Britan 18-12 long kisim K900.

Kain gutpela pilai bilong ol top nesenel ragbi lig pilaia long dispela wiken i bin kirapim bel bilong planti sapota.

Taim tupela ragbi lig bodi i bin bung wantaim, ol sapota long Lae i bin lukim wanpela strongpela salens tru. Ol Vipers i bin pilai strong tru na kamap sempion bilong dispela resis bihain long PNGRFL na NRL i bin bung wantaim.

20 tim bilong olgeta hap bilong kantri i bin pilai insait long dispela resis. Ol liklik ragbi senta olsem Kimbe, Minj, Ramu, Kagua, Wabag, Bialla na Koairi i bin pilai gut tru na givim hat taim long ol sampela biknem tim.

• Twins manki bilong Lae, John na William Wiltshire, husat i save pilai wantaim Pert Westen Reeds tu bai stap insait long trening skwat. Tupela blong Butibam insait tasol long Lae siti. Tupela bai joinim arapela ovasis pilaia olsem, Marcus Bai, Bruce Mamando, John Okul na Stanely Gene long trening skwat.

Ful memba trening skwat em: Max Maea, Robert Sio, Jackery Kipsy, Robert Tela, James Kopps, Fatty Buka, Max Tiri, Raymond Karl, Reuben Ruing, Esekiel Ben, Chris Lome, Andrew Norman, David Gomia, Alex Krewanty na John Okul.

Bihain bai ol katim namba i kam daun long 13 pilaia tasol. Kosa bai Bob Bennett

Tok i no stret yet long wanem hap bai neks yia wol 9's tonamen i stap long en. Tasol em bai kamap long Febuari na ating bai stap long Melbourne, Ostrelia o Aucklan, Nu Silan.

Bihain long dispela tonamen, bai ol kamap wantaim gutpela gutpela pilaia bilong pilai insait long wol kap resis long 1999.

Eastern Papua soccer competition

SATURDAY NOVEMBER 1997
Men and Women round one draw
Main Stadium
8.00-1200 OPENING CEREMONEY

M/Stadium	Pool	R
12.00-1255	Tamarocks vs Kusebu 2	B/Bros 2
13.00-1355	Nim vs Laviah	ECR
14.00-1455	Koigaibu vs Simila 1	B/Bros 2
Pool MF		
15.00-1555	Naniu vs Defence MB 2	ECR
16.00-1655	Batu 1 vs Togelu 2	B/Bros 2
17.00-1755	Moyaka vs Mixed Mates	ECR
Bye: Pool A ECR and Pool Fa badili Bros 2 Pool G Yawata 1		

Oval One

Pool C	Pool MG	Pool MH
12.00-1255	12.00-1255	12.00-1255
13.00-1355	13.00-1355	13.00-1355
14.00-1455	14.00-1455	14.00-1455
Bye: Pool C		

Oval 2

Pool ME	Pool MD	Pool MC
12.00-1255	12.00-1255	12.00-1255
13.00-1355	13.00-1355	13.00-1355
14.00-1455	14.00-1455	14.00-1455
Bye: Pool E		

Mulit 1

12.00-1255	Kulumata 1 vs Sky Rocks	Telecom
13.00-1355	Defence MB 2 vs Kuboma	Telecom
Pool WA		
14.00-1455	Batu sisters vs LSC	Tawala
1450-1535	Yawata vs Tawala	LSC
Pool WC		
15.40-1625	Kubutuvau vs Kuboma	Togelu
16.30-1715	Badili Sister vs Togelu	Kuboma
Pool MB		
17.20-1815	Wagu vs LSC 2	Telecom
Bye: Mens Pool B - Mini		

Mulit 2

12.00-1255	Gordons Utd 2 vs CYF	Mini
------------	----------------------	------

13.00-1355	Bilawawa vs LSC 1	Mini
Pool WB		
14.00-1455	Telecom vs Defence MB	Tamarocks
14.50-1535	Tamarocks vs Bau Sisters	Telecom
Pool WD		
15.40-1625	Naniu vs Suau	Lagimu
16.30-1715	Gerehu Yth vs Lagimu	Naniu
Pool MD		
17.20-1815	Lagimu vs Kusebu 1	Mini
Bye: Men Pool d- Telecom and women Pool B Koigaibu		
* Note: Duration of the game, 25 minutes each half for men and 20 minutes each half for the women.		

SUNDAY NOVEMBER 16, 1997

Men round 2 & 3
Women round 1 & 2
Main Stadium

Pool MB		
0830-0925	Sky Rocks vs Kuboma	Def/ MB 2
0930-1025	Kulumata 1 vs LSC 2	Kuboma
1030-1125	Defence MB 2 vs Mini	LSC 2
Pool MH		
1130-1225	Ambo vs Batu 2	Yabwau
1230-1325	Unimilnes vs P/Inservice	Batu 2
1330-1425	Kubutuvau vs Yabwau	Pom
Inservices		
Pool MC		
1430-1525	Gordons Utd 1 vs Suau	Gerehu Yth 2
1530-1625	Defence Koari vs Galeia	Suau
1630-1725	Togelu vs Gerehu Yth 2	Galeia
Bye: Mens: P/ (B)- Wagu PI (H)- Tawala PI (C) Hikabo		

Oval 1

Pool MD		
0830-0925	LSC 1 vs CYF 1	Telecom
0930-1025	G/United 2 vs Kusebu 1	CYF 1
1030-1125	Bilawawa vs Telecom	LSC 1
Pool MA		
1130-1225	Kusebu 2 vs Laviah	Nim
1230-1325	Tamarocks vs Simila 1	Kusebu 2
1330-1425	Nim vs ECR	Simila 1
Pool ME		
1430-1525	Mixed Mates vs Togelu 2	Moyaka
1530-1625	Defence MB 2 vs B/Bros2	Togelu 2
1630-1725	Naniu vs Moyaka	B/Bros 2
Bye: Mens: Pool (D)- Lagimu Pool (A)- Koigaibu Pool (F)- Batu 1		

Oval 2

Pool MC

0830-0925	Defence Koari vs Gordons Utd 1	Sau
0930-1025	Togelu vs Suau	Sau
1030-1125	Hikabo vs Galeia	G/ Utd 1
Pool ME		
1130-1225	Bon Voyage vs Simila 2	Togelu
1230-1325	Doau vs Yawata 2	Kula
1330-1425	Gerehu Yth 1 vs Kula	B/Voyage
Pool MG		
1430-1525	Kulumata 2 vs Nisco	Taliu
1530-1625	Taliu vs Yawata 1	Veama
1630-1725	Badili Bros 1 vs Veama	Nisco
Bye: Mens: Pool (C) Gerehu Yth 2, Pool (E) - Nibubaewa Pool (G) Northeast		

Mulit 1

Pool WA		
0830-0910	Gordon Utd vs P/Inservice	Nim
Pool WC		
0915-0955	Nim vs Taliu	P/ Inservice
Pool ME		
1000-1055	Defence MB 2 vs Togelu	Naniu
1100-1155	Naniu vs Mixed Mates	Togelu 2
1200-1255	Batu 1 vs Badili Bros 2	Defence MB 2
Pool WB		
1300-1345	Koigaibu vs Defence MB	Kula
Pool WD		
1350-1435	Telecom vs Tamarocks	Koigaibu
Pool WC		
1440-1525	Suau vs Lagimu	Gerhu Yth
1530-1615	Naniu vs Kula	Kulumata
1620-1705	Gerehu Yth vs Kulumata	Suau
Bye: Womens (Pool (B)- Bau Sister Mens: Pool (F) Moyaka		

Muliti 1

Pool WB		
0830-0910	Tamarocks vs Bau Sisters	Kula
Pool WD		
0915-0955	Kulumata vs Kula	Tamarocks
Pool MG		
1000-1055	Taliu vs Kulumata 2	Tawala
1100-1155	Badili Bros 1 vs Nisco	Taliu
1200-1255	Northeast vs Yawata 1	Nisco
Pool WA		
1300-1345	LSC vs Tawala	Yawata
1350-1435	B/Sisters vs P/Inservice	Kuboma
1440-1525	Yawata vs Gordons Utd	Togelu
Pool WC		
1530-1615	Kuboma vs Togelu	B/Sisters
1620-1705	Kubutuvau vs Taliu	Nim
1710-1755	Badili Sister vs Nim	Gordons
Utd		
Bye: Mens: Pool (G)-Veama		

PRIVATE COMPANIES NETBALL
DRAW
SUNDAY NOVEMBER 16, 1997

DIVISION 1

1.00	Travelodge (1) vs Fairdeal (1)
1.45	Courts vs Shell (1)
2.25	Coke vs STC (1)
3.10	Post Courier (1) vs SP Holdings (1)

DIVISION 2

1.00	Theodist vs Deloitte
1.45	Travelodge (2) vs PNG Stationery
2.25	SP Holdings (2) vs STC (2)
3.10	Ela Motors vs Daltron

DIVISION 3

1.00	Gadens vs Shell (2)
1.45	Mobil vs Rothmans
2.25	W/Publishing vs EFM/Consort
3.10	MBA (1) vs Daikin

DIVISION 4

1.00	Boroko Motors vs (MBA) (2)
1.45	City Pharmacy (1) vs Yellow Pages
2.25	Ray White vs Fairdeal Liquors
3.10	Courts (2) vs Brian Bell (1)

DIVISION 5

1.00	C/Pharmacy vs Steamships 4)
1.45	National vs Coke (2)
1.45	Pacom vs Post Courier
2.25	Courts (3) vs Atlas (1)
1.10	Brian Bell vs Pryde Furniture

DIVISION 6

1.00	Steamships (3) vs Arnotts Biscuits
1.00	Fletcher Morobe vs Atlas (2)
1.45	Paterson Lawyers vs Trukai
2.25	Pom Transport vs Clear Water
3.10	Trade Winds vs National (2)
Bye: Coopers	

National Capital District -
Public Servants Soccer Association

Saturday- 15/11/97

Time	Team	vs	Team	Pools
7.50	Diwai	vs	Attorney General	M2
9.10	Education	vs	Telikom	W1
10.30	Copra M/Board	vs	Finance	M2
11.50	University	vs	P/Harbours Board	W1
13.10	A & Livestock	vs	I.P/Authority	M2
14.30	Dept of Works	vs	NPF	W1
15.50	C & Industry	vs	P/Harbours Board	M2

Bisini 2

7.50	Education Dept	vs	Telikom	M1
9.10	Diwai	vs	Attorney General	W2
10.30	NCDC	vs	DCA	M1
11.50	C/Industry	vs	DCA	W2
13.10	ICPNG	vs	N/Fisheries	M1
14.30	A & Livestock	vs	I.P/Authority	W2
15.50	Dept of Works	vs	N PF	M1

Sunday- 16/11/97

7.50	NBC	vs	POSF	M1
9.10	NSO	vs	E/Commission	W2
10.30	Copra M/Board	vs	Finance	W2
11.50	University of PNG	vs	PNGBC	M1
13.10	Post PNG	vs	NCDC	W2
14.30	ICPNG	vs	P/G.Hospital	W2
15.50	Air Niugini	vs	Dept of Defence	M1

Bisini 2

7.50	NSO	vs	E/Commission	M2
9.10	NBC	vs	POSF	W1
10.30	Bank of PNG	vs	N/Fisheries	W1
11.50	Post PNG	vs	Teachers	M2
13.10	PNGBC	vs	Teachers	W1
14.30	Air Niugini	vs	Dept of Defence	W1
15.50	Bank of PNG	vs	P/G.Hospital	M2

Bye: IRC M1 Transport M2
IRC W1 Transport W2

NB: Affiliation & Registration
Deadline of the above to the 21st of November 1997.

PAPUA NEW GUINEA

Association Incorporation Act

NOTICE OF INTENTION TO APPLY FOR THE
INCORPORATION OF AN ASSOCIATION


I, **Powes Parkop** of P.O. Box 155, University, National Capital District, a person authorized by the committee of association known as **Melanesian Solidarity for Justice, Peace and Dignity** given notice that I intend to apply for the incorporation under the Association Act.

The following are the details of the prescribed qualifications for incorporation as specified in Section 2 of the Act.

- The association has been formed for the purpose of
 - to protect, advocate and strive for greater democracy, democratic ideals and practice in our communities
 - to protect, promote and advocate for greater social justice, economic justice, environmental respect and protection, respect and tolerance for our good cultures and the strengthening and maintenance of our good Melanesian spiritual values and practices.
 - to empower our people and communities through training information and awareness so that they can make decisions for themselves and by themselves so as to improve their well being and that of future generation.
 - promote sustainable development
 - protect, promote and strive for justice, peace and a dignified life for our peoples and communities.
- That the Association will apply its profits (if any) or other income in promoting its objectives; and
- That the association will prohibit the payment of any dividend or payment in the nature of a dividend to its members.




This Notice has been approved by the Deputy Registrar of Companies.

Dated 24 September 1997.


W.L. MARUM
Deputy Registrar of Companies

NOTE: A person may within one month after the publication of the notice lodge with the Registrar an objection to the incorporation of the proposed association in accordance with Section 4 of the Act.

WANTOK SPOT



Olpela Kumul senta tok tupela pul sistem bai kilim ragbi lig

WATSON GABANA i raitim

WANPELA biknem ragbi lig pilaia na kosa bilong Papua Niugini bipo i bin tok olsem ragbi lig bai bagarap na dai sapos PNGRFL yusim tupela pul sistem long neks yia SP Inta siti resis.

"Sapos yumi laik developim ragbi long kantri, yumi mas bung wantaim na pilai. Sapos yumi bruk i go long wanwan rijen bilong yumi, hau bai ragbi i gro," olpela kosa bilong Kumuls Richard Wagambie tok.

Richard i tok PNGRFL mekim stretpela pasin long rausim Kundiawa Warriors na tu tingting long putim foapela moa tim i go insait long SP Inta siti resis.

"Kundiawa Warriors i gat disiplin problem. Olgeta taim ol save tingting long kirapim pait na bagarapim gem. Olsem na mi wanbel long wanem disisen PNGRFL mekim long rausim ol long neks yia SP Inta siti resis," Wagambie tok. "Na tu mi amamas long harim olsem foapela liklik senta long kantri bai joinim Inta siti resis. Tasol mi no amamas tru long narim olsem dispela tenpela tim bai stap long tupela pul," Richard

tok. Richard tok olsem ragbi long hailans rijen i no wankain olsem ragbi long nambis. Em tok olsem long hailans, ol pilaia i save pilai strong na laik brukim bun. Tasol long nambis eria, ol pilaia i laik soim stail bilong ol long salim bai i go i kam na yusim spit bilong ol long pilai.

Olsem na Richard ting sapos PNGRFL putim ol hailans tim pilai namel long ol yet na nambis tim ol yet, bai ol (PNGRFL) i no inap kamap wantaim gutpela kombine-sen bilong ol pilaia.

"I tru PNGRFL kamap wantaim gutpela tingting long developim ragbi long kantri. Tasol dispela kain pul sistem i no inap helpim long developim ragbi. Mbeta ol lusim dispela tingting long kamapim pul sistem," Richard tok.

Richard i bin wanbel olsem em bai ekspensiv tru long bihainim olpela sistem bilong pilai. Tasol em ting olsem sapos PNGRFL laikim tru long developim ragbi long kantri, ol mas pilai raun olsem ol i bin bihainim yia i kam.

Wagambie i bin mekim dispela toktok bihainim wanpela niuspepa ripot olsem namba tu siaman bilong PNGRFL, John Numapo i bin tok long brukim SP Inta siti tim bilong neks yia i go insait long

tupela pul. Faivpela hailans tim bai pilaim ol yet na ol tim long nambis bai pilaim ol yet. Wagambie i lukim dispela i no stret.


Siaman bilong PNGRFL, Kevin Murphy i bin tok olsem ol bai kamap wantaim wanpela gutpela ripot bilong dispela nupela rot bilong pilai tete. "Mi no inap tokim yu nau. Bai mi salim wanpela pres relis i kam long yu tumoro," Kevin tok. Olsem na Wantok i no inap givim sait stori bilong PNGRFL.

Toktok bilong rausim Pot Mosbi Vipers long Queensland Channel 9 resis tu soim olsem PNG bai stat gen long skwea wan na kam antap.

Richard tok sapos Vipers lusim sanel 9 resis, dispela i min olsem bai yumi nau statim gen ragbi lig long damblo na wok i kam antap.

"Mipela i bin lukim olsem yumi gat gutpela gutpela pilaia i stap. Olsem na mipela i bin kamapim Vipers tim long i go pilai insait long Sanel 9 resis. Sapos ol lusim, bai yumi statim olgeta samting gen," Richard tok.

Toktok bilong Vipers bai pilai long Sanel 9 resis o nogat bai kamap klia long Fraide taim ol bikman bung long Brisbane na makim 14 tim bilong neks yia.



• Richard Wagambie, husat i bin wanpela top Kumul pilaia, na nau em i kosa bilong Gerehu Yunaited tim bilong Mosbi lig resis.

Ol pilaia yusim Bisini soka fil olsem ples bilong dring na spak



• Pilaia bilong Harbour Board i wokim stail long kisim bai agensim sosa bilong BPNG long las wiken soka resis bilong ol meri NCD Pablik Savens resis.

PASIN bilong dring spak long taim bilong pilai kamap bikpela long NCD Pablik Savens (PSSA) soka resis long Mosbi.

Siaman bilong PSSA judiseri, Simon Koima i bin tok olsem taim sisen i bin stat las wik, planti pilaia na sapota i bin kisim bia i kam insait long Bisini soka fil na dring spak.

"Mi bin lukim planti klap kam wantaim bek bia na hat staf long pilai. Taim ol pilai pinis, ol stat long dring spak na mekim kankain pasin," Simon tok. "Olsem na mi laik wonim olgeta tim olsem mipela i no inap marimari long kain ol pilaia na tim olsem," em tok.

Simon tok olsem PSSA em resis bilong olgeta wokman-meri bilong gayman dipatmen. Na ol i mas soim sampela kain rispek long wanem samting ol mekim.

Em tok stat bilong sisen tasol long dispela kain pasin i no stret.

"PSSA em wanpela soka resis we olgeta femili i kam bung wantaim na pilai. Sapos dispela pasin kamap bikpela long Bisini, bai mipela stat sasim K300 long ol tim husat i mekim dispela kain pasin. Na sapos ol mekim dispela pasin i go moa bai mipela

rausim ol long asosiesen," Simon tok.

Nau yet, 30 klap rejista pinis wantaim PSSA Difens, IPA, Post PNG, Diwai, Korhes na Industri, NSO na POM GH em sevenpela nupela klap joinim asosiesen dispela yia. Wanwan klap i gat tupela tim. Wanpela bilong meri na narapela bilong ol man.

Ol eksekutiv bilong PSSA i bin askim olgeta tim long bihainim dro na kamap long taim bilong pilai. Ol tok olsem wanwan gayman dipatmen mas traim long helpim ol klap bilong ol long moni na yunifom.

Propa sisen bilong dispela yia i bin kik ov las wiken na bai stap narapela 20-pela wik.

Mosbi bai kamap wantaim wanpela strongpela Anda 20 tim i go pilai long nesanel klap sempionsip long Wau staf long 27 i go 30 Novemba. Kosa Joe Turia askim olgeta Anda 19 pilaia bilong ICFund Yunivesiti, Sobou, Guria, Kurti Andra, Momase na Difens long kamap long Bisini tumoro apinun long statim trening. Dispela em ol tim husat i save pilai insait long PMSA resis. Olgeta manki long sampela hai skul long siti.

Joe tok olsem PMSA bai traim long strongim olgeta hai skul sumatin long neks yia.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.